


Lukri Né Kena



Wagi: Lukri Né Kena Portions

Lukri Né Kena
Wagi: Lukri Né Kena Portions
Luk long tokples Wagi long Niugini

copyright © 2016 Wycliffe Bible Translators, Inc.

Language: Wagi

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 11 Nov 2022 from source files dated 29 Jan 2022

6967869f-9588-59ed-91d2-0158edb59705

Contents

LUK	1
---------------	---

LUK

Né Ura Koptak

Lukri Né ge danah wénih Luk qe yan. Nug ge dokta am Grikrer. Nug danah nusgur am danah lawardi Tiwur pi dosi qe ole olag meře mérigri né ene yan. Tiwurdi Né os ge wénih Aposel qe ole Luk nug yan. Lukri Né e owa ge Luk Yesus keřdi wan ewa urıyan qeri yan: Nug oun os gattu owa de qe mariko peko buliko ow Tiwurdi uhrıbak éřurdigri urıyan (19:10). Yesus danahas kunum asilag kug owari buliko diardigri urıyan (2:10; 2:30-32; 3:6; 24:47). Né Kena enewa, ig Yesusri o mousak hipunin danahas dilag nie qe ewqétu (6:20; 7:22; 14:11-13; 21:1-4). Ig nug o mousak as dilag qe ewqétu (né ene sillah 7:11-17; 8:2-3; 10:38-42; 13:10-13; 21:1-4; 23:27-31). Am nug o mousak nir nounu dilag qe ole ewqétu (né ene sillah 8:41-42; 54-55; 9:38-42; 9:46-48; 18:15-17).

Lukri Né Watiak

1. Né digumak (1:1-4)
2. Le Luarak danah Yon memnak am Yesus ole (1:5—3:20)
3. Yesus kekuak diguman (3:21—4:13)
4. Yesus Galili kekuan (4:14—9:50)
5. Yesus kekolle Yerusalem atan (9:51—19:27)

6. Kuha usih qe owa Yerusalem keř ban (19:28—23:56)
7. Yesus buliko fou meko asko am bégur gumarko wanan (sapta 24)

Né Digumak

1 O danah naři Tiofilus, danah kuřum la os ag tatam keř keř ig gamnigwa beko atan qeri né ene yeg. 2 Ag né qe danahas ig mariweg duet qe sillah ole yeg. Danahas qe digumakwa Yesus keř keř sew amlagwa peg qe, dimba ag Tiwurdi Néri kuak danah beg. 3 Da Luk da né qe digumakwa arereg ban qe peko kepařko kouturin. Qeri da ole né ene keř keř kunum ban qe dimlamurko yarildi kena elle qe yin. 4 Danah naři Tiofilus, na né ismireg qe, né meře qe doka ot mourdig.

Le Luarak Danah Yon Memnakri Né

5 Sén qewa Herod* nug king delle Yudia gumewew, pris† os wénih Sakaraia daré. Nug pris ameg Abiya qewari, am nug waw Elisabet ole a olele pris Aron fuřuh. 6 A olele Nařinahri Řo am Né ole kunum dimlamurdap, qeri ge Tiwur a danahas mangunah qere pıatan. 7 Gam a keinmanah am a nir kawa, keřdi Elisabet nug owa nir kawa. 8 Sén os pris ameg Sakaraia nug daré ole qe asilag sén kekuakri

* 1:5 1:5 Herod ene Herod king dewew Yesus katleg ole qe memeg. † 1:5 1:5 Tiwur am danahas ole gamlagwa Tiwurdi ofa mak danah

dewew ge, deŕ os pris Sakaraia nug Tiwur nohwa kekuan. ⁹ Pris ag koulagwa wenlag ker masawa yeksi tourweg ge, Sakaraia wénih ban. Wénih bew ge, nug keprurweg Tiwur Lougwa noko ker ahu os kew kas murdig kena ole Tiwurdi mandigri nuan. ¹⁰ Ker ahu os kew kas murdig kena be ole ge nug manewew ge, danahas kunum dimdim qagleksi unuqoreg. ¹¹ Sén qewa Tiwurdi doup Sakaraia gumurko doko, qaréw ker ahu os murdig kena ole aŕelle dian ge séku kenariwa sirko dian. ¹² Dewew ge, Sakaraia aminko doup ge peko ge, nug wawtuŕko ole faŕan. ¹³ Gam Tiwurdi doup amegwa anan. “Sakaraia, na aw faŕwen. Tiwur unuqorak nasip duan. Na wat Elisabet nug nir danah memanko mirdig, am na nir ge wénih Yon kataŕ. ¹⁴ Geisah nug dow, na ot gamag naŕi asdig. Am nug durig qeri danahas la kuŕum ole olag gamag asdig. ¹⁵ Keŕdi nug Tiwur nohwa danah wénih ole darig. Nug wain am le gagrag la ge ole ospi lew, am nug anig owa niewew, sén qewa ole Koulli Gun nug ole wittew dessa omaldig. ¹⁶ Nug anuqko Israel danahas kuŕum omlarew ag olag buliew asilag Naŕinah Tiwur gumdeksi dolag. ¹⁷ Profet† Elaisa gagragsak morew kekuan ge sillah Yon Naŕinah noh

oko anuqko attig. Atewew ge, nug sew nir memelgar ole ag olag usih nirig. Am nug danahas Tiwur nohwa tapewnak sési ge omlarew olag buliew Tiwur o nie sillah diakri dahmelag. Qewa ge, nug sew Naŕinah uŕirigri qeri danahas olag bawressi dalag,” eko anan. ¹⁸ Sakaraia Tiwurdi doup koŕmoran, “Da ge areg ol meŕe mérig? Keŕdi da wal ole i keinmanah am i nir ole makri sén eŕtan.” ¹⁹ Tiwurdi doup nug koŕewa oko anan, “Da doup Gebrel. Da Tiwur nohwa deina ole. Nug da meŕilew nasip né kena ene oko na amenwa andildi uŕiyém. ²⁰ Na doka koutor. Gei ole na né kaŕdew né ospi mariwen, keŕdi na dasil né ot meŕe pi mé. Na dawew atew nir nasip dow am bulika né maririp. Da keŕ aném ge sén nusig morakwa bérig.” ²¹ Sén qewa danahas Sakaraia dimdim bérigri ameg méksi dessi dahmak kuŕum og. “Aregri Tiwur Lougwa gun awen owa wagamnah de?” ²² Sén nug dimdim ban ge, nug né mariakri olele kawa. Ag nug Tiwur Lougwa kowol os pian ge, nug ewegwa ih sew peksi olag mouran, keŕdi nug né kaŕdan. ²³ Nug pris kuakri sén nusig ge malako ge, buliko lougwa atan. ²⁴ Qe dimba ge, waw Elisabet o ole meko, nug kalam tanig ole ge louw ih daré. ²⁵ Elisabet anan, “Naŕinah dasil o niew,

† 1:17 1:17 Tiwurdi né oko mariak danah

nug sew da nir ole mein. Géri danahas nolagwa úra nak dorém ge, nug sew kawa man.”

Yesus Memnakri Né

²⁶ Kalam 6 qere Elisabet nirdi weiewew, Tiwur doup nusig wénih Gebrel qe meforew taun nagur wénih Nasaret qewa atan. Taun qe Galili atu owa de. ²⁷ Tiwurdi doup nug Tiwurdi né oko as magun os danah ole ospi weiyes ole qe dowá atan. Nug danah os wénih Yosep king Dewit fuúhwari qeri féq orweg. As magun qe wénih Maria. ²⁸ Tiwurdi doup nug gumurko atko amegwa anan, “Maria, na kena te dana? Tiwur nasip o naíri nie. Tiwur na ole dasa.” ²⁹ Maria doupri né qe doko wawtuúrko katat qew ge dahman, “Keí digurinah né ene ané.” ³⁰ Gam Tiwurdi doup anan, “Maria, na aw farwen. Tiwur nasip o nie. ³¹ Geisah na ot ole meka nir danah os memanka am nug wénih Yesus kataf. ³² Tiwur sew nug binag naíri ole bérig am nug wénih Tiwur Karannah Bega éksi anlag. Naírinah Tiwur sew nug king beko alag dugiah Dewit king daré sillah darig. ³³ Nug Yakop fuúh gumarelle king sansan darig. Kingdom nusig ge ospi kawa mew,” eko anan. ³⁴ Maria Tiwurdi doup amegwa anan, “Da danah ole ospi weiyer gam, aregnah kowol qere dagnéwa bérig?” ³⁵ Tiwurdi doup koéwa oko anan,

“Koulli Gun neko na tonirew gagragsak Tiwur Karannahri na qanírdig. Qeri nir gunnah na memandip qe wénih Tiwur Bega éksi anlag. ³⁶ Na doka koutor. Na liap Elisabet ole nug keinmanah, nug owa nir kawa éksi andéw, gam gei nug kalam 6 qere nirdi weiye, géri nug nir ole darig. ³⁷ Keídi Tiwur nug keí os sakri ane ge, qe mou bérig.” ³⁸ Maria Tiwurdi doup koéwa oko anan, “Da Naírinahri kuak as, na né anam qe sillah bar.” Qere anew ge, Tiwurdi doup nug munurko atan.

Maria Elisabet Perig Atan

³⁹ Qe dimba wagam ole kawa, Maria bawarko usihri teko Yudia atu owa taun os qoukuwa, Sakaraia Elisabet ole des qewa atan. ⁴⁰ Atko Sakaraia lougwa wanew Elisabet peko sumdew ge, Maria ole Elisabet sumdan. ⁴¹ Sumdewew ge, nir Elisabet owa nian qe ole kawqan. Koulli Gun Elisabet wittew dessa dahmak moran. ⁴² Elisabet qalko Mariari anan, “Tiwur na as la kunum érarak wittak kena miran, am Tiwur nir na otwa nie qe wittak kena moran. ⁴³ Da ol gamagnah ase, keídi Naírinah dasil anig peírdigri uíyíé. ⁴⁴ Na sumram qe dueppi ole nir da olwa ene gamag asew kawqé. ⁴⁵ Tiwur na wittak miran, keídi na nug anan qe beko mou murdigri ot mefe

man,” eko Elisabet Maria anoran.

Mariari Kasi

⁴⁶ Maria anan, “Da ol dahmak ole kunum Nařinah morko binag meina. ⁴⁷ Da Tiwurdi ol gamag naři ase, keřdi nug da hipunin dasil noř uwindi seko buliko wiřan. ⁴⁸ Da Tiwurdi kekuak as sam, gam nug da dahmiřko koutoran. Qeri gei digumak am dimba dimba ole danahas anlag, ‘Tiwur as qe wittak kena moran,’ ěksi anlag. ⁴⁹ Keřdi Tiwur Gagragsak Digu, nug dagrowa kowol danah sakri kawa qe sew ban. Nug wĕnih gunnah. ⁵⁰ Nug sew danahas nug fařursi ole qe ag alalgar dugialgar ole ag nusig o duak owa dalag. ⁵¹ Nusig gagragsakwa kowol danah sakri kawa qe san. Nug sew danah ag agĕgĕ binlag meg qe kum qĕtieg. ⁵² Nug king binlagri serĕw qe dilag gagragsak sew kawa meweg, am danah binlag kawa sam darĕw qe sew ag nug nohwa naři beg. ⁵³ Nug danahas ke kawa qe ke kena nusigwa begaran am sew danahas kehlag ole qe ewlag sam qere ateg. ⁵⁴⁻⁵⁵ Nug kuak nir nusgur Israel danahas kehnanan. Keřdi nug Abraham am algur dugiahur ole o duak nusig owa sansan diakri nĕ fagqan qe dahmorko, ig alangar dugiangar agop ole qere sĕrig,” eko Maria

Tiwur binag man. ⁵⁶ Maria nug Elisabet ole kalam kiam sillah dessa, am buliko kawagwa Nasaret atan. ⁵⁷ Elisabetri nir memnak sĕn dow ge, nug nir danah memnan. ⁵⁸ Nug gĕmu ole asilaswari am leilti ag Elisabet nug Nařinahri o duak naři owa dian qe dueksi, uřiweg nug ole ařiĕ olag gamag asan. ⁵⁹ Deř 8wa ge nir fĕru gone kotřakri sĕn dew, ag uřiweg. Ag memeg Sakaraia wĕlqorlagri seg. ⁶⁰ Gam nir anig anaran, “Kawa, nir wĕnih Yon katařnig,” eko anan. ⁶¹ Anew ge, ag Elisabet anoreg, “Asilag atĕrwari ountĕ os wĕnih qere ole kawa.” ⁶² Am ag Sakaraia nir wĕnih oun katařdig qe dolagri ewlagwa nug perigri kowol seg. ⁶³ Seweg ge, nug keke os morweg yarigri ewegwa ih sew uksi morweg ge, “Nug wĕnih Yon,” yew peksi dorlag nan. ⁶⁴ Sĕn qewa ih Sakaraia nug koře koptew digumeko nĕ mariyelle Tiwur binag suman. ⁶⁵ Danahas ařiĕ darĕw ole qe nĕ qe kunum duessi wawtuřeg. Yudia atu kunum qoukuwari danahas ag ole kowol qe neihwah marieg. ⁶⁶ Danahas kowol qeri nĕ duessi olag meweg te meweg new ge aneg, “Nir ene keř danahnah bĕrig?” ěksi aneg. Keřdi Nařinah eweg§ Yon dowa dian.

Sakaraiari Kasi

§ 1:66 1:66 “Nařinah eweg Yon dowa dian” digu ge Nařinahri gagragsak Yon dowa dian.

67 Koulli Gun Yon memeg Sakaraia wittew des, géri nug Tiwurdi né qe oko marian. 68 “Nařinah Israel isanig Tiwur binag ménig. Nug danahas nusgur kehnardigri uřiko kegeř asilgar ewlagwari buliko diaran. 69 Tiwur kéhnigak danah os gagragsak naři ole ignéwa mew uřiyen. Nug Nařinahri kuak danah king Dewit fuřuh. 70 Algu Tiwur sew profet gun ag nusig né qe uksi marieg. 71 Nug danah qe gagragsak naři ole ig kéhnigrigri mew uřirig. Nug isanig kegeř am danahas are ag ig nouni dahmigi ole qe ewlagwari buliko wigri. 72 Tiwurdi o duak ig alangar dugiangan ole deg am nug titwanak gun qe doug ospi katian. 73 Tiwur nug alnig dugianig Abraham dowa né qe fagqan. 74-75 Nug ig kegeř isangan ewlagwari wigri né fagqan. Qeri ig pi fařhut, nug nohwa onig kunum morettu sansan mangu weiyettu gun dettu nug binag ménig. 76 Am nir dasil Yon, na geisah Tiwur sew na Tiwur Karannahri profet éksi aniřlag. Keřdi na Nařinah noh oka anuřka atenna ih nusig ořdip. 77 Na danahas nusgur anardip: Nařinah hipunin asilag kusuřko buliko diardig. 78 Keřdi Tiwur isanig o duak naři nie, qewa ge kem be sillah Nařinah kéhnigrigri saw kappari uřirig. 79 Danahas gattuwa dasi am mousakri fařakwa

dasi qe agop sonřelle nug ih ismigew Tiwurdi maror ihwa atnig,” eko anan. 80 Nir qe dahmak am o mourak kena ole kena man. Nug atu meřak danah kawawa daré, gam dimba Israel danahas gumarko wanan.

2

Maria Yesus Memnan

1 Sén qewa Ogastus nug Rom atu qe kunum dilag king delle, nug řo os man: Danahas kunum atu qewa daréw ag wenlag yalagri řo qe man. 2 Kurinius nug Siriari kuri danah naři delle ge, wenlag yakri řo qe diguman. 3 Am danahas kunum ag kawlag awen awen wenlag yalagri aseksi ateg. 4 Géri Yosep nug ole Galili owa taun Nasaret qewari am Dewitri taun Betlehem Yudia atu qewa atan. Keřdi nug Dewit fuřuh. 5 Nug Maria ole ařié wenlas yalasri ates. Maria nug Yosep uřigri fég ořwak dewew am Maria nir uřigri sén unaka dewew ole ates. 6 A Betlehem qewa dessa ge, Mariari nir memnak sén duan. 7 Sén qewa nug nir danah memnan. Nug ge nir anřakri. Maria nir qe lamen nařiwa saputko ge, doř dilag kelak awen qewa awen bawarko mew nian. Keřdi řo danah niakri lo qe ambew ag awen ole kawa.

Sipsip Gumarak Danah Tiwurdi Doup Ole

8 Sipsip gumarak danah ag Betlehem kaw qe mourak

awen gisgar olewa sipsip asilgar gumareksi tuqan qewa deg. ⁹ Tiwurdi doup nug ag gumarko gamlagwa now ge, Nařinahri kamsahlak sonariko talilaran. Talilarew, olag nařinah fařan. ¹⁰ Am Tiwurdi doup nug ag anaran, "Ag aw fařweg. Da asilag né kenanah os oko uřiyém. Né qe sew danahas kunum olag gamag naři asdig. ¹¹ Gei deř ewa Dewitri taunwa as os nir danah memanko maré. Nir qe hipunin noh asilag owegri seko buliko diarak danah am nug Nařinah Kristus.* ¹² Ag nir qe peksi olag mourdigri ge kowol os ere pelag: Nir anig nug lamenwa saputko doř dilag kelak awenwa mew niewew pelag," eko anaran. ¹³ Tiwurdi doup nug né qe mariko malwew ge, usihri saw karan Tiwurdi doup ameg naři doweg qagleksi Tiwur binag sumessi kasi ifeg. ¹⁴ "Tiwur karannah nug kamsahlak gun olewa de. Am danahas wanwa Tiwur asilag o nie ole qe ag maror nusig owa dasi."

Sipsip Gumarak Danah Yesus Pelagri Ateg

¹⁵ Sén Tiwurdi doup ag minareksi saw karan atweg ge, sipsip gumarak danah qe ag agégé né marieg. "Ig Betlehem atektu Nařinah anigé ole am keř bé qe penig." ¹⁶ Géri usihri atessi ge, Maria Yosep ole am

nir yu qe doř dilag kelak awenwa niewew mariareksi piareg. ¹⁷ Ag nir qe peksi ge, nir qeri né dueg ole qe danah la os taun qewari ole amlagwa aneg. ¹⁸ Danahas ag né qe dueksi dahmak lanah qere og. ¹⁹ Gam Maria keke kunum béksi ateg qe owa ih dewew dahmak naři oré. ²⁰ Am sipsip gumarak danah olag gamag asewew Tiwur binag karan sumessi am binag messi bulieksi ateg. Keřdi ag keke kunum Tiwurdi doup anan qe sillah amlagwa peg am doulagwa dueg.

Yesus Memeg Anig Ole Oksa Tiwur Lougwa Ates

²¹ Deř 8wa Yosep Maria ole nir yu féru gone kotřak sén dow ge, wénih Yesus katrés. Nug anig o ole pi mak Tiwurdi doup wénih qe moran. ²² Sén a Mosesri Ro yakwa gun kowol qe dimlamdeksa malweksa ge, a nir oksa Yerusalem Tiwur Lougwa Tiwur ewegwa melasri ates. ²³ Nařinahri Ro yakwa de ge, "Nir memeg anig ole nir danah anqakri memanas qe Tiwur ewegwa melas." ²⁴ Am Maria ofa oko Tiwur murdigri qe ole ses. Keřdi Tiwurdi Ro yakwa ane, "Kuhřil naři ařit kawa ge, kuhřil nounu masiksik fou kena mak ařit os pris mores."

Simion Tiwur Binag Man

* **2:11** 2:11 Kristus ge Mesaia. Tiwur danahas nusgur buliko diardigri danah toqoran.

25 Sén qewa, danah os wénih Simion Yerusalem qewa daré. Nug Tiwur nohwa mangu weiré am Tiwurwa ih daré. Nug Tiwur Israel kug asilagwari buliko diardigri qe ameg meré. Koulli Gun nug ole darap. 26 Koulli Gun sew nug duan ge, nug Nařinah dowari Kristus uřiyew peko tatam am mousdig. 27 Koulli Gun sew nug Tiwur Lougwa teko qewa dewew, Yosep waw ole Řo yakwa ane qe dimlamdeksa nir asilas Yesus oksa qewa tes. 28 Simion nir qe oko momowa ořako Tiwur binag sumko anan. 29 “O Nařinah, na atu kunum gumna ole, na né faggen ge, na sewe nasip kuak danah da ol marorwa mousko attil. 30 Kerđi da amelwa danahas buliko diardigri danah uřiyen qe piém. 31 Na nug keprurka bawwurka mewe uřiyen. Qeri danahas kuřum atu kunumba nug pelag. 32 Nug Yuda danahas kawa la qe am danahas naspar Israel dilag ole Tiwurdi kamsahlak gun ole oko uřirig,” eko anan. 33 Nir memeg anig ole Simion nirdi anan qeri dorlas nan. 34 Simion wittak marko am nir anig Mariari anan. “Nir ene Israel danahas kuřum sew tolalag am gagrag dalagri ole am nug Tiwurdi ih ismardigri toqoran. Gam danahas kuřum nug dimorlag. 35 Qeri

danahas kunum dilag dahmak olagwa nie qe ambo mérig am na otwa qoum yako qetko attig,” eko anan. 36 Am as profet os wénih Anna. Nug Fanuel ařeg am Aser ater qewari. Nug keinmanah am nug gému ole nug oksa makař 7 qer dessa, gému mousan. 37 Géri nug qehrás dew uřiyew makař 84 qer ban. Nug sansan tuqan kémun ole Tiwur Lougwa noko Tiwur binag mérigri kurdelle am unuqordé. 38 Sén qewa ih nug Yosep Maria ole am nir asilas ole gumarko doko nir qeri Tiwur kena sam eko anan. Anelle ge, nir qe Yerusalem danahas kug owari buliko diardigri ameg meg qe anaran. 39 Yosep waw Maria ole Tiwurdi Řo yak de qe dimlamdeksa kuak kunum malweksa ge, a kawlas diguwa Nasaret, Galili atu qewa buliekša ates. 40 Nir asilas qe gagragsak ole kena man. Nug dahmak kena ole ban am Tiwur wittak kena mordé.

Nir Nag Yesus Tiwur Lougwa Dian

41 Makař dorog Yesus anig memeg ole a Yerusalem Nanřurak Deřdi† mallenwa attap. 42 Sén nug makař 12 qer dewew ge, ag koulag qe dimlamdeksi Yerusalem mallenwa ateg. 43 Sén mallen qe kawa mew, nug anig memeg ole buliekša

† 2:41 2:41 Nanřurak Deř ge Yuda dilag mallen os. Sén Yuda danahas Isip darew qe, mousak nir danah anqakri nanřaran qe dahmorakri sén.

kawlagwa atepes ge, nalas Yesus nug Yerusalem qewa dian, gam a qe pi dues. ⁴⁴ A danahas ole arié atsi essa der usih ge ates. Der oswa ge a digumeksa Yesus mariessa asilaswari am leilti kořmares. ⁴⁵ Sén nug ospi peksa, a nug marilasri bulieksa Yerusalem ates. ⁴⁶ Der kiam qewa, a nug Tiwur Lougri kar owa Tiwurdi Néri duak marak danah qe olagwa dewew pes. Nug ag né marieg qe doko ge kořmaran. ⁴⁷ Ag kunum ole nusig duak marian qe am kořmak buliko noh man qe ole dueksi dorlag nan. ⁴⁸ Sén anig memeg ole nug peksa ge, a ole katat aqatan. Anig anoran, “Nir dasil, na keřdi i qere sitam? Na memen am da ole i dahmak nari nasip ollu mariyirah,” eko anan. ⁴⁹ Nug a kořmatan, “A keřdi da mariyirsa? A pi te dosa da Mem Lougwa deina?” eko anan. ⁵⁰ Gam nug né anatan ge, a olas ospi mouran. ⁵¹ Yesus nug a dimlamatew bulieksi Nasaret ateg. Nug anig memeg ole kořlas dimlamurdé. Gam Maria nug keř keř beko atan qe owa ih dahmelle daré. ⁵² Yesus nug dahmak kena ole kena man. Tiwur am danahas ole nusig olag gamag asdé.

3

Le Luarak Danah Yon Né Kusuan

¹ Makař 15 owa Taiberias nug Rom atu qe kunum dilag king daré. Pontius Pailot nug Yudia wan atu qe gumdé, Herod Antipas nug Galili atu qe gumdé, am kamag Filip nug wan atu ařit Ituria am Trakonitis ole gumatdé. Am Lisantias nug Abilene wan atu qe gumdé. ² Anas am Kaiafas ole a pris* dilag kuri darap. Sén qewa Sakaraia nag Yon atu meřak danahas kawawa dewew, Tiwurdi Né nugrowa urıyan. ³ Yon nug atu le nari Yordan mourak qe kunumba weiyelle né kuswelle danahas dilag anan. “Tiwur hipunin asilag kusuqřigri ge, ag olag buliew le luak os.” ⁴ Qe sillah profet† Aisaiari Né yakwa algu anan, “Danah os atu meřakwa qalko urıurig. ‘Narinah urırigri ih bawres. Ih mangu mores. ⁵ Ollu kunum meglares am qouku nounu am qouku wagé wagé qe ole kunum mangu marweg urēmqes. Ih mériak qe kunum mangu mares, am ih goto goto qe bawres. ⁶ Danahas kunum Tiwur asilag kugwari buliko diardig qe pelag.’” eko anan. ⁷ Danahas ameg nari Yon le luardigri gumdeksi ateg. Atweg ge, Yon anaran, “Ag mat nou bégur. Oun anew ag Tiwurdi uhřibak urırigri unaka de qe erdeksi kum atsi? ⁸ Ag meřenah olag buliew pe, mou kena qe

* 3:2 3:2 Tiwur am danahas ole gamlagwa Tiwurdi ofa mak danah † 3:4 3:4 Tiwurdi né oko mariak danah

seweg bar. Am ag agégé 'Ig Abraham fu'uh,' éksi aw anweg. Da ag anarina, Tiwur qar nisi ene oko sew Abraham fu'uh belag olele. ⁹ Palangis qe ker kuardigri iril diglagwa bawrak de. Ker are os mou kena ospi niweg pe, kuarko kewba tourardig," eko anan. ¹⁰ Yon qere anew ge, danahas ku'um ag ko'moreg. "Am ig aregnah sénig?" éksi aneg. ¹¹ Yon ko'lagwa oko anan. "Danah siot arit ole ge os ge danah siot kawa ole qe morar. Am danah oun nug ke ole ge nug ole qere ih sar." ¹² Takis wak danah os ole le luarakri Yon gumdeksi u'iyeksi ko'mreg. "Duak marak danah, am ig ge aregnah sénig?" ¹³ Yon ko'lagwa oko anaran, "Ag qarég takis wakri anak qe ih mangu os am aw qe é'urweg," eko anan. ¹⁴ Fan danah os ole ko'moreg. "Am ig ge areg sénig?" Yon ko'lagwa oko anaran, "Ag danah aw keigarweg farareksi qarég marweg. Am ag danah aw yago' mareksi qarég oweg, ag kuak asilag noh mangu olag gamag asakwa os," eko anan. ¹⁵ Danahas ag Kristus[†] ameg méksi daréw, géri ag dahmak ku'um og. Qewa ge ag kunum olagwa ih ere dahmeg. "Yon nug Kristus qenan te?" éksi dahmeg. ¹⁶ Géri Yon danahas kunum ko'lagwa oko anan. "Da

lewa ih le luarina, gam geisah danah os da e'lak nug gagragsak ole u'irig. Da danah kena kawa am nug fé'g ga'ra darér kusqakri olele kawa. Nug Koulli Gunwa am kew a'rikwa luardig. ¹⁷ Danah qe nug iril kekuakri bawré de. Nug darweh owa reis mou ge, kepa'ko qagulko nug lougwa mérig. Gam reis ga'ra ge kew pi qouse ole qewa mandig," eko anan. ¹⁸ Yon nug né la ku'umba danahas doulag patelle am Né Kena ole kusuan. ¹⁹ Gam sén Herod atu qe gumewew, Yon Herodri hipunin u'ra kopatko ga'ra moran. Ke'rdi nug kamag waw Herodias ka'urko am nug hipunin la ku'um os ole san. ²⁰ Am Herod nug hipunin nusig la os qe tu'urko sew kuak danah nusig Yon uksi kalabuswa yaneg.

Yon Yesus Le Louran

²¹ Sén Yon kalabuswa pi atak delle danahas ku'um le luarelle, Yesus ole le louran. Le lourak qe oko malako unuqorewew saw matlan. ²² Saw matlew ge, Koulli Gun kuh'ril sillah Yesus dowanew am Tiwur fag saw karandi anan. "Na nir dasilnah. Da nasip ol mouse am ol gamag ase," eko anan.

Yesus Algur Wenlag

²³ Sén Yesus maka' nusig 30 keke qere dewew, kekuak nusig diguman. Danahas dahmeg ge nug Yosep nag

[†] 3:15 3:15 Kristus ge Mesaia. Tiwur danahas nusgur buliko diardigri danah toqoran.

éksi aneg. Yosep nug Heli nag. ²⁴ Am Heli nug Matat nag, am Matat nug Liwai nag, Liwai nug Melki nag, Melki nug Yanai nag, Yanai nug Yosep nag. ²⁵ Am Yosep nug Matatias nag, am Matatias nug Amos nag, am Amos nug Nahum nag, am Nahum nug Esli nag, Esli nug Nagai nag. ²⁶ Nagai nug Mat nag, Mat nug Matatias nag, Matatias nug Semen nag, Semen nug Yosek nag, am Yosek nug Yoda nag. ²⁷ Am Yoda nug Yoanan nag, Yoanan nug Resa nag, Resa nug Serubabel nag, Serubabel nug Sialtiel nag, Sialtiel nug Neri nag. ²⁸ Am Neri nug Melki nag, Melki nug Adi nag, Adi nug Kosam nag, Kosam nug Elmadam nag, am Elmadam nug Er nag. ²⁹ Am Er nug Yosua nag, Yosua nug Elieser nag, Elieser nug Yorim nag, Yorim nug Matat nag, Matat nug Liwai nag. ³⁰ Am Liwai nug Simion nag, Simion nug Yuda nag, am Yuda nug Yosep nag, am Yosep nug Yonam nag, Yonam nug Eliakim nag. ³¹ Am Eliakim nug Melea nag, Melea nug Mena nag, Mena nug Matata nag, am Matata nug Natan nag, am Natan nug Dewit nag. ³² Am Dewit nug Yesi nag, Yesi nug Obet nag, Obet nug Boas nag, Boas nug Salmon nag, Salmon nug Nason nag. ³³ Am Nason nug Aminadap nag, Aminadap nug Atmin

nag, Atmin nug Arni nag, Arni nug Hesron nag, Hesron nug Peres nag, Peres nug Yuda nag. ³⁴ Am Yuda nug Yakop nag, Yakop nug Isak nag, Isak nug Abraham nag, am Abraham nug Tera nag, Tera nug Nahor nag. ³⁵ Am Nahor nug Seruk nag, Seruk nug Reu nag, am Reu nug Pelek nag, Pelek nug Eber nag, Eber nug Sela nag. ³⁶ Am Sela nug Kainan nag, Kainan nug Arpaksat nag, Arpaksat nug Sem nag, am Sem nug Noa nag, Noa nug Lamek nag. ³⁷ Am Lamek nug Metusela nag, Metusela nug Inok nag, Inok nug Yaret nag, Yaret nug Mahalalel nag, Mahalalel nug Kenan nag. ³⁸ Am Kenan nug Inos nag, Inos nug Set nag, Set nug Adam nag, Adam nug Tiwur nag.

4

Nou Memeg Yesus Qepian

¹ Yesus Yordan le minko atew, sén qewa Koulli Gun nug owa olele morew dessa Yesus omalko atu meirak danah kawawa atan. ² Omalko atew ge, Yesus de' 40 qere dewew, nou memeg* qepian. Am sén qewa Yesus nug kité ospi lan, géri de' qe malwew ge nug laké qan. ³ Qew ge, nou memeg Yesusri anan, "Na Tiwur Bega daka pe, qar ene anwe ke buliar," eko anan. ⁴ Anew ge, Yesus anan, "Tiwurdi Né yakwa ane, 'Danahas kewa ih fou pi dasi,' " eko anan.

* 4:2 4:2 Satan

⁵ Anew ge, nou memeg Yesus omalko atu qoukuwa teko usihri Yesus wan atu kunum ismuran. ⁶ Ismurko anan, “Da na gagragsak mirwi wan atu e kunum gumdip am da séwi binam nañi ole darip. Keñdi keke ene kunum ge da miñak. Qeri da danah os murdildi ge da murdil. ⁷ Qeri na da nolwa duk noka binal mérip ge keke kunum nasip darig,” eko anan. ⁸ Yesus koñewa oko anan. “Tiwurdi Né yakwa ane, ‘Na Nañinah nasip Tiwur ih binag me am kallowa da,’ ” eko anan. ⁹ Anew ge, nou memeg Yesus omalko Yerusalem atko sew Tiwurdi Lo koñgo karannah qewa tew anoran. Na Tiwur Bega daka pe, olka wanap no. ¹⁰ Keñdi Tiwurdi Né yakwa ere ane, “Tiwur doup nusgur anew na dahmireksi koutorlag.” ¹¹ Ag ewlagwa na urwirlag géri na fén qar ospi yew, eko anan. ¹² Anew ge, Yesus koñewa oko anan, “Tiwurdi Né ane, ‘Na Nañinah Tiwur nasip aw mena pewen,’ ” eko anan. ¹³ Nou memeg nug ih kuñumba Yesus qepian malako ge, Yesus munurko am sén os qeperigri ameg man.

Yesus Kuak Nusig Galili Diguman

¹⁴ Sén qewa Koulli Gundi gagragsakwa Yesus buliko Galili atu qewa atko dian, am nug neihwah atu qe kunumba tualan. ¹⁵ Nug Yuda dilag binag mak lo

kuñumba danahas Tiwurdi Néri duak mardé. Danahas kuñum nug binag sumdew.

Yesus Kawag Diguwa Né Kusuan

¹⁶ Yesus nug nir nagurwa delle kena man ole kaw Nasaret qewa atan. Am nug Sabatwa sansan seré sillah Yuda dilag binag mak lo owa noko, Tiwurdi Né ewqerigri asan. ¹⁷ Asew ge, binag mak lori kuak danah profet Aisaiari Né yak qe nug moreg. Morweg kolako ge, né os ere anko yak qe mariko peko ewqan. ¹⁸ “Nañinahri Koulli ge dagnéwa de. Keñdi nug da danahas o duak agop Né Kena kusurildi kurulwa goñen gogoñko toqíran. Tiwur nug da Né Kena qe kuswelle danah kalabuswa qagrakwa dasi qe da séwi kusqak olagri am danah amlag gañu qe séwi bulieksi aminlagri meifew uriyin. Tiwur nug da danah kug owa dasi qe séwi kusqak olagri meifew uriyin. ¹⁹ Am sén uriyew, da Nañinah danahas nusgur buliko diardigri né qe kusurildi meifew uriyin.” ²⁰ Ewqeko malako ge, Yesus Né yak geko buliko kuak danah qe morko, am nug Né digu kusurigri dian. Dewew ge, danahas kunum Yuda dilag binag mak lowa deg qe amlag atew nug keñ eko anew dolagri kittureksi deg. ²¹ Am nug digumeko Né ewqan qe kusuan. “Gei Tiwurdi Né ewqewi iril duéw ene meñenah bé,” eko

anan. ²² Danahas kunum dueksi nug binag sumeg. Ag nug kořewa né kenanah ban qeri dahmak kuřum ossi am aneg. “Danah uni Yosep nag, gam areg?” éksi aneg. ²³ Qere anweg ge, Yesus anan. “Meřenah, ag geisah nun né dasil ene anlag. ‘Dokta, na nagégé férun sewe pasaorar. Kowol are na Kapernaum sewe ig duet ole qe ih na kawan diguwa ewa ole qere se,’ éksi anirlag.” ²⁴ Qere anařelle anan, “Da meřenah amlagwa anina. Profet nug kawag diguwari danahas ag nug pi sumursi. ²⁵ Am da ag amlagwa anina. Elaisari sénwa saw megalko gu kawa makař kiam am kalam 6 qere laké naři Israel atu kunumba nian. Sén qe as qehřas kuřum Israel daréw. ²⁶ Gam Tiwur nug Elaisa mew Israel as qehřas usih os kéhnurdigri pi atan. Nug Elaisa mew Sarefat Saidon† atu qewa as qehřas os kéhnurdigri atan. ²⁷ Qe sillah sén profet Elisari sénwa Israel danah kuřum lepra waře ole daréw. Gam olagwa Elisa danah usih os waře nusig qe pi sew kawa man. Gam Naman Siriarer‡ qe ih sew pasaoran,” eko anan. ²⁸ Qere anew ge, danah Yuda dilag binag mak lowa deg ole ge né qe dueksi olag uhři nounah ban. ²⁹ Uhřilag bew aseksi, Yesus beřweksi kawlag qoukuwa

de qe dougwa waneg. Waneksi qouku sékuwa béwa tourweg nurigri qere seg. ³⁰ Gam qer seppeg, nug buliko gamlagwa wanko ole ih nusig oko atan.

Yesus Koulli Nou Gerđan

³¹ Dimba ge, Yesus Nasaret minko noko Galili atu qe owa Kapernaum qewa atan. Qewa atko ge, Sabat deř oswa ge Yuda dilag binag mak lo owa danahas Tiwurdi Né ismaran. ³² Ismarew ge, ag nusig né qe dueksi dahmak kuřum og, keřdi né nusig ge gagragsak am kuakri wittak ole. ³³ Am danah os féruwa koulli nou ole Yuda dilag binag mak lowa qewa dian. Nug qalko urwan. ³⁴ “Ei! Yesus Nasaretre, na ig keř sigripri urıyam? Na sewe ig paral ménigri te urıyam? Da na duirina. Na Tiwurdi Gun Danah,” eko uruko anan. ³⁵ Uruko anew ge, Yesus koulli nou qe gagrag anoran. “Na torka danah qe pařoka beka eit.” Qere anew ge, koulli nou danah qe pařwurko beko atelle, touřew danahas nolagwa atko qewew beko atan. Gam nug gurak ospi moran. ³⁶ Danahas kunum dořlag new, ag agégé né marieksi aneg. “Uni ge keř nénah? Nug kuakri wittak ole am gagragsak olewa koulli nou né mare. Qeri ag dueksi ole pařwureksi atsi,” éksi aneg.

† 4:26 4:26 Sarafet kaw am Saidon atu ge Yudia atu kawa. ‡ 4:27 4:27 Siria ole Yudia atu kawa.

³⁷ Qewa ge, Yesus neihwah Galili atu kunumba tualan.

Yesus Pita Numia Sew Wa're Pasaoran

³⁸ Yesus Yuda dilag binag mak lo qe qe minko danah os wénih Saimon lougwa atan. Qewa ge Saimon numia féru gagrak na'rinah doko niewew, Yesus wa're qe sew pasaurdigri anoreg. ³⁹ Géri nug wanko duk noko delle wa're ga'ra morew ge, as qe wa're pasaoran. Pasaorew ge, as qe usihri asko ke asilag bawardigri dian. ⁴⁰ Kem nowew ge, danahas leilgar wa're digu kowol kowol ole qe diaressi Yesus dowa u'riyeg. U'riweg ge, nug danahas kunum wa're asilag usih usih qere fe'flag o'rwelle kunum ole sew pasaoreg. ⁴¹ Am qe ih kawa, koulli nou danahas ku'rum pa'waraessi atessi ole Yesusri u'rweg, "Na Tiwur Bega!" éksi aneg. Gam nug ga'ra marew ko'rlag qamteksi né ospi marieg. Ke'rdi ag dueg ge nug Kristus. ⁴² Kuag'rewew ge, Yesus awen os danah kawawa unuqurdigri atan. Atew ge, danahas nug marieksi atessi peg. Peksi ge, nug minarko atewri dagoreg. ⁴³ Gam nug anan, "Da Né Kena Tiwur danahas nusgur dilag king delle gumare né qe§ kusuwi kaw lalawa ole dolag. Ke'rdi da kuak qe sérildi anew u'riyin," eko anan. ⁴⁴ Qewa ge, nug Né Kena kuswelle,

Yuda dilag binag mak lo ku'umba Yudia atu owa weiré.

5

Yesus Nug Béгур Digumeko Diaran

¹ De' os Yesus Genesaret le ko're kawa ranwa asko dewew, danahas ku'umnah nug Tiwurdi Né mariew dolagri omoreksi deg. ² Deppeg nug ranwa kuh a'rit os deppes piatan. Sén qewa, kaké wak danah ag kuh minatweg deppes usu isaressi deppeg piaran. ³ Yesus nug olko kuh oswa tan, kuh qe Saimonri. Teko Saimon kuh nakok bitlew ran minko lewa nurigri amegwa anan. Now ge, Yesus kuhwa delle danahas doulag patan. ⁴ Nug doulag patko malako ge, Saimonri anan. "Kuh palniwe nagur le gamagwa wanew, usu kaké wakri pa'warweg nos," eko anan. ⁵ Anew Saimon ko'rewa oko anan, "Danah na'ri, ig tuqan usu tou'rehut kuag'ré, gam kaké ospi wam. Gam na anam qeri usu buliko pa'warwi nolag," eko anan. ⁶ Qere séksi ge, kaké ku'umnah diarweg usu tata'flag seg. ⁷ Qere sew ge, leilgar kuak usih kuh oswa deg qe dolagri ewta qarweg, duksi kehna'weg be'rweg. Be'warweg beweg ge, kuh a'rit olele kaké yanweg ambew, torieksa lewa nolasri ses. ⁸ Sén Saimon wénih os ge Pita

qere peko ge, unaka Yesus fégwá gatewa yako duk noko ge anan. “Nařinah, da hipunin danah. Qeri na da pařwilka eit,” eko anan. ⁹ Keřdi nug leigur kunum ole kaké huhak diareg qe peksi dorlag nan. ¹⁰ Saimon leikuř Yems, Yon ole Sebedi békuř qe a ole dorlas nan. Géři Yesus Saimonri anan, “Na aw farwen. Na gei digumak danah diardip,” eko anan. ¹¹ Qere anew ge, kuh beřwatweg řanwa tewes, ken kunum mineksi ge, Yesus dimlamdeg.

Yesus Danah Os Lepra Waře Ole Sew Pasaoran

¹² Sén os Yesus nug taun oswa dewew, danah os féru kunum lepra waře ole qe gumurko duan. Nug doko Yesus peko ge, gatewa yako duk noko Yesus nuqurko anan. “Nařinah, na ot sew pe, na da féřulwa waře ene sewe kena mar,” eko anan. ¹³ Anew ge, Yesus eweg tiorko danah qe féřuwa meko anan. “Da ol de. Waře nasip pasaorar,” eko anew ge, usihri lepra waře qe mundan. ¹⁴ Qe dimba, Yesus danah qe gagrag anoran, “Na danah os amegwa awnah anwen. Mosesri Řo yakwa ane qe sillah atka féřun pris* os ismureнна am doř os oka mor. Qeri danahas kunum dolag na waře nasip sew pasaoran,” eko anan. ¹⁵ Gam Yesus neihwah

qe atu kuřumba tualan. Tualew dueksi ge, danahas nusig né dolagri am waře asilgar kusuqko mardigri kuřumnah uřiyeksi qagleg. ¹⁶ Gam Yesus sén kuřum minarko atko awen danah kawawa delle unuqordé.

Yesus Danah Eweg Fég Mousak Ole Sew Pasaoran

¹⁷ Deř os Yesus danahas doulag patelle dewew, Farisi os am Mosesri Řo duak danah ole qewa deg. Ag kaw kuřumbari Galiliri Yudiari am Yerusalemri ole uřiyeg. Am Tiwurdi gagragsak waře danah sew pasaorakri qe Yesus dowa dian. ¹⁸ Sén qewa danah os ag danah eweg fég mousak ole os qařqařwa méksi maweg. Ag maweksi lo owa nuksi Yesus nohwa melagri seg. ¹⁹ Gam danahas kuřumnah, géři awen amban. Ambew ge, waře danah qe ukxi owa nolagri seg, gam ih ospi peg. Géři qařqař ole maweksi lo kořgowa teg. Téksi ge, lo kořgo siřeksi oře qewa qařqař ole pařoweg now danahas gamlagwa Yesus nohwa meg. ²⁰ Meweg ge, Yesus olag meře mak qe peko anan. “Lal, hipunin nasip kusqém,” eko anoran. ²¹ Anew ge, Řo duak danah am Farisi agégé né kuřum marieksi aneg. “Danah uni nug kér danah qeri Tiwur pihlure? Danah ounté la os hipunin kusuqrigri olele kawa. Qe Tiwur nugé nusig

* 5:14 5:14 Tiwur am danahas ole gamlagwa Tiwurdi ofa mak danah

kuak,” éksi aneg. ²² Yesus asilag dahmak qe duan, géri amlagwa anan, “Ag kérdi olagwa dahmak qere usi? ²³ Ke’r né andil qe kug kawa? ‘Hipunin nasip kusqém,’ te kawa ‘Na aska wei,’ eko andil qe te kug kawa? ²⁴ Gam ag ere dolag. Tiwur nug Danah Bega wan enewa hipunin kusuqrigri kepa’rko kuakri wittak moran,” eko anan. Yesus buliko ge danah eweg féq kunum mousak ole qe amegwa anan. “Na aska qarqar nasip oka mouka ole louw eit,” eko anoran. ²⁵ Anew ge, usihri danah qe nolagwa asan. Asko qarqar nug nian ole qe oko mouko, Tiwur binag sumelle lougwa atan. ²⁶ Qeri danahas kunum dorlag new Tiwur binag sumessi am ag Tiwurdi gagragsak fardeksi aneg. “Ig gei kowol founah os piam,” éksi aneg.

Yesus Liwai (Matiu) Kep’ran

²⁷ Qe dimba ge, Yesus atko takis wak danah os wénih Liwai† takis wak lowa dewew pian. Peko ge, amegwa anan, “Na doka da dimlamir.” ²⁸ Qere anew ge, Liwai keke kunum minelle asko Yesus dimlamdan. ²⁹ Dimba ge, Liwai nug lougwa Yesusri ke narí san. Sew ge, takis wak danah ku’rum am danah la os ole a ole ninaqireksi dessi ke qe leg. ³⁰ Gam Farisi am Ro duak danah Farisi dilag ag dougwa piareksi

deg qe aseksi Yesus bégur agop né né ku’rum marieg. “Ag takis wak danah am hipunin danah la ole ke am le ole ospi lelew sillah,” éksi aneg. ³¹ Anweg ge, Yesus amlagwa anan, “Danahas wa’re kawa ge dokta dow a pi atsi. Gam danahas wa’re ole qe ih dokta dow a atsi. ³² Da danahas mangu diardildi pi uriyin. Gam da hipunin danahas anwi olag bulirigri uriyin,” eko anaran.

Kurniak Kowoldi Yesus Ko’rmoreg

³³ Sén qewa, danah qe Yesus ere amegwa aneg. “Le Luarak danah Yon bégur ge sén ku’rum kurdessi unuqursi. Am Farisi begalgar ag ole qere sési. Gam na begpar ge qere ospi sési ag ke le ole lési,” éksi aneg. ³⁴ Géri nug né tonak ene anaran, “Danah os as owew, ag nug leigur ke gun marlag olele te? Sén nug qe ole deppeg, kawa. ³⁵ Gam dimba geisah danah qe uksi atlag, géri nug foula leigur ole pi daweg. Sén qewa ge, leigur qe ke gun melag,” eko anaran. ³⁶ Yesus nug né tonak os anaran. “Danah ounté nug lamén fou ge parilko saríh nagur os oko am lamén alag o’ré pi titie. Am danah os qere sérig ge, nug lamén fou qe sew nou mérig. Am lamén saríh fou qe lamén alag qe ole amnak usih kawa. ³⁷ Am danah ounté os nug wain

† 5:27 5:27 Wénih os ge Matiu.

fou bawrak le witakri doŕ gaŕa alagwa pi yane. Am danah os qere sérig ge, wain fou doŕ gaŕa parilko wain wanwa gogórdig. Am wain fou doŕ gaŕa le witakri qe ole sew nou mérig. ³⁸ Danah nug wain fou ge doŕ gaŕa fouwa ih yanar. ³⁹ Am danah nug wain alag tatam le ole ge, nug wain fou bawrak qeri ospi sew. Nug ane, ‘Wain alag ge kena,’ ” eko anan.

6

Sabat Deŕdi Koŕmak

¹ Sabat deŕ oswa Yesus bégur ole reis dar owa nuksi ateg. Atessi ge, nug bégur reis qieksi ewlagwa mou oŕoleksi damqéksi leg. ² Qere seweg ge, Farisi os piareksi koŕmareg, “Sabat deŕwa qere sakri ge gun, gam ag keŕdi qere séw,” éksi koŕmareg. ³ Yesus Farisi koŕlagwa oko anan, “Ag Dewit danah nusgur ole laké aqarew seg qeri, Né yak nie ge ospi te ewqéksi dosi? ⁴ Dewit Tiwur Loug owa noko, Tiwur nohwari ke beret qe wan. Beret qe gun, danah balbal kunum dilag kawa, pris* dilag mangu. Gam Dewit nug beret qe leko am danah nusgur qe ole marew leg. Ag Né yak qe ospi te ewqeg?” ⁵ Yesus buliko anaran, “Danah Bega nug Sabat deŕ gume,” eko anaran.

Yesus Sabat Deŕwa Kekuan

⁶ Sabat deŕ oswa Yesus nug Yuda dilag binag mak lowa noko danahas Tiwurdi Néri duak maran. Am danah os eweg kenari mousak ole qewa dian. ⁷ Ŕo duak danah am Farisi os ole ag keŕ ihwa os Yesus yagoŕ morlagri ih marieg. Géri ag Yesus Sabat deŕwa waŕe danah kusqarew pelagri kaŕéordéw. ⁸ Gam Yesus asilag dahmak qe íril duan. Doko ge, danah eweg mousak ole qe amegwa anan. “Aska danahas gamlagwa sirka da,” eko anoran. Géri danah qe asko sirko dian. ⁹ Dewew ge, Yesus koŕmaran, “Ag dosi ge, kowol are ge Ŕo dimlamdak? Ig Sabat deŕwa danah kowol kena te sarnig, kawa ig gurak te marnig? Ig danah kena dalagri te kehnarnig, kawa ig danah sarhut paral te melag?” eko koŕmaran. ¹⁰ Nug amnew weiyew danah kunum piarko ge, danah qe anoran. “Ewen tior,” eko anoran. Anew danah qe qere sew ge, eweg sew buliko pasaorko koutoran. ¹¹ Gam ag uhŕilag bew ge, ag Yesus aregnah sorlagri qe ag agéagé marieg.

Yesus Aposel 12 Qere Kepŕaran

¹² Qe dimba sén os ge, Yesus Tiwurdi unuqurdi-gri qoukuwa tan. Teko

* 6:4 6:4 Tiwur am danahas ole gamlagwa Tiwurdi ofa mak danah

ge, tuqan usih qe unuqorelle dewew kuagrán. ¹³ Kuagrëw furuwa ge, nug bégur anew qagleg. Qagulweg ge, nug 12 qere keprárko ag wenlag aposel† maran. ¹⁴ Os ge wénih Saimon, Yesus wénih Pita katrán. Am Endru, nug Saimon kamag. Yems am Yon ole. Am Filip, Batolomiu ole. ¹⁵ Mati am Tomas ole. Am Yems nug Alfius nag. Am Saimon, nug Silot danah ameg qewari. ¹⁶ Am Yudas, nug Yems nag. Am Yudas Iskariotrer, nug dimba geisah Yesus keger ewlagwa mérig.

Yesus Danahas Doulag Patelle Am Kusqaran

¹⁷ Yesus Bégur 12 ole nuksi ge, nug wanko wan uřemba asko dian. Nug bégur kuřumnah ole deg. Am danahas kuřumnah Yudia atu kunumbari am Yerusalem taun qewari am Tair, Saidon ole řanwari qe kunum ole deg. ¹⁸ Ag nusig né dolagri am nug feřlagwa waře kusuqrigri ole uřiyeg. Danahas koulli nou sarew nou marak ole ge, Yesus kusqaran. ¹⁹ Yesusri gagragsak wanko danah kunum kusqaran, qeri danahas kuřumnah nug féru ořalagri seg.

O Duak Danah Olag Gamag Asdig

† 6:13 6:13 Danah os Yesus nugégé toqarko meř arew kekuak nusig séksi ateg ole qe. Aposel ge Yesusri meř danah. danah

²⁰ Yesus nug bégur piarko delle anaran, “Danah ag gei o duak dasi, ag olag gamag asar. Keřdi Tiwurdi kingdom ge asilag. ²¹ Danah ag gei laké dasi, ag olag gamag asar. Keřdi dimba Tiwur sew ag kutuk ospi meweg. Danah ag gei kunnessi dassi, ag olag gamag asar. Keřdi dimba ag imlag. ²² Ag Danah Bega dimlamdepeg, qeri séksi danah ag keger maressi uksi uksi aqsi am geřaressi am wenlag seweg nou mew ge, ag olag gamag asar. ²³ Ag asilag qere seweg pe, ag sén gewa gamlag asakwa olessi des. Keřdi qe noh asilag saw kappa ge nařinah. Algu alalgar profet‡ dilag ole qere seréw. ²⁴ Gam danah keřlag ole ag kug os pelag. Ag keke sew olag kena diakri iril oweg olele moran. ²⁵ Danah gei ke léksi koutursi, ag kug os pelag. Ag dimba laké aqardig. Danah ag gei imsi, ag ole geisah Tiwurdi uhřibak pelag. Dimba ag olag nou mew kuanak nař selag. ²⁶ Ag danah kunum binlag sumbeg ge, ag kug os pelag. Algu alalgar profet darmak dilag ole qere seréw,” eko anaran.

Keger Asilgar Dilag Olag Mousar

²⁷ Yesus doulag patelle anaran. “Gam ag né dasil dosi ole ag anarina. Ag keger

‡ 6:23 6:23 Tiwurdi né oko mariak

asilgar dilag olag mousar. Danah os kowol nouni sarweg ge, ag kowol kena sares. ²⁸ Ag danah os wittak nou marweg ge, ag Tiwur kořmorweg wittak kena marar. Am danah nouni sarweg ge, ag asilag unuqores. ²⁹ Danah os na siwen leis ge korew pe, leis ole buliwe korar. Am danah os lamen nasip ow ge, minwe kasuk nasip qe ole war, aw gagansi owen. ³⁰ Am danah os na kekeri kořmirew ge, na mor. Am danah os nasip keke ow ge, na buliko mirdigri wagé meka aw sewen. ³¹ Danah la ag kowol kena sarlagri olag nie qe sillah, ag ole qere sares. ³² Ag danah asilag olag mouse ole qe dilag ih olag mousew pe, oun ge ag danah kena eko anardig? Hipunin danah ag ole danah are asilag olag mouse ole qe dilag ih olag mouse. ³³ Am ag kowol kena danah os asilag sési ole qe dilag ih seweg pe, oun ge ag danah kena eko anardig? Hipunin danah ole ag kowol qere ih sési. ³⁴ Am ag danah keke marsi qe noh marlagri olele duessi marweg pe, oun ge ag danah kena eko anardig? Hipunin danah ole ag hipunin danah leilgar keke marsi qe ag keke noh olele bulieksi marlagri duessi marsi. ³⁵ Gam ag keger asilag dilag olag mousar am ag nouni aw sarweg. Ag keke mareksi am noh olagri aw dahmeweg. Ag qere seppeg ge, ag noh naři mardig am ag Tiwur Karannah bégur

dalag, keřdi nug danah nou am danah keke marew kena sam éksi pi ansi qe ole nouni pi sare. ³⁶ Ag danah dilag olag duar, Memlag Tiwur o duak nie ole qe sillah.”

Ag Leilgar Aw Kepřarweg

³⁷ “Ag danahas dilag kowol nou aw kepréssi am nou arweg. Qere seweg ge, Tiwur ole asilag qere sérig. Ag danahas kowol nou asilag noh olagri aw anweg. Qere seweg ge, Tiwur ole asilag qere sérig. Ag danah os nouni sarweg ge, hipunin asilag kusuqqeg, Tiwur ole asilag hipunin kusuqrig. ³⁸ Ag danah la qe keke mares am Tiwur geisah ag keke mardig. Geisah Tiwur keke yanew ambeko letewew mardig. Ag keke gane danah marsi qe sillah Tiwur ag ole mardig,” eko anaran. ³⁹ Anko ge, Yesus né tonak os ole amlagwa anan. “Danah os ameg gařu nug ameg gařu lia omaldigri olele te? Kawa, geisah a olele tolweksa mořwa nolas. ⁴⁰ Sulnir nug duak nusig duak morak danah nusig pi érde. Sulnir are nug duak morak danah nusig dowari duak kunum oko malako ge, duak morak danah nusig qe sillah bérig. ⁴¹ Areg na liap amegwa kinkak nagurnah de qeri aminna? Gam na amenwa ker masa naři de ge, pite dahmorna? ⁴² Na nagégé amenwa ker masa naři de ge pite penna am areg liap anorna, ‘Lal, da na

amenwa kinkak nagurnah de ge uril seina.' Na darmak gařanwa ih Tiwur dimlamdak danah! Na tatam na nagégé amenwa ker masa naři ge oka, amen kena mew aminka koutorka ge, na kinkak nagurnah liap amegwa de ge uripri olele."

Ker Am Mou Ole

⁴³ "Ker kena nug mou kena nie. Qe sillah ker nou nug mou nou nie. ⁴⁴ Danah ag ker mou tatam peksi ge, ker ge kena te, ker ge nou te ge ag dosi. Danah ag guřaw mou darér qoum olewari pi usi. Am ag peipé mou ker nagurnah qoum olewari pi tuqsi. ⁴⁵ Danah kena nug dahmak kena kuřum owa nie. Qeri nug kowol kena se. Qe sillah danah nou nug dahmak nou kuřum owa nie. Qeri nug kowol nou se. Keřdi nug dahmak nou owa ambak nie ge, kořewa bew ane."

Lo Fuakri Kowol Ařit

⁴⁶ "Keřdi ag dasil 'Nařinah, Nařinah,' éksi ansi, gam ag da kořel ospi dimlamursi? ⁴⁷ Danah os da gumirko doko, am da fal doko dimlamurdig ge, da kowol nusig ge mariwi ag dolag. ⁴⁸ Nug danah os lo fuan ge sillah. Tatam ge, nug moř pesorko oko, wandor lagko kétum qeko koutorko ge lo fuan. Dimba le kue neko lo ge yepian, gam qiakri olele kawa. Keřdi nug fuko koutoran. ⁴⁹ Am danah nug da fal doko pi dimlamde ge,

nug danah os moř oko, wandor diguwa kétum pi qak lo fuan ge sillah. Géri dimba lo ge le kue neko yepew ge, qiko neko ole kadurko nou meko koutoran," eko anaran.

7

Yesus Fan Kuriri Kekuak Nir Sew Pasaoran

¹ Sén Yesus nug danahas né gene marko malako ge, nug Kapernaum taunwa atan. ² Qewa ge, Romdi fan kuri danah nug kekuak nir os ole daré. Kuak nir qeri o naři nire ole ge waře meko mousdigri malwak nian. ³ Fan kuri danah nug Yesus qewa dian né ge doko ge, nug Yuda dilag kuri danah meřarew ateg. Ateksi ge, Yesus amegwa anweg uriko kuak nir nusig ge sew waře pasaurdigri anoreg. ⁴ Yesus dow a teksi gagragnah ere aneg, "Danah ge kenanah. Na kéhnurdipri olelenah. ⁵ Nug ig Yuda isanig o niew binag mak lo isanig fuan." ⁶ Géri Yesus ag ole ateksi, fan kuri danah ge loug mourak waneppeg ge, nug leigur os meřarew Yesusri né uksi ateksi ere aneg. "O nařinah, na aw kekuak naři sewen. Na da loul owa neripri olele kawa, keřdi da danah kenanah kawa. ⁷ Qeri da duina ge, da na gumirko wanakri olele kawa. Na gere denna am né ih anwe, dasil kekuak nir waře pasaorar. ⁸ Keřdi da ole danah wénih ole kekuak mire ge kallowa deina. Am da ole fan danah

os da kallolwa dasi. Am da usih os amegwa anina, 'Na eit,' eko anwi ge, nug ate. Am da la amegwa anina, 'Na doka,' eko anwi ge, nug do. Am da dasil kekuak nir qe amegwa anina, 'Na kekuak ene se,' eko anwi ge, nug qe se." ⁹ Sén Yesus né qe doko ge, danah qeri o meře mak peko wawtuřko ole o gamag asan. Asew ge, nug buliko danahas ameg naři dimlamdeg qe anaran, "Da ag anarina. Israel olagwa danah usih os o meře mak ere ole ospi pégin." ¹⁰ Qe dimba, fan kuri danah leigur meřarew ateg ge, bulieksi louw uriyeksi, kekuak nir qe ifil sew pasaoran peg.

Yesus As Qehřas Nag Os Mousew Buliko Qaqran

¹¹ Nagur dimba Yesus taun os wénih Nain qewa atan. Nug bégur am danahas ameg naři qe ole nug dimlamdeg. ¹² Nug atko taun ihřam naři qe mourak wanewew ge, danah mousak os mawessi dog. Danah mousak qe anig nug nag usih qe ih ole am nug as qehřas. Danahas ameg naři taun qewari asessi as qe ole arié dog. ¹³ Nařinah nug as qe peko ge, o naři dow, nug as qe amegwa anan. "Na aw kuanwen." ¹⁴ Qere anelle ge, unaka wanko danah mousak nian ole qarqar qewa eweg man. Eweg mew ge, danah qarqar maweg qe asessi deppeg, Yesus anan. "Nir geir, da anirina, na

as," eko anan. ¹⁵ Anew ge, danah mousak qe buliko asko delle ge, digumeko né marian. Yesus nir qe pařwew anig dow wanan. ¹⁶ Géri danahas kunum fařeksi nou méksi Tiwur binag meg. Ag aneg, "Profet naři os onigwa bé. Tiwur danah nusgur kehnardigri uríe," éksi aneg. ¹⁷ Danahas Yesusri né qe Yudia wanwa am atu lala talilorak nie qe kunumba mariweg tualan.

Yesus Am Le Luarak Danah Yon Ole

¹⁸ Yon nug bégur ag keke kunum dueg am peg qe nug amegwa anweg, nug békuř ařit urwatan. ¹⁹ Nug Nařinah ere kořmorlasri anew ates. "Na enan te Tiwur uriripri anan, kawa ig danah la te ameg ménig?" ²⁰ Sén danah ařit qe Yesus dow ateksa ge, amegwa anes. "Le Luarak danah Yon anew i na kořmirnitti gumdekřu uriah. Nug ere ané, 'Na enan te Tiwur uriripri anan, kawa ig danah la te ameg ménig?' " eksa kořmores. ²¹ Sén qewa ih Yesus danahas kuřum waře digu digu ole sew pasaoreg am koulli nou danah feřlagwari kuřum geřaran. Am danah amlag gařu ole kuřum sew amlag kena mew bulieksi amneg. ²² Am danah ařit qe amlaswa anan, "Bulieksa ateksa Yon keke piap am duap ole qe amegwa anes. Amlag gařu ge bulieksi aminsi, feřlag mousak ge bulieksi weisi, lepra danah ge feřlag

buliko pasaore, doulag itwak ge bulieksi né dosi, danah mousak ge bulieksi assi, am o duak danah ag Né Kena dossi. ²³ Am danah os o meře mak gagrag dewew da pi dimirdig ge, Tiwur nug wittak murdig.” ²⁴ Danah arit Yonri né oksa uries ole qe mundeksa atwes ge, Yesus digumeko danahas amlagwa Yonri anaran. “Ag awen danah kawawa keřnah pelagri Yon gumdeksi ateg? Ag ulas qawer os orwew ulle qe te pelagri ateg? ²⁵ Kawa ge, ag keř qewa pelagri ateg? Ag danah bala kena ole te pelagri ateg? Kawa, danah bala kena kena mési am danah keřlag ole qe king lougwa dasi. ²⁶ Gam ag keř pelagri ateg? Ag profet te pelagri ateg? Yo, da amlagwa anina. Nug profet la kunum erarak. ²⁷ Danah Yon eneri ih Tiwurdi Né yakwa ane. ‘Da dimba geisah mer danah dasil méwi atko na nom oko anuqko nasip ih bawardig.’ ²⁸ Da ag amlagwa anina. Yon nug danah wanwa dasi qe kunum erarak. Gam danah nug Tiwurdi Kingdomwa nagurnah de qe nug Yon erdak,” eko anaran. ²⁹ (Danahas kunum takis wak danah ole Yesusri né dueksi olag usihwa “Tiwur ge mangunah,” éksi dahmeg. Keřdi ag atweg Yon le luaran. ³⁰ Gam Farisi am Mosesri Ro duak danah ole Tiwur ag ih ismaran qe dimoreg, keřdi ag Yon le

luarak mineg.) ³¹ Yesus buliko anaran. “Da keř né tonakwanah os danahas geiri ismardil? Kowol asilag ge aregnah? ³² Ag nir nounu sillah. Kaw gamagwa dessi nir nounu la urwaressi dasi sillah. ‘Ig asilag dum dum yaltu ge, ag kasi sak minew. Am ig ginanig kuktu irtu, gam ag kuanak minew,’ éksi ansi. ³³ Le Luarak danah Yon nug urıyan am nug ke wain ole ospi leré. Qeri ag aneg, ‘Koulli nou nug féruwa de.’ ³⁴ Danah Bega urıyan, nug ke wain ole lewew, ag ansi, ‘Danah ene pes. Nug ke wain ole narınah lelle de. Nug takis wak danah am hipunin danah ole liam patak dasi,’ éksi ansi. ³⁵ Gam danahas Tiwurdi duak usi ole kowol asilagwa ismigi ge, duak qe keke merenah,” eko anan.

Hipunin As Yesus Féğ Gořenwa Wařwuran

³⁶ Farisi os nug Yesus ole ke lelasri anew ge, Yesus Farisi qe lougwa atko ninaqırko dian. ³⁷ Hipunin as os taun qewa daré. Nug Yesus Farisi qe lougwa ke lelle dian né qe doko ge, nug gořen murdig kenanah ole siné ambak oko urıyan. ³⁸ Sén nug wanko Yesus dimugwa féğ mourak kunnelle dewew ge, amrı gogořko noko Yesus féğ lourew ge, kuri urugwa urťian. Urťielle ge féğ kis morko gořenwa féğ wařwuran. ³⁹ Farisi Yesus nug lougwa urıyan ole qe, kowol qe peko ge, owa ih anan. “Danah uni

nug profetnah wen, nug as uni keŕ as nugnéwa eweg me qe dolo am nug as qe hipunin as qe ole dolo.”⁴⁰ Géri Yesus nug danah qeri dahmak doko ge, amegwa anan, “Saimon, da né os ole na amenwa andildi.” Anew ge, Saimon anan, “Aria, duak marak danah, né nasip ge an.”⁴¹ Yesus anan, “Danah arít os ateksa danah qarég ole qe dowa waneksa qarég os anwes matan. Danah os ge anew 10,000 kina moran am danah os ge anew 100 kina ih moran.”⁴² Danah arít qe qarég qe buliko morakri olele kawa, géri danah nugnéwa qarég os ole qe nugégé kug asilas qe duew doug kation. Qeri danah arít qe olaswa oun nug danah qe o kunum ole murdig?”⁴³ Saimon anan, “Arté, danah qarég naŕi wan ole qe.” Yesus amegwa anan, “Né noh nasip qe mangu.”⁴⁴ Am Yesus buliko as qe peko delle ge, Saimon amegwa anan. “Na as ene pena te? Da na lout owa ném, am na da fél isdilri le ospi miŕam. Gam as ene ge nug amŕiwa fél uhŕu oko am kuri uŕugwa uŕtié.”⁴⁵ Na da kis ospi miŕam. Gam sén da owa ném am uŕiyew geisah e patak as ene da fél bulibuli kis moré.”⁴⁶ Na ig kounigwa da kurulwa oliw goŕen nagur ospi waŕwuram, gam as ene goŕen muŕdig olewa da fél waŕwuré.”⁴⁷ Qeri da na amenwa anina. Nug o naŕinah miŕe, qeri da

hipunin nusig kuŕumnah kusqém. Gam danah os nug hipunin nagur se eko ane qe kusuqwi ge, nug o nagur ih miŕe.”⁴⁸ Qe dimba Yesus as qe amegwa anan, “Hipunin nasip kusqém.”⁴⁹ Danah nug ole ke lessi deg qe agégé nug koŕmorew wane morew duak séssi aneg, “Danah ene ounnah qeri nug hipunin kusqé?”⁵⁰ Yesus as qe amegwa anan, “Na dasil ot meŕe mé qewa buliko wirém! Na aska ot kenawa ih eit,” eko anan.

8

As Os Yesus Dimlamdessi Weiyeŕ

¹ Qe dimba nagur os dessi ge, Yesus taunwa am kappa ole weiyelle Tiwurdi Né Kena kusuko anan. “Tiwur danahas nusgur dilag king delle gumardigri sén uŕiyé.” Nug Béŕur 12 qe am as os ole aŕié ateg.² As qe tatam Yesus koulli nou férlagwari geŕaran am waŕe ole deppeg sew pasaoreg. Os ge wénih Maria taun Makdalari. Tatam Yesus koulli nou 7 qere féruwari geŕaran.³ Am Yoana, nug gému Kusa ge Herod loug qeri kuakri kuri danah. Susana am as la kuŕum os ole ateg. As qe ag asilag kekewa Yesus béŕur ole kehnareg.

Danah Ke Saŕeg Touŕakri Né Tonak

⁴ Danahas kuŕumnah taun lalawari uŕiyessi Yesus dowa qagleg. Qagulweg ge,

Yesus né tonak os amlagwa anan. ⁵ “Danah os atko dara ke sařeg touran. Nug touřelle atewew ge, ke sařeg os ihwa tolweg. Tolwessi neweg ge danah tapareg am kunum é diareksi lareg. ⁶ Am ke sařeg os ge wan qarqar olewa tolweg. Tolweksi qařa beg, gam wan qe le ole kawa, géri ke qařa wagam kawa ole meireg. ⁷ Am ke sařeg os ge meř qoum ole gamlagwa tolweg, géri arié béksi meř qoum ole ke qařa tonarweg meireg. ⁸ Gam ke sařeg os ge wan kenawa tolweg. Ag béksi mou kuřumnah nieg. Mou ge 100 erđak qere.” Yesus qere anko ge uruko anan, “Danah oun os doug né duakri ole dew pe, né ene doko koutorar.” ⁹ Yesus nug bégur né tonak qe diguri kořmoreg. ¹⁰ Géri nug anan, “Tiwurdi Kingdomri duak qe algu lariaak daré, gam gei nug sew ag duak lugmak qe dosi. Gam, danahas lala qe duak lugmak qe da né tonakwa anarina. Qeri Né yak qe mou bérig. ‘Ag aminsi gam ospi peweg. Am né qe dosi gam digu ge olag ospi mourew,’ ” eko anan.

Ke Sařegri Né Tonak Digu

¹¹ Yesus anaran, “Né tonak ene digu ge ere, ke sařeg ge Tiwurdi Né. ¹² Ke sařeg os ge ihwa tolasi, qe ge danah né dosi gam dimba nou memeg doko né qe olagwari o. Keřdi nug qere sew ag olag meře pi mew

ge, hipunin asilag noh ospi éřurweg. ¹³ Am ke sařeg os wan qarqar olewa tolweg ge, danah né qe dueksi uksi olag gamag ase. Gam ag ke qařa diri wan kunuk pi no sillah. Qeri ag olag meře mak sén kutuk ih de, gam qepiak uriyewew ge, ag tolas. ¹⁴ Am ke sařeg os meř qoum ole gamlagwa tolasi qe sillah ge, danah né dossi gam ag sén kuřum asilag kug kowol kowolri dahmési, ag wan ewa kehlak ole am o gamag asakwa dalagri, dahmak qe Tiwurdi Né tone. Qeri ag olag meře mak mou ole kawa. ¹⁵ Am ke sařeg wan kirag olewa tolwe qe sillah ge, danah olag kena am dahmak mangu ole Tiwurdi Né dueksi gagrag orwessi, am ag olag meře mak gagrag dewew mou kuřum nisi.”

Lam Wa Kallowa Pi Tonsi

¹⁶ Yesus buliko né marian. “Danah os lam kamutko wawa pi tone am qarqar kallowa pi me. Kawa, nug karan eisew nie. Qeri danah lo owa nuksi ge, sarmer qe pelag. ¹⁷ Keř keř lugmak dasi ge, dimba Tiwur ambo mérig. Am keř keř tonak ge, dimba qe ole ambo mew dolag. ¹⁸ Qeri dosi koutores. Danah are nug né doko orwe ge, Tiwur sew nug o mourew geisah naři qere murdig. Gam danah are nug né pi duelle ‘da duina,’ eko ane ge, nug nagur os due qe Tiwur buliko kařurdig,” eko anan.

Yesus Anig Am Kamgur Ole

¹⁹ Sén qewa Yesus anig am kamgur ole pelagri uriyeg. Gam danah kuřumnah qagleg, qeri ag nug gumdeksi unaka wanakri olele kawa. ²⁰ Danah os Yesus anoran, “Na anin am kampar ole peirlagri dimdim ewa aséw dasi.” ²¹ Yesus buliko anaran, “Da anil am kamlar ge danahas Tiwurdi Né dueksi am dimlamursi ole ge,” eko anan.

Yesus Ulas Naři Anew Toran

²² Deř os Yesus bégur dilag anan. “Doweg, ig le koře kawa séku leis uwa atet.” Qere anew ge, kuh oswa olessi téksi ateg. ²³ Kuhwa atessi ge, Yesus usameg new nian. Niewew ge, ulas gagrag le koře kawawa bew, le koř koř naři qeko kuhwa noko ambew kug naři owa deg. ²⁴ Yesus bégur gumdessi wanessi qaqressi aneg. “Danah naři, Danah naři, ig torinigri sétu.” Géri Yesus asko ulas kořkoř uhři naři ole gařa matew tores. Torwes ge, le ameg mousko nian. ²⁵ Yesus bégur dilag anan, “O meře mak asilag arewa de?” Gam ag fařessi dahmak kuřum uksi agéagé aneg. “Danah ene oun? Nug ulas le ole gagrag anatew, né nusig dimlamdap,” éksi aneg.

Yesus Koulli Nou Danah Os Féruwari Gerđan

²⁶ Yesus bégur ole kuhwa ateksi Gerasa waneg. Atu qe Galili le koře kawa nie qe

séku leis de. ²⁷ Yesus kuh minko pitiyewew, danah os féruwa koulli nou ole taun os owari nug Yesus gumurko duan. Sén welah nug lamen ospi tagré am louw ospi daré, nug matmatwa ih niré. ²⁸⁻²⁹ Sén kuřum koulli nou danah qe pi pařwurdé. Danah kuřum nusig sansan amneksi koutordéw, am nug sen darér olewa qagdéw. Gam nug sen darér ole qe tatřardé. Koulli nou souorew awen danah kawawa atté. Danah qe Yesus peko ge, qalko urwelle unaka fégwa wanwa qere tolwan. Tolwew peko ge, Yesus koulli nou danah qe pařwurdigri gagrag anoran. Qeri nug fag gogwa uruko anan, “Yesus, na Tiwur Karannah Bega. Na keřdi dagrowa uriyam? Da gurak aw mirwen.” ³⁰ Yesus kořmoran, “Na wénim oun?” Eko anew am nug anan, “Ameg naři.” Keřdi koulli nou kuřum nug féruwa nog. ³¹ Koulli nou qe qagleksi urweksi Yesus bulibuli kořmoreg. “Na ig aw geřigwe moř aminweg atko kutuk mewa nuhut.” ³² Fo kuřum qouku nagur os qewa ke lessi deg. Qeri koulli nou qe ag Yesus dowa qagleksi urwessi aneg. “Na ig minigwe fo uni feřlagwa wanet.” ³³ Am Yesus anew koulli nou ag danah qe mundeksi fo feřlagwa waneg. Fo qe gueksi waneksi béwa tolweksi le koře kawa qewa nuksi le léksi mouseg. ³⁴ Fo gumarak

danah ag kowol qe peksi kum atessi taunwa am kaw lalawa ole mariweg tualan. ³⁵ Géri danahas ag keř ban qe pelagri taun pařweksi ateg. Ateksi Yesus dowaneksi ge, danah koulli nou pařwureksi ateg qe, dahmak qaorew am lamen tako Yesus nohwa ninapiřko dewew pessi fařeg. ³⁶ Danah os keke qe amlagwa peg ole ge, ag danahas la danah koulli nou ole dewew Yesus areg sew kena man qeri mariweg dueg. ³⁷ Géri danahas kunum Gerasa atu qewari Yesus minarko attigri sinanah anoreg. Keřdi ag olag nouninah fařan. Géri Yesus buliko attigri kuhwa olko tan. ³⁸ Danah koulli nou pařwureg ole qe Yesus nuqurko anan, “Da na ole atnit,” eko anan. Gam Yesus anew buliko atewew ge anoran. ³⁹ “Na bulika kawanwa atka, Tiwur keke kunum nasip san qe mariwe dues.” Géri danah qe taun kunumba atko danahas amlagwa Yesus keke kunum san qe kusuko marian.

Yesus Nir Asin Mousak Qaqran Am Waře As Sew Pasaoran

⁴⁰ Yesus buliko le koře kawa séku leis atewew ge, danahas kunum nug felqoreg. Keřdi ag kunum nug ameg méksi deg. ⁴¹ Sén qewa danah os wénih Yairus nug Yesus gumurko wanan. Nug Yuda dilag binag mak lo osri kuri danah. Nug Yesus nohwa gatewa yako gagrag nuquran. “Na da

ole loulwa atnit olele te?” eko kořmoran. ⁴² Keřdi nug nir as usihnah ole am nug makař nusig 12 keke qere qe mousdig malwak nian. Géri Yesus wanko atewew ge, danahas ameg naři duksi nug omorweg ateg. ⁴³ Am as usih os nug makař 12 qere as dilag waře qe ole daré. Am nug kéhu kunum dokta agop malwan. Gam danah ounté os sew waře nusig ospi pasaoran. ⁴⁴ As qe Yesus dimugwa doko, Yesusri lamen noh orřwew ole waře nusig usihri kawa man. ⁴⁵ Yesus kořman, “Oun da urřwilé?” Eko anew, kunum aneg. “Ig kawa, ig kawa.” Éksi anweg Pita anan, “Danah naři, danahas ameg naři na omiressi qataoréw dasi.” ⁴⁶ Gam Yesus anan, “Ounte da urřwilé. Keřdi da gagragsak dasil os pařwilko atewew dahmorém.” ⁴⁷ As qe duan ge, nug lugumdigri olele kawa. Géri nug sahréle Yesus nohwa doko wanwa duk noko, danahas kunum nolagwa nug keřdi Yesus dowaneweg man qe kopatko amegwa anan. “Waře dasil ge usihri sew pasaoré.” ⁴⁸ Yesus as qe anoran, “Nir dasil, na dasil ot meře mé qewa na férún sew kena mé. Na aska ot kena ih dewew eit.” ⁴⁹ Yesus né marielle dewew, Yuda dilag binag mak lori kuri danah Yairus qe lougwari meř danah os urřyan. Urřiko ge, Yairus anoran, “Na ařen ge irřil mousé. Na duak marak

danah aw kug morwen.”
⁵⁰ Gam sén Yesus qe doko ge, Yairus amegwa anan, “Na aw fa’wen. Na dasil ot me’ere mew, geisah a’ren séwi kena mérig.”
⁵¹ Yesus nug Yairus lougwa atko ge, nug danah la os minarew nug ole lo owa pi nog. Gam Yesus nug, Pita, Yon, Yems, am nir as qe memeg anig ole ag ih owa nog.
⁵² Danahas kunum nir as qeri masiepppeg ge, Yesus amlagwa anan. “Ag aw masiweg. Nir qe pi mousé, nug usnie,” eko anan.
⁵³ Anew ge, ag dueg nir qe íril mousan, qeri ag nug imdeg.
⁵⁴ Gam Yesus lo owa noko nir qe ewegwa o’rako qalko anan, “Nir dasil, na as.”
⁵⁵ Anko malwew, nir qeri koulli buliko féruwa úriyew foumak oko usihri asan. Yesus amlagwa anan, “Ag ke os morweg lar.”
⁵⁶ Nir qe memeg anig ole dorlas new ole fa’es. Gam Yesus gagrag anatan. “A ounté os aw keke eneri amegwa anwes,” eko anan.

9

Yesus Béгур 12 Qe Kekuak Maran

¹ Yesus Béгур 12 qe úrwarew dog. Doweg ge, nug koulli nou kunum ge’arlagri am wa’ere kowol kowol ole kusqarlagri gagragsak am kuakri wittak ole maran.
² Am nug Né Kena “Tiwur king delle

danahas nusgur gumardi-gri” qe kusulagri am wa’ere danah seweg pasaorlagri ole anew ateg.
³ Yesus amlagwa anan, “Ag weiyakri sénwa kité os aw oweg. Ag durqak sokét, baram, ke, qarég am siot a’rit os aw oweg.”
⁴ Ag lo arewa diarweg nuksi pe, ag qewa ih dessi ole taun qe mineksi ates.
⁵ Gam danahas ag fel pi qaressi diareksi loulagwa pi atweg pe, ag taun qe mineksi atessi ge félagwari usur qeqlessi ates. Ag kowol qe peksi ge, kowol nou asilag qe olag mourdig.”
⁶ Géri Yesus Béгур ateksi kaw kunumba weiyessi, Né Kena kuswessi am wa’ere danah atu kunumbari seweg pasao’reg.

Herod Yesusri Katat Qan

⁷ Herod Antipas nug Galili dilag king. Nug Yesus Béгур ole kuak seg qeri né doko katat qan. Kerdi danah os ge aneg, “Le Luarak danah Yon buliko siran.”
⁸ Am os ge aneg, “Elaisa gumarko duan.” Am la os aneg, “Profet* os algunah mousan qe buliko siran.”
⁹ Géri Herod anan, “Da anwi Yon fag íril kot’reg. Gam danah qe ounnah nusig kuak am kowol ole mariweg duina?” eko anan. Géri nug Yesus perigri dahman.

Yesus 5,000 Danah Ke Maran

¹⁰ Yesusri aposel† bulieksi úriyeksi keke kunum seg

* 9:8 9:8 Tiwurdi né oko mariak danah † 9:10 9:10 Danah os Yesus nugégé toqarko anew kekuak nusig séksi ateg ole qe. Aposel ge Yesusri me’er danah.

qeri nug amegwa marieg. Qe dimba ge, nug omlarew, danah la minareksi ag agé kaw os wénih Betsaida qewa ateg. ¹¹ Gam danahas dueksi ge, nug dimlamdeksi ateg. Ag nugnéwa atweg ge, nug felqarelle Tiwur king delle danahas nusgur gumardigri né qe kuswew dueg. Am danah os waře ole qe sew pasaořeg. ¹² Kem noko tueh manew ge, Béгур 12 qe duksi Yesus amegwa aneg. “Na danahas anwe atares. Ag kaw nari am kaw nounu unaka dassi qewa ateksi niak awen am ke lakri os ole maries. Awen ig datu ole ene ge danah kawa,” éksi aneg. ¹³ Anweg ge, Yesus buliko anaran, “Ag agégé ke mares.” Gam Béгур 12 qe aneg, “Ig ke kuřum ole kawa, beret tanig ole am kaké ařit ole ih de. Ig atektu danahas ene kunum dilag ke daren te méktu marnig?” ¹⁴ (5,000 danah keke qere qewa deg.) Yesus nug béгур amlagwa anan, “Ag danahas amlagwa anweg, qaglak ameg 50, 50 qere qagleksi des.” ¹⁵ Yesus nug anan sillah, béгур né nusig dimlamdeksi anweg danahas kunum ninapifessi deg. ¹⁶ Yesus beret tanig ole am kaké ařit qe ole oko saw karan amnelle kena sam elle keru unuqoran. Malako ge, temelle béгур danahas agop panilagri maran. ¹⁷ Géři danahas kunum ke léksi olag ořwew

ge, ke big big minareg qe Yesus Béгур diareksi kaleg 12 qere yanareg.

Pita Né Kopatko Yesus Ge Kristus Eko Anan

¹⁸ Deř os Yesus béгур ole dessi am nug nugé kepařko unuqorewew, am béгур gumdeksi doweg kořmaran. “Danahas dasil ge oun éksi ansi?” ¹⁹ Nug béгур aneg, “Os ge Le Luarak danah Yon éksi ansi. Am os ge Elaisa éksi anirsi. Am la os ge profet os algunah mousan qe buliko siran éksi ansi.” ²⁰ Anweg ge, Yesus béгур kořmaran, “Gam ag ge dasil oun éksi ansi?” Pita anan, “Na Tiwurdi Kristus[†], Tiwur danahas nusgur bulika diardipri toqiran.” ²¹ Géři né qe danah os amegwa anwegri Yesus béгур gun qaran.

Yesus Mousko Am Buliko Asdigri Anan

²² Am Yesus amlagwa anan, “Meřenah, danah Bega geisah gurak kuřum morlag. Kuri danah am pris dilag anqak danah ole am Mosesri Ro duak danah ole geisah nug dimoreksi, am qeweg mousdig. Gam deř kiamba ge buliko sirdig.” ²³ Anko ge, buliko danahas kunum anaran, “Danah os da dimlamifdigri dew ge, nug nugégé nusig sak am o mourak ole qe dimorko, am ker mawanak nusig deř dorog mouko ge da

[†] 9:20 9:20 Kristus ge Mesaia. Tiwur danahas nusgur buliko diardigri danah toqoran.

dimlamr̄ar. § 24 Danah os nug nugégé nusig sak am o mourak ole dimlamurko ge, nug foumak ospi ow. Gam danah os nug da dimlamr̄elle mousko ge, foumak oko sansan darig. 25 Am danah nug wan kénih ole delle mousew ge, keke ge ospinah kéhnurweg. 26 Am danah os dasil am né dasildi ur̄a new pe, sén Danah Bega nug nusig kamsahlak gun olewa am Memegriwa am Tiwurdi doup gun dilagwa ur̄irig ge, danah qeri ur̄a nérig. 27 Da ag amlagwa meřenah anina. Danah os ewa aséw dasi ge, geisah ag pi mousak, Tiwur king delle danahas nusgur gumarewew pelag,” eko anan.

Yesusri Kamsahlak Gun Ole Béгур Peg

28 Yesus né qe anko malwew, der̄ 8 keke qere atew ge, nug unuqurdi-gri Pita, Yon am Yems ole diarew qoukuwa teg. 29 Nug unuqorelle dewew ge, nug kitru ge buliko sonrewew am nug féru bala qe ole ampír sillah sonran. 30 Usihri danah ar̄it Moses Elaisa ole kamsahlak gun olewa dowes nug ole né marieg. 31 Yesus nug wagam kawa Tiwurdi Né dimlamurko olele morko Yerusalem mousdigri danah ar̄it qe ole marieg. 32 Pita leikuř ar̄it qe ole amlag kug morew nilag seg. Gam sén

amlag fou mew ge, danah ar̄it qe am Yesus ole aseksi kamsahlak gun ole qe owa deppeg piareg. 33 Danah ar̄it qe Yesus mundeksa atepes, Pita Yesus amegwa anan. “Danah nar̄i, ig ewa dalom ge kena. Ig laklak kiam os sénig, os nasip am os Mosesri, am os Elaisari.” (Pita nug o pi mourak né qe anan.) 34 Nug né qe anewew ge, fur os doko tonarew owa dessi olag fařan. 35 Tiwur fur owa anan, “Ene nir dasilnah. Da nug algu toqurin. Ag nug fag duessi dimlamdes.” 36 Tiwur né qe anko malwew ge, ag Yesus nugé dewew peg. Am béгур ag sén qe keke peg qeri né ospi marieg, asilag dahmakwa ih dian.

Yesus Nir Os Koulli Nou Ole Sew Kena Man

37 Der̄ qe dimba ge, Yesus am béгур kiam qe ole qoukuwari noppeg, danahas ameg nar̄i ur̄iyeksi Yesus ihwa peg. 38 Am danah os danahas ameg nar̄i qe olagwa ur̄wan, “Duak marak danah, na da nal ene peripri nuqrina. Da nir danah usihnah enan ih. 39 Koulli nou os nir qe owa now ge, gelelle ole usihri atko kauřko kawqelle sihru newew nie. Koulli nou qe nir ofeř ospi pařwe, am féru sew nounah me. 40 Da na begpar koulli nou ene geřurlagri nuqarin, gam ag sakri olele kawa.” 41 Géri

§ 9:23 9:23 Ker mawanak mouko dimlamdak digu ge, nugégé nusig sak am o mourak dimorko am kug mawelle Tiwur dimlamdakri kowol.

Yesus anan, “Danahas geiri, ag olag meře mak ole kawa am olag ge mangu kawa. Sén gane da ag ole dettu olag meře mérigri amlag méril?” elle ge anan, “Nir nasip oka ere do,” eko anan. ⁴² Nir nag qe Yesus gumurko dowew ge, koulli nou qe touřew atko wanwa qeko kawqelle nian. Géri Yesus koulli nou qe nir qe pařorigri gařa morko geřdan. Geřurko nir qe sew kena mew ge, buliko memeg moran. ⁴³ Géri danahas kunum Tiwurdi gagragsak qe peksi dorlag nan. Danahas qe Yesus keř keř kunum san qe peksi dorlag new seppeg, nug bégur anaran. ⁴⁴ “Né andil seina, ene dossi koutores! Danah os Danah Bega keger ewlagwa mérig,” eko anan. ⁴⁵ Gam bégur ag né qe olag pi mouran. Tiwur sew né digu qe larian, qeri ag olag ospi mouran. Am ag Yesus né qeri kořmorakri fařeg.

Oun Nug Naři?

⁴⁶ Yesus bégur ag kořlagwa ih oun nug naři asilag qeri kareg. ⁴⁷ Yesus dahmak asilag qe doko ge, nir nag os oko doko nug dianwa man. ⁴⁸ Meko ge, nug amlagwa anan. “Oun os nug da wénilwa nir nag ene sillah oko dahmore ge, nug da dahmire. Keřdi nug dasil o meře me qeri qere se. Am oun nug da wiře ge, nug Tiwur da anew uřiyin qe o. Géri oun ag kallolagwa de qe, nug naři.”

⁴⁹ Yon anan, “Danah naři, ig danah os na wénimba koulli nou geřarew pektu anurhut minan. Keřdi nug ig ole pi weitu.” ⁵⁰ Gam Yesus anaran, “Ag nug aw dagorweg. Oun nug ag keger pi mare ge, nug ag leilag,” eko anan.

Samaria Yesus Kawlagwa Nuakri Mineg

⁵¹ Yesus wan minko saw kappa attigri sén durmurew ge, Yesus o kunum morko ole Yerusalem attigri atan. ⁵² Am nug danah os meřarew anqeksi kaw os Samaria qewa keke dalagri am ke lelagri qe kunum bawarlagri ateg. ⁵³ Gam danah kaw qewari ag dueg ge nug Yerusalem attigri atan qeri Yesus uksi loulagwa atakri mineg. ⁵⁴ Yesus békuř Yems Yon ole, a né qe dueksa anes. “Nařinah, na ot niew pe, i kew saw karandi anhuř ařelle neko danah uni ařardig!” eksa anes. ⁵⁵ Gam Yesus buliko ařit qe gařa matan. ⁵⁶ Qe dimba ge, Yesus bégur ole kaw lawa ateg.

Yesus Dimlamdakri Kowol

⁵⁷ Ag ihwa ateksi ge, danah os Yesusri anan, “Na arewa attip ge, da na dimlamirwi ole atnit.” ⁵⁸ Yesus danah qe kořewa oko anan, “Qé déguř ag wan ořewa nisi am é ag teřlag ole. Gam Danah Bega nug ge niakri lo ole kawa.” ⁵⁹ Nug danah la os amegwa anan, “Na doka da dimlamiř,” eko anan. Gam danah qe anan, “Nařinah, na minwe tatam ge da

atko mem mousan suhumko am dimlamirdil,” eko anan. ⁶⁰ Yesus danah qe amegwa anan, “Danah mousak qe minwe agé agé mousak leilgar qe suhmares. Gam na atka Tiwurdi Kingdomri* Né kusu.” ⁶¹ Am danah la os Yesusri anan, “Nařinah, da na dimlamirdil. Gam tatam na minwe da louw atwi ke séktu léktu ewlag ořako am na dimlamirdil.” ⁶² Gam Yesus danah qe anoran, “Danah palangis digumeko tořelle am sansan nug buliko dimugwa amne ole qe, nug Tiwurdi Kingdom owa kekuakri olele kawa,” eko anan.

10

Yesus 72 Danah Nusgur Kekuak Marew Ateg

¹ Dimba ge, Nařinah nug Béğur 12 qe am danah la os ole kepřarko 72 danah qere anew awen are nug attigri ole qe kunumba ařit ařit nug noh uksi anqeksi ateg. ² Nug ere eko anaran, “Ke lep kuřum nie, gam ke lep qe tuqakri kuak danah kuřum kawa. Qeri ag dar memegri unuqorweg nug sew kekuak danah la os ateksi dar nusigwa ke lep tuqlag. ³ Ag ates! Da séwi ag sipsip nagur sillah qé déguř olagwa atsi. ⁴ Ag asilag qarég yanakri sogot am keke yanakri baram aw oweg, am félag gařa la os ole aw diarweg. Am ag

ihagwa danahas piareksi ge, aw félag yeksi né marweg. ⁵ Ag danah os diarko lougwa now ge, ere tatam anares, ‘Tiwur o maror ag ole dalag.’ ⁶ Am lo qe memeg o kenawa diarew pe, Tiwurdi kena sak lo qewa darig. Gam pi diarew pe, Tiwurdi kena sak lo qewa pi dew buliko agrowa durig. ⁷ Ag lo qewa ih deppeg keř marlag ge, lessi des. Keřdi kekuak danah nug kekuak nusig qe noh urig olele. Ag lo oswari am oswa aw weiweg. ⁸ Ag taun oswa noweg, felqareksi diareksi am keř ke bawresi marlag ge, ag les. ⁹ Waře danah os taun qewa dalag ge, ag seweg waře pasaorar. Am ag Tiwurdi Kingdom* agrowa uřiyé unaka de qe anweg dues. ¹⁰ Gam ag taun oswa noweg fel pi qarweg ge, taun qeri ihwa aseksi dessi anes. ¹¹ ‘Ig fénigwa usuř asilag taunwari de, qe ag pelagri qeqalhut ne. Gam ag dahméksi koutores: Tiwur danahas nusgur dilag king delle gumardigri sén unaka de.’ ¹² Da ag amlagwa anina, Tiwurdi uhřibak deřwa geisah Tiwur Sodom kaw kug moran qe eřdak ag kug naři pelag. ¹³ Korasin am Betsaida ole ag olag duak! Ag geisah kug naři pelag. Keřdi da mirakel os agnéwa sein qe Tair Saidon ole selem ben, ag algu olag bulilo. Ag asilag hipunin

* 9:60 9:60 Tiwur danahas nusgur dilag king delle gumare.

* 10:9 10:9 Tiwur danahas nusgur dilag king delle gumare.

qeri nouni dueksi neko aqarew am usuŕ luessi dessi olag bulilo. ¹⁴ Gam Tiwurdi uhr̄ibak deŕwa Tair Saidon ole kug olas qe eŕdak ge ag olag. ¹⁵ Am Kapernaum, ag te os Tiwur ag binlag karan sumdig? Kawa. Ag ole Tiwur touŕarew nuksi paral melag,” eko anan. ¹⁶ Am Yesus buliko anaran, “Oun os nug asilag né dorig ge, nug dasil né due. Am oun os nug ag dimardig ge, nug da dimiŕe. Gam danah da dimiŕe ge, nug Tiwur anew da uŕiyin qe dimore,” eko anan.

72 Keuak Danah Bulieksi Uŕiyeg

¹⁷ 72 danah qe bulieksi uŕiyeksi olag gamag asakwa aneg. “Naŕinah, ig na wénimba anektu, koulli nou geŕarhut né dueksi ateg.” ¹⁸ Géri Yesus koŕlagwa oko anaran, “Da Satan saw karandi ampiŕ sillah usihri tolwewew pégin. ¹⁹ Ag dues. Da ag mat am kap-piép ole qaŕlagwa tapeksi oŕollarlagri gagragsak marin. Am kegeŕ asilagri gagragsak kunum qe seweg kéwsi kawa mérigri gagragsak marin. Qeri ag kité ospi sarew nou meweg. ²⁰ Gam koulli nou ag koŕlag dimlamdeg qeri ag aw olag gamag asew. Ag Tiwur saw kappa ir̄il wenlag yan qeri olag gamag asar.” ²¹ Sén gewa Koulli Gun nug sew Yesus o gamag asew anan, “Mem, na wan saw oleri Naŕinah. Da binam sumina.

Keŕdi na keke ene duak danah dowegri sewe larian, gam danah nir nounu sillah ge ismaren. Meŕenah, Mem na ere séripri ot nian ole qe sen. ²² Mem gagragsak am keke kunum ole da ewelwa man. Tiwur Bega ge oun qe ounté ospi due, gam Mem ih due. Am Mem ge oun qe ounté ospi due, gam Bega ge due. Am danah are da kepr̄arko ismarin qe ag ole Mem dossi.” ²³ Géri Yesus buliko bégur ih dolagri anan, “Danah keke ag pesi ole qe pesi, qe ag olag gamag asdig. ²⁴ Da ere anarina keŕdi ge, algu profet am king kuŕum ole keke ag gei pesi ole qe pelagri seg, gam ag pi peg. Am né ag gei dossi ole qe dolagri seg, gam ag ospi dueg,” eko anan.

Samaria Danah Kenari Né Tonak

²⁵ Deŕ os Ŕo duak danah os asko Yesus sew perigri seko koŕmoran. “Duak marak danah, da areg seko ge foumak sansan diakri uril?” ²⁶ Géri Yesus koŕewa oko anan, “Mosesri Ŕo yakwa keŕ eko ane? Na dona ge areg?” ²⁷ Géri danah qe anan, “Ŕo ane: Naŕinah nasip Tiwurdi ot mousew, ot kunum ole, kitton ole, gagragsak nasip kunum ole am dahmak nasip kunum ole Tiwur mor. Am na nagégé nasip ot mouse qe sillah liapri ole qere ot mousar.” ²⁸ Géri Yesus danah qe koŕewa oko anan, “Na meŕe anam. Na

qere seka ge, foumak owe Tiwur ole sansan dalas,” eko anan. ²⁹ Gam danah qe nug da mangu elle qeri Yesus kořmoran. “Am oun ge da lial?” eko kořmoran. ³⁰ Am Yesus amegwa anan, “Danah os Yerusalemri noko Yeriko atewew, yawsen danah ihwa orweksi féru balla nusig kunum urdeksi keke nusig kunum kařdeksi, mouřaweg ameg tariew niewew ateg. ³¹ Niewew ge, pris† danah os ih qe dimlamurko noko nug danah qe peko ge, ih séku leis wanko nanřurko atan. ³² Qe sillah, Liwai‡ danah os ole qere noko peko, nug ole ih leis wanko nanřurko atan. ³³ Gam Samaria danah os ih unari uriko danah qe nianwa doko qere peko ge, o duan. ³⁴ O dow ge, nug danah qe gumurko wanko isiwa gořen am wain ole gogřew now isi witan. Malako ge, danah qe sumew donki nusigwa tew oko řo lo oswa atko qewa meko guman. ³⁵ Kuagřew ge, qarég silwa arit ipko řo lo gumak danah qe morko anan. ‘Na danah ene dahmoreppe da buliko uriko ge na qarég gane tourdip qe noh méřil,’ eko anan.” ³⁶ Am Yesus řo duak danah qe kořmoran, “Danah kiam ene na dona ge danah are ge yawsen danah mouřweg ole qe lia?” eko kořmoran. ³⁷ Kořmorew ge, nug kořewa

oko anan, “Danah o dow kéhnuran ole qe.” Géři Yesus danah qe anoran, “Na ole atka qere ih se,” eko anoran.

Yesus Mata Maria Ole Pi-attig Atan

³⁸ Yesus bégur ole Yerusalem atlagri atessi kaw oswa waneg. Yesus kaw qewari as os wénih Mata qe lougwa atew, Mata felqoran. ³⁹ Nug mageg os wénih Maria, qe Nařinah fégwa delle né marian qe duelle dian. ⁴⁰ Gam Mata ge ke bawrakri sik nou qan. Géři nug doko Yesusri anan, “Nařinah, da magel ene minřew kekuak dagé seina, qe na areg dona? Na anwe nug ole da kéhniřar,” eko anan. ⁴¹ Gam Nařinah anoran, “O Mata, na keke kuřumřinah ot sik qew ot nou me. ⁴² Gam keke usihri qe na kutuk. Qeri Maria nug keke kenanah kepařko se. Am ounté os nug keke kepré qe pi kařdew,” eko anoran.

11

Yesus Bégur Unuqorakri Ismaran

¹ Deř os Yesus awen oswa unuqoran. Sén nug unuqorko malwew ge, nug bega os anoran. “Nařinah, Le Luarak danah Yon bégur unuqorakri ismaran sillah, ig ole ismig.” ² Géři Yesus anaran, “Sén ag unuqoressi ge, ere anes: ‘Ig Méřnig, na wéhnim gun ole karan sumnig. Na urika king

† 10:31 10:31 Tiwur am danahas ole gamlagwa Tiwurdi ofa mak danah

‡ 10:32 10:32 Pris kéhnurak danah am nug Liwai fuřuh

denna danahas gumardip.
³ Na ig deŕ dorog ke mig.
⁴ Ig ole oun nouni sige
 qe kusqektu dohut dounig
 katie qe sillah, hipunin
 isanig kusuqka mig. Am
 ig aw paŕwigwe qepiakwa
 tolahun.’ ⁵ Am Yesus bégur
 dilag anan. “Olagwa usih os
 tuŕan tugamag lia lougwa
 atko qaŕurko koŕmurdig.
 ‘Lal, beret kiam os miŕdip
 olele te? ⁶ Keŕdi da lial
 os weiko uŕiko loulwa dué.
 Gam da ke nug morakri ole
 kawa.’ ⁷ Géri danah lo owa
 ge andig, ‘Na da aw kekuak
 miŕwen. Ihŕam iŕil maném,
 am da nir dahlar ole niak
 awenwa nitu. Da asko keke
 mirakri olele kawa.’ ⁸ Da ag
 anarina. Nug lia qeri nug
 asko keke ospi morew. Gam
 nug pi faŕak koŕmurdig qeri
 nug asko keke qe murdig.
⁹ Qeri da ag amlagwa
 anina. Ag koŕmeweg, Tiwur
 ag mardig. Mariweg ge,
 nug ismardig. Ag ihŕam
 qouqou orweg, nug ihŕam
 matuldig. ¹⁰ Qeri oun os
 Tiwur koŕmurdig ge, nug
 urig. Oun os maririg ge,
 nug ismurew perig. Am oun
 os ihŕam qouqou orew ge,
 nug ihŕam matulko murdig.
¹¹ Oun os nug nir memeg ge,
 nir kaké murdigri koŕmew
 ge, mat nou os murdig te?
¹² Am maru owah murdigri
 koŕmew ge, kappiéŕ os oko
 murdig te? ¹³ Qeri hipunin
 danah ag ole nir keke kena
 marlagri qe dueksi koutursi.
 Am Mem saw kappari danah

are koŕméŕi ge meŕenah
 Koulli Gun mew uŕirig,” eko
 anan.

Yesus Belsebul Ole

¹⁴ Deŕ os Yesus danah
 os koŕe kunum féruwa
 koulli nou qe sew koŕe
 kunum daré qe geŕdan.
 Geŕdew atew ge, danah qe
 né buliko mariew danahas
 peksi dorlag nan. ¹⁵ Gam
 olagwa danah os ge aneg,
 “Nug koulli nou dilag kuri
 Belsebulri* gagragsakwa
 koulli nou geŕare.” ¹⁶ Am
 olagwa danah la os Yesus mi-
 rakel os sérigri koŕmoreg.
 Keŕdi ag nug meŕenah
 Tiwur dowari te uŕiyan qe
 pelagri koŕmoreg. ¹⁷ Gam
 Yesus nug asilag dahmak
 qe doko ge, amlagwa anan.
 “Danah kaw usihwari ag
 kopatweg aŕit patew fan
 selag ge, geisah kaw qe paral
 mérig. Am danah os ag atéŕ
 usihwari ag kopatweg aŕit
 patew fan selag ge, geisah
 atéŕ qe kawa mérig. ¹⁸ Am
 Satan leigur ole kopatweg
 aŕit patew fan selag ge,
 gagragsak nusig kawa mew
 ag paral melag. Ag ansi ge
 da Belsebulri gagragsakwa
 koulli nou geŕarina, qeri da
 ere anina. ¹⁹ Da Belsebulri
 gagragsakwa koulli nou
 geŕarwi pe, asilgar danah
 ge oundi gagragsakwa koulli
 nou geŕarsi? Qeri asilgar
 danah ih qewa ismigsi ge ag
 darmési. ²⁰ Gam da meŕe
 Tiwurdi gagragsakwa koulli
 nou geŕarwi pe, Tiwur dana-
 has nusgur gamlagwa king

* 11:15 11:15 Koulli nouri kuri am nug nou memeg Satan

delle gumardigri agrowa uŕiyan.”²¹ Am Yesus né tonak os anaran. “Danah os gagragsak ole nug fan sakri keke bawarko loug kaŕiah wite ge, keke nusig kunum kena dasi.²² Gam danah gagragnah os beko fan seko éŕurko ge, fan sakri keke kunum gagrag qore qe urig. Am nug keke kunum urig qe danah la agop panirig.²³ Oun nug da lial kawa ge, nug dasil kegeŕ. Oun nug da pi kéhniŕew sipsip qaglarŕu ge, nug sipsip lamarew pihraursi,” eko anaran.

Koulli Nou Buliko Uŕiye

²⁴ Yesus anaran, “Sén koulli nou danah os féruwari géŕurweg doko atko ge, atu meirakwa sik oko darigri awen mariko weiye. Am nug awen os pi peko ge, ane. ‘Da lo minko uŕiyin qewa buliko attil,’ eko ane.²⁵ Géri nug buliko atko danah qe owa lo qe kinkak ekaŕko bawarko koutorak pe.²⁶ Peko ge, nug atko am koulli nou la nug érdak nounah 7 qere diarew uŕiyeksi qewa dasi. Géri danah qe tatam dian qe éŕurko ole nounah me,” eko anan.²⁷ Yesus né qe anewew, as os danahas ameg naŕi qe olagwa uŕuko anoran, “As na mémnirko ouma mirelle begran ole qe nug o gamag ase.”²⁸ Gam Yesus anan, “Danah areg Tiwurdi né dueksi dimlamursi ge, ag olag gamag asak naŕiwa dalag,” eko anan.

Yesus Mirakel Sew Pelag Aneq

²⁹ Sén danahas kuŕum qaglessi omorweg ge, Yesus anaran, “Danahas geiri ag olagwa sak nouninah ambak. Ag da mirakel séwi pelagri koŕmési. Gam da mirakel usih ospi séwi peweg. Ag profet Yona féruwa kowol nian qe sillah ih pelag.³⁰ Niniwe danahas kowol Yona dowā ban qe peksi ge, Tiwur nug mew atan qe ag dueg. Qe sillah danahas geiri ag ole Danah Bega qere peksi ge ag dolag.³¹ Dimba Tiwurdi uhŕibak deŕwa kenariwari kuin sirko danahas geiri ole aseksi dessi asilag sak nou qe ambo marko ismarew pelag. Keŕdi kuin qe wan atko patakware Solomonri duak kena qe dorigri uŕiyan. Gam ag olagwa danah os Solomon érdak ge ewa de, am ag nusig né duak minsi.³² Sén Tiwurdi uhŕibak deŕwa Niniwe danahas sireksi geiri danahas ole aseksi dessi geiri danahas dilag sak nou qe ambo melag. Keŕdi ag Yona né kuswew olag bulian. Gam gei ge danah os Yona érdak ge ewa de, am ag olag buliak minsi,” eko anaran.

Féŕundi Kamsahlak

³³ Yesus anan, “Danah os lam kamutko pi lariwew, am wawa pi tone. Kawa, nug karan eisew nie. Géri danah lo owa nuksi ge, lam aŕe qe pesi.³⁴ Na amen ge na féŕundi lam sillah. Na amen kena dew

ge, férun kunum ole kamsahlakwa darig. Gam na amen nou ge, férun kunum ole gattuwa darig. ³⁵ Qeri kamsahlak otwa de qe gattu tonewri na dahmeka koutor. ³⁶ Qeri na férun kunum kamsahlakwa darig am gattu nagur ospi férunwa darig ole ge, férun kunum kamsahlelle darig. Lam arko atko férunwa kamsahle qe sillah,” eko anan.

Yesus Farisi Am Ró Duak Danah Ole Alaran

³⁷ Yesus né mariko malwew ge, Farisi os nug lougwa atew ke lelasri anoran. Géri Yesus nug lougwa atko ninaqirko dian. ³⁸ Farisi qe Yesus eweg tatam pi isak ke lew peko ge, nug dorog nan. ³⁹ Géri Naínah anan, “Farisi, ag asilag kap am plet ole dimdim ih issi, gam ag olagwa ge ameg qak am kowol nounah ole ambak. ⁴⁰ Ag né tapewnak danah! Tiwur férnig ih te kawian? Am onig owa ole pi te san? ⁴¹ Gam asilag kap am plet ole owa kef kef dassi qe o duak danah kehnaressi mares. Ag qere selag ge, Tiwur amegwa ag olag isak perig. ⁴² Gam Farisi ag dahmes! Ag kug os pelag. Keédi ag danahas agop sak mangu ospi sési am Tiwurdi olag pi mouse. Ag qané, lumbu am darari kes kowol kowol ge watiweg ameg 10 qere new ameg usih qe Tiwur mursi.

Gam ag qere séssi am ole Tiwurdi olag mousewew am danahas agop sak mangu ses. ⁴³ Farisi ag dahmes! Ag kug os pelag. Keédi ag binag mak lowa danah wenlag ole dilag diak awen qewa ih dalagri séssi am ag qaglak awenwa felqareppeg ih weilagri olag naíri de. ⁴⁴ Ag dahmes! Ag kug os pelag. Keédi ag matmat bala pi kehak qe sillah, danahas pi duak qaéwa tapeksi weisi,” eko anaran. ⁴⁵ Ró duak danah os anan, “Duak marak danah, na Farisi dilag né anna qe, na sewe ig ole urnig ne.” ⁴⁶ Qeri Yesus né noh meko anan, “Ró duak danah, ag ole dahmes! Ag kug os pelag. Ag Ró kug ole danahas qarlagwa mési, géri ag mawakri kug aqare. Gam ag mawakri kehnareksi ewlag ospi marsi. ⁴⁷ Ag dahmes! Ag kug os pelag. Keédi ag alalgar profet qe aqareg am ag profet dilag matmatwa bala kehareksi bawarsi. ⁴⁸ Kowol asilag qewa danah ismarsi ge, ag alalgar algu profet aqareg qe kowol kena seg essi ag matmatwa bala keharsi. ⁴⁹ Qeri Tiwurdi duak kena qewa nug iril anan, ‘Da profet† am aposel‡ ole anwi atlag. Ag os ge nouni sarlag am gurak marlag. Am la os ge ag aqarweg mouslag.’ ⁵⁰ Qeri kug algu wan digumakwa profet

† 11:49 11:49 Tiwurdi né oko mariak danah ‡ 11:49 11:49 Danah os Yesus nugégé toqarko anew kekuak nusig séksi ateg ole qe. Aposel ge Yesusri mef danah.

aqarepppeg uriyew gei patak qe noh danahas geiri ag olag. ⁵¹ Algu Abel qakwari uriyew pris Sakaraia ge Tiwurdi doŕ manko morakri qaréw mourak am Tiwur Loug gamagwa ole qeg. Da meŕe anarina. Kug qe kunum noh qe danahas geiri ag olag. ⁵² Ŕo duak danah, ag dahmes! Ag kug os pelag. Keŕdi ag danahas Tiwur dowegri dagareg. Am ag agégé Tiwur duak mineksi ge danahas Tiwur dolagri seppeg ag dagareg,” eko anaran. ⁵³ Sén Yesus lo qe minko attig sew ge, Farisi am Ŕo duak danah ole uhŕilag bew, kegeŕ moreksi diguméksi gurgur koŕmoreg. ⁵⁴ Ag Yesus né nouni os anew dueksi oŕalagri kaŕéordéw.

12

Né Darmak Kowolri Dahmes

¹ Sén qewa ih danahas kuŕumnah 1,000 eŕdak ag Yesus pelagri qagleksi agégé nug tapeksi seppeg, Yesus bégur dilag tatam anan. “Ag Farisi danah dilag yis* qeri dahméksi koutores. Yis qe darmak gaŕlagwa ih Tiwur dimlamdak kowol. Qe sil-lah aw seweg. ² Ag keŕ keŕ larieksi tonak nie ge Tiwur sew ambo melag. Am keŕ lariaqwa sési qe ole sew kunum pelag am dolag. ³ Qeri keŕ ag gattuwa lug-meksi agé marilag ge, dimba

kémunwa danahas kunum dolag. Am keŕ kutiptip kurugwa marisi ge, dimba tamniakwa mariew kunum dolag.”

Tiwur Ih Faŕdes

⁴ “Da leilar, ag anarina. Ag danah feŕlag qelag seweg qeri aw faŕarweg. Keŕdi ag dimba kité la os pi seweg. ⁵ Gam da ag oun faŕurlagri qe anwi dolag. Ag Tiwur ih faŕdes. Nug ge koulli kaŕwarew mouslagri am ole dimba touŕarew kew pi qouse olewa nolagri gagragsak ole. Meŕenah, da buliko anarina, ag Tiwur ih faŕdes. ⁶ Ag dossi, danah ag é reis anig tanig ole qarég nagurnah usihwa irar mési. Gam Tiwur nug reis anig usih ospi doug katie. ⁷ Am meŕenah Tiwur ag kurlag urug kunum ge gane qe nug due. Qeri ag aw faŕweg. Am nug asilag o nie ge, é nounou kuŕum dilag dahme qe eŕdak.”

Yesusri Aw Uŕlag New

⁸ “Da ag anarina. Oun os nug danahas amlagwa nug da dimlamŕeri andig ge, Danah Bega Da ole geisah Tiwurdi doup amlagwa nug danah dasil eko andil. ⁹ Gam ounté os danahas amlagwa nug da dimiŕew ge, da ole geisah Tiwurdi doup amlagwa nug danah dasil kawa eko andil. ¹⁰ Danah oun os pi duak Danah Begari nouni andig ge, Tiwur hipunin nusig kusuqrig.

* 12:1 12:1 Yis ge palawa ole kawlieksi palawa manweg titŕe.

Gam oun os nug duelle Koulli Gun oko oko qurdig ge, Tiwur hipunin nusig qe ospi kusqew. ¹¹ Ag da dimlamiŕsi qeri danah os ag oŕwareksi diareksi Yuda dilag binag mak lowa am kuri danah wagé wagé am danah kuakri wittak marak ole qe nolagwa atweg ge, keŕ né am areg anlagri aw dahmak kuŕum oweg. ¹² Keŕdi ag keŕ éksi anlagri ge sén qewa Koulli Gun ag ismardig,” eko anan.

Danah Kéhu Oleri Né Tonak

¹³ Danah usih os danahas ameg naŕi qe olagwa nug Yesus amegwa anan, “Duak marak danah, na da awal amegwa anwe nug keke i memnitdi ge wasaŕko dasil sillah qe miŕar.” ¹⁴ Gam Yesus né qe noh meko anan, “Lal, oun da asilas ken watiko mattildi keprák danah toqíran?” ¹⁵ Elle ge nug kunum amlagwa anan, “Ag dahméksi koutores! Ag keke kunumdi aw amlag qew. Danah kénih naŕi ole ge, kénih qe sew nug kena ospi dew.” ¹⁶ Am Yesus nug né tonak usih os amlagwa anan, “Danah kéhu ole os dar seko ke kehew mou kuŕumnah nian. ¹⁷ Qewa ge, nug nugégé dahman, ‘Da ke ene oko mew diakri awen olele kawa. Qeri da aregnah séril?’ ¹⁸ Am nug anan, ‘Da ere séril. Geisah da ke makri lo kunum logŕarke am lo wagé wagé fuarke ge, ke kunum am keke dahlar kunum ole

qewa mardil. ¹⁹ Am da dagégé dasil ere andil, da ke am keke la kunum qe makaŕ kuŕum urwildigri olele qaglin. Aria, da sam delle ke lelle am ke naŕi selle gamal asakwa daril.’ ²⁰ Gam Tiwur nug amegwa anan, ‘Na né tapewnak danah! Gei tuŕan ewa na mousdip. Am keke kunum bawren de ene ge geisah oun memeg mérig?’ ²¹ Géri danah keke kuŕumnah wan ewari nugé nusig qagle ole qe dowa qere bérig, gam Tiwur nohwa ge nug keke kawa,” eko anan.

Wan Kénihri Dahmak Naŕinah Aw Oweg

²² Yesus bégur dilag anan, “Qeri da ag amlagwa anina. Ag wan enewa fou diakri aw dahmak kuŕum oweg. Ag ke lessi fou dalagri am feŕlag balari ole dahmak kuŕum aw oweg. ²³ Ag fou dasi qe ke érdak am ag feŕlag qe feŕlagri bala qe érdak. ²⁴ Ag kalog dilag dahmes. Ag ke pi kéhsi am ke uksi qagleksi louw pi mési, gam Tiwur ke mare. Tiwur é dahmare qe érdak ge ag dahmare. ²⁵ Ounté os olagwa dahmak kuŕum ow fou darigri sén deŕ usih yako terigri olele té? ²⁶ Géri ag keke nagur usih os sakri olele kawa ge, keŕdi ag dahmak kuŕumnah keke lari usi? ²⁷ Ag bala areg besi qe dahmores. Ag teret pi sési am lamén asilag pi sési. Gam da anarina. Bala qe asilag amnak ge king Solomon féru bala kenannah qe érdak. ²⁸ Gisgaŕ nug gei

de am keřew ih danah ko-
tařko kewba touřew arđig.
Gisgar sam qe Tiwur nug
bala mare. Qeri Tiwur ag
gumardig qe gisgar gumare
erđak gumardig. Ag dana-
has olag meře mak kutuk
ole! ²⁹ Qeri ag keř ke am
le ole lelagri aw dahmak
kuřum oweg. ³⁰ Wan ewa
danah Tiwur pi dosi ole ag
keke qeri marieksi sik aqare.
Gam ag ge, Memlag Tiwur ag
keke qeri olag nie qe nug iril
doko malwe. ³¹ Qeri ag Ti-
wurdi Kingdom meweg an-
qew dimlamurweg ge, nug
keke qe ole mardig.”

*Keke Kena Saw Kappari
Qaglakri Kowol*

³² “Ag da beglar kuřum
kawa, gam ag aw fařweg.
Ag Memlag Tiwur nug o
gamag asakwa Kingdom
nusig mardig. ³³ Ag keke
asilgar daren marweg qarėg
uksi o duak danah mares.
Qe ge saw kappa keke kena
asilag qe qaglak darig. Am
qarėg yanakri sogot saw
kappari ge oře ole kawa.
Asilag keke kena qe ospi
kawa mew qe darig, yawsen
danah ospi yawsen oweg
am diruř ospi seweg nou
mew. ³⁴ Asilag keke kenanah
arewa de qewa ih ag olag
am dahmak asilag kunum
ole qewa darig,” eko anan.

*Nařinah Uřirigra
Bawrena Da*

³⁵ Yesus anaran, “Ag lamen
asilag kutuk mappieksi
tageksi am lam kamutweg
arėwew bawressi des. ³⁶ Ag

kuak nir dilag danah nafi
danah as wakri mallenwa
uřirigri ameg mėksi dasi qe
sillah bawressi des. Gėri
sėn nug uřiko ihřam qouqou
orew ge, usihri ihřam nusig
matleksi morlag. ³⁷ Kekuak
nir are ag danah nafi
asilag uřirigri bawreksi
us aw niweg ameg mėksi
depeg buliko uřiko piarew
ge, ag olag gamag asdig.
Da meře anarina. Nug
nugėgė lamen tagko sew ag
daweg ke bawarko mardig.
³⁸ Nug tuřan tugamag tė
kuagarđigri maru gellepeg
tė uřiko kuak nir ameg
mėksi depeg piarew ge, ag
olag gamag asdig. ³⁹ Am
ag nė dasil ořwes: Lo
memeg os yawsen danah
nug lougwa uřirigri sėn
qe iril duewew ge, yawsen
danah qe loug ospi logařko
owa now. ⁴⁰ Qe sillah, ag ole
sansan bawressi des. Keřdi
ag Danah Bega da keř sėnwa
buliko uřiril qe ag pi dosi,”
eko anan.

*Kekuak Nir Kenari Nė
Tonak*

⁴¹ Yesus nė qe anko
malwew ge, Pita kořmoran.
“Nařinah, na ig amnigwa
ih te nė tonak ene marina,
kawa danahas kunum
ole amlagwa te marina?”
⁴² Nařinah kořewa oko anan,
“Oun ge kekuak nir kena
duak kena ole qe danah nafi
nusig nug toqorew kuak nir
la qe gumarelle ke marak
sėnwa ke wasařko mardig?
⁴³ Dimba danah nafi nusig
qe buliko uřiko am kuak

nir qe kekuak mangu ih sewew perig ge, kuak nir qe nug o gamag asdig. ⁴⁴ Meřenah anarina, danah naři qe geisah sew kuak nir qe keke nusgur kunum ole gumardig. ⁴⁵ Gam kuak nir os ere dahmelo, ‘Danah naři dasil ofer ospi buliko uřiyeu,’ elle nug kuak nir am kuak as la qe digumeko mourwarko ke naři seko lelle am le gagrag qe leko gar gelo. ⁴⁶ Danah naři qe der kuak nir qe pi dahmurdig ole qewa am sən os nug pi dorigwa uřiiko kuak nir qere peko ge, nug kotrew new danah olag meře pi me dalag awen qewa tourew nurig. ⁴⁷ Kuak nir nug danah naři nusig kerdi o nie qe duelle pi bawarko dimlamdew pe, danah naři nusig sew nouninah qelag. ⁴⁸ Gam kuak nir nug danah naři nusig kerdi o nie qe pi duelle nouni sew pe, danah naři nusig naři pi qew. Tiwur danah are ag naři mare ge, ag naři morlag. Am danahas are ag keke naři gumlagri mare ge, nug ag naři bulieksi morlagri kormardig.”

Yesus Dimlamdakwa Danahas Watilag

⁴⁹ “Da wan ewa kew mēril uřiyeu, am da ol se ge kew qe iril digumeko aran. ⁵⁰ Am da le lourak oswa nuril. Qeri da kug naři iwřewew atew sən qe durig. ⁵¹ Ag dahmesi ge diak kena te darigri wan ewa uřiyeu? Kawa. Da anarina, da danahas olagwa

koptak berigri uřiyeu. ⁵² Gei digumak lo usihwa danahas tanig ole qe watieksi, kiam ge arit dilas olag usih ospi dew am arit ge kiam qe dilag olas usih ospi dew. ⁵³ Ag watieksi memeg nug nag ole olas usih ospi dew am nag nug memeg ole olas usih ospi dew. Anig ge areg ole olas usih ospi dew am areg nug anig ole olas usih ospi dew. Am anig nug aswa ole olas usih ospi dew am aswa nug anig ole olas usih ospi dew,” eko anan.

Sən Peksi Olag Mourar!

⁵⁴ Yesus danahas kurum amlagwa anan, “Ag fur kem nuakwa qaglew peksi ge, ofer ole ansi. ‘Gu nerigri se.’ Am qe meře, gu ne. ⁵⁵ Am sən ag ulas kenariwa yalew ge, ag ansi. ‘Geisah kem gagaridig.’ Am qe meře kem gagre. ⁵⁶ Ag darmak garlagwa ih Tiwur dimlamdak danah! Ag wanwa am saw karan sən kitfu peko anakri ge dosi koutursi. Gam kerdi ag gei sən ewa keř keř beko ate qe peksi digu olag ospi moure? ⁵⁷ Kerdi ag agėge kowol mangu ih sakri ospi kepreksi dimlamursi? ⁵⁸ Na danah os na kiteri yagor mirew pe, kugri ne keprak lowa pi wanak ih umuwa ne qe bawreksa olas usih melasri mena pe. Kawa ge, nug na keprak danah dowa wirko wanew ro danah ewlagwa meirew kalabuswa yanirlag. ⁵⁹ Da na anarina.

Na kug noh qarég makri anak qe kunum mewe atew am nagurnah ospi meka malarip ge, na kalabuswari dimdim ospi downen,” eko anan.

13

Danah Os O Pi Bulirig Ge, Paral Mérig

¹ Danah os Yesus ole sén qewa dessi Yesus anoreg. Galili danah os dor' manko Tiwur morak qe seppog, Pailot anew aqarweg mousweg karlag noko dor' karag qe ole kawlian. ² Yesus anan, “Ag dosi ge, Galili danah mouseg ole qe hipunin asilag ge Galili danah la kunum dilag hipunin qe érdak nouninah, qeri te ag kug qe og? ³ Kawa! Da ag anarina, ag olag pi buliew pe, ag ole qere ih paral melag. ⁴ Am danah 18 qere Siloam lo welah na'ri karan uwa qiko aqarew mouseg qe, ag dosi ge, ag qe Yerusalem danahas la éfारेksi hipunin nouninah te seg? ⁵ Kawanah! Da anarina, ag olag buliar. Kawa ge, ag ole qere ih paral melag,” eko anan.

Gu'raw Mou Pi Nieri Né Tonak

⁶ Am Yesus né tonak ene amlagwa marian. “Danah os wain dar nusig owa gu'raw ker os kehew dian. Géri dimba ge, gu'raw qe mou niew perigri atan, gam mou usihnah ospi niew pian. ⁷ Géri nug dar gumak danah nusig qe anoran, ‘Da maka'

kiam qere gu'raw ene mou niew perildi sén ku'rum u'irém, gam mou usih ospi niew pégin. Qeri na kowe qiar. Ke'rdi nug awen oko delle wan kirag pi malwew.’ ⁸ Gam dar gumak danah qe ko'ewa oko anan, ‘Danah na'ri, minwe maka' usih la os ole dew. Am da diguwa wan kapatko mol morelle am kinkak ole diguwa méril. ⁹ Maka' os uwa mou niew pe, qe kena. Gam mou ospi niew pe, kuwi qirig,’ ” eko anan.

Yesus Sabatwa As Os Sew Wa're Pasaoran

¹⁰ Sabat de'wa Yesus Yuda dilag binag mak lowa danahas Tiwurdi Néri duak maran. ¹¹ Am as os qewa dian ge koulli nou sew nug maka' 18 qere gumi tupiak, géri nug gumi mangu morakri olele kawa daré. ¹² Sén Yesus as qe peko ge, u'rwurew dow anoran, “As, da wa're nasip séwi pasaoré.” ¹³ Yesus qere anelle eweg as qe gumiwa mew, usihri asko mangu delle Tiwur binag suman. ¹⁴ Yesus Sabatwa as qe sew kena man, qeri kuri danah Yuda dilag binag mak lori qe Yesusri uh'ribew danahas dilag anan, “Ag kekuak de' la qewa ge u'riyeksi anweg wa're asilag sew pasaorar, gam Sabat de'wa u'riyeksi ge ag aw anweg wa're asilag sew pasaorew,” eko anan. ¹⁵ Géri Na'rinah kuri danah qe anoran, “Ag darmak ga'lagwa ih Tiwur dimlamdak danah! Ag Sabat

deŕwa makau am donki ole asilgar le marlagri pi te kusqareksi diareksi atsi? ¹⁶ Qeri as Abraham fuŕuh ene Satan waŕewa dagorew makaŕ 18 qere dian. Nug Sabatwa kusqak murdil ge nouni te?" ¹⁷ Sén Yesus qere anew ge, danah nug keger moreg qe ag uŕlag nan. Gam danahas ge nug kuak kunum kenanah san qeri olag gamag asan.

Mastet Égri Né Tonak

¹⁸ Géri Yesus anaran, "Tiwurdi Kingdom ge kité sillah? Da qe kité sillah eko andil? ¹⁹ Qe ker os wénih mastet ég sillah qe danah os oko dar nusigwa kehan. Ker qe beko naŕi mew ewegwa é kuŕum uŕiyeksi sik uksi dasi," eko anan. ²⁰ Am nug buliko anaran, "Da Tiwurdi Kingdom ge kité sillahnah eko andil? ²¹ Qe yis sillah. As os yis oko palawa naŕiwa gogrew now kawlian. Yis qe sew palawa titiŕko naŕi me qe sillah," eko anan.

Ihram Nagurdi Né Tonak

²² Yesus Yerusalem attigri atelle taun am kaw eŕaran ole qe danahas doulag patelle atan. ²³ Danah os koŕmoran, "Naŕinah, danah usih usih te founak uksi sansan dalag?" Qere anew ge, Yesus anaran. ²⁴ "Ag ihram nagur qewa nolagri gagrag mes. Da anarina, danahas kuŕum ihram qewa nolagri selag, gam ospi noweg. ²⁵ Sén lo memeg asko ihram manew ge, ag

dimdim aseksi dessi ihram gouqou oressi anlag, 'Danah naŕi, ihram matulwe ig ole not,' éksi anlag. Gam nug koŕlagwa oko andig, 'Da ag pi duarina am ag arewari uŕiyéw.' ²⁶ Qere anew ge, ag anlag, 'Ig na ole ke am le ole let am na ig kawmigwa dounig paten ole qe,' éksi anlag. ²⁷ Gam nug koŕlagwa oko andig, 'Da ag pi duarina am ag arewari uŕiyéw. Ag kunum kowol nou sak danah, ag uwa wanes! ²⁸ Sén qewa ge Abraham, Aisak, Yakop am profet kunum saw kappa deppet piarlag. Gam ag ge minarak dimdim dessi, qeri olag nou mew kuanessi élag gaŕmessi dalag. ²⁹ Geisah danahas kem bakwari, kem nuakwari, kenariwari am nanettiwari am wan atu kunumbari ole uŕiyeksi awen asilag uksi saw kappa mallen naŕi qewa dalag. ³⁰ Meŕenah, danahas gei ag wenlag kawa dasi ge Tiwurdi Kingdom owa ag wenlag ole dalag. Am danahas gei ag wenlag ole dasi ge ag wenlag kawa dalag,' eko anan.

Yesus Yerusalemri Kuanan

³¹ Sén qewa ih Farisi os duksi Yesusri aneg, "Na awen ene minka awen oswa eit, keŕdi king Herod Antipas na iwirdigri se." ³² Géri nug koŕlagwa oko anan, "Ag ateksi qé déguŕ qe ere anores, 'Da gei keŕew ole am atak ge danahas

feñlagwa koulli nou geñardil am wañe danah séwi wañe pasaorlag. Am sén dasil uríyew ge kekuak dasil malaril.’ ³³ Areg darig ge da gei, keñew, am éñul attil. Keñdi Tiwurdi profet ge Yerusalem ih aqarweg moussi! ³⁴ O Yerusalem, Yerusalem! Ag ih Tiwurdi profet agrowa uríyeg ge, qar touñeg am aqarweg mouseg. Sén kuñum da maru anig nagur sougwa qaglarko tonare qe sillah, nir asilgar qaglardil sein, gam ag mineg. ³⁵ Ag qere dues! Gei Tiwur ag minarko loulag dimurdig. Da ag amlagwa anina. Ag da bulieksi ospi peirweg atew sén uríyew ag ere anlag, ‘Ig Nañinah Tiwur wénihwa Danah urírig qe binag ménig,’ éksi anlag,” eko Yesus anan.

14

Yesus Sabat Deñwa Wañe Danah Os Sew Kena Man

¹ Sabat deñ oswa Yesus Farisi dilag nañi os lougwa ke lakri atan. Atew ag nug kañéoreksi koutoreg. ² Qewa ge, nug nohwa aminko danah os wañe féru titrarak ole qe dewew pian. ³ Yesus Farisi am Ño duak danah ole koñmaran. “Sabatwa wañe danah sew kena mak ge Ño dimlamdak te?” ⁴ Gam ag né kawa deg. Géri Yesus danah qe oñako sew kena mew ge anorew atan. ⁵ Atewew ge, Yesus koñmaran, “Ag eneri olagwa usih os nag te kawa makau nusig te os

Sabat deñwa moñ oñewa tolako now pe, ag ofeñ pi te beñuweg bew?” ⁶ Am ag né ospi aneg.

Mallen Memeg Am Ño Danah Ole Dilag Né

⁷ Sén Yesus danah mallenwa ke lakri uríeg qe danah wenlag ole dilag awen qewa dalagri seweg peko ge, né tonak ene anaran. ⁸ “Sén danah os ag nug wakri mallenwa atakri anew ateksi ge, ag danah wenlag ole dilag awen qewa aw daweg. Keñdi danah os wénih nañi ole na erdak urwureg urírig ge na pi dona. ⁹ Qere dew ge, mallen memeg a añié urwattig ole qe doko anirdig. ‘Na danah ene awen mor,’ eko anew uran newew atka danah wenlag kawa dasiwa darip. ¹⁰ Gam sén na anew atka ge, awen danah wenlag kawa dasi qewa deppe, mallen memeg doko anirdig, ‘Lal, na aska atka awen kena danah wenlag ole dasiwa da,’ eko anirdig. Qe ge danah mallen qewa urílag ole leipar qe nolagwa na wénim sumdig. ¹¹ Danah oun os nug nugégé wénih sumdig ge, Tiwur danah qe wénih qew nérig. Am danah oun os nug nugégé wénih pi sumdig ge, Tiwur nug wénih karan sumdig.” ¹² Géri Yesus mallen memeg qe amegwa anan, “Sén na ke nañi os seka ge, na leipar, awnar kampar ole, nasipwari am leipar keñlag ole na mourirak dasi qe aw urwarwen. Na qere

sérip ge, ag ke séksi noh méksi na úrwirlag. ¹³ Gam na ke naíri seka ge, o duak danah, danah ewlag félag nou ole am amlag gaú ole qe úrwarwe ates. ¹⁴ Qere sérip ge, ag noh makri olele kawa. Gam sén danahas mangunah ag Tiwur nohwa sirlag ge, Tiwur na noh mirko wittak mirdig,” eko anan.

Mallen Naíri Né Tonak

¹⁵ Danah os ke lelle Yesusri né qe doko ge anan, “Danah os mallen naíri Tiwurdi kingdom owa ke lérig ge, nug Tiwur wittak kena morew o gamag asdig.” ¹⁶ Yesus né qe noh meko anan, “Danah os mallen naíri orwelle danah kuúrum úrwaran. ¹⁷ Sén keke kunum bawarko malako ge kekuak nir anew atko danah úrwaran qe anaran, ‘Keke kunum bawakra doweg atet,’ eko anaran. ¹⁸ Danah úrwaran ole qe kunum ole ag kekuak la ole, géri ospi atweg éksi aneg. Danah anqak qe anan, ‘Da wan fou os daren mein, géri minwe da atko wan qe kitalko peril,’ eko anan. ¹⁹ Os ge nug anan. ‘Da tuménah makau 10 qere daren marin. Géri ag areg kekolag qe seweg peril qeri da ospi attil,’ eko anan. ²⁰ Am la os ge anan, ‘Da tuménah as win, géri ospi attil,’ eko anan. ²¹ Kekuak nir qe buliko atko lo memeg qe amegwa

anan. Anew ge, lo memeg qe uhribew kuak nir nusigri anan, ‘Ofeínah atka taunwa ih naíri am nounu olewa o duak danah, ewlag félag nou ole am amlag gaú ole qe diarka úri,’ eko anan. ²² Kekuak nir qe qere seko ge anan, ‘Danah naíri, na aniíam sillah sém, gam lo ospi ambé.’ ²³ Géri mallen memeg kekuak nir nusigri anan. ‘Na atka taun dimdim ih naíriwa am nounuwa ole keigarwe úriweg da loul ambar. ²⁴ Da anarina, da danah tatam úrwarwi mineg ole qe kunum mallen dasilwa ke nagurnah ospi leweg,’ eko anan,” Yesus qere anaran.

Yesus Dimlamdakri Kug

²⁵ Danahas ameg nafi Yesus dimlamdepppeg, nug buliko danahas qe anaran. ²⁶ “Oun os dagrowa durigri dew pe, nug dasil o naíri mousar. Am nug memegri am anigri, wawri, nir nusgur dilag, awgur kamgur dilag, am kéwingur dilag am nugégé nusig o naíri niew pe, nug da begal diakri olele kawa. ²⁷ Am oun os nug nugégé nusig ker mawanak ospi mouko am da pi dimlamiíko pe, nug da begal diakri olele kawa*.” ²⁸ Am ag olagwa danah usih os lo welah am karan os furigri ge, nug dako qarég gane tourko lo fuko malarigri qe dahmeko peko am digumérig. ²⁹ Keídi nug

* **14:27** 14:27 Ker mawanak mouko dimlamdak digu ge, nugégé nusig sak am o mourak dimorko am kug mawelle Tiwur dimlamdakri kowol.

digumeko lo lagko am pi malarig ge, danah kunum lo qe peksi siwegkoleksi ere anlag. ³⁰ ‘Danah ene lo digumeko fuan gam nug malwakri olele kawa,’ éksi anorlag. ³¹ Am king os 10,000 fan danah ih ole nug king os 20,000 fan danah ole fan selasri ge, nug lia qe érudigri ge delle dahmeko koutorko peko digumeko fan sérig. ³² Nug olele kawa dew pe, king os qe lawar dewew danah os anarew ker ihwa olas usih melasri kormorlagri atlag. ³³ Am ih qewa, ag oun os nug ker ker nusig qe kunum pi dimorko pe, nug da begal diakri olele kawa.”

Sol Mumda Kawa

³⁴ “Sol ge keke kena, gam nug mumda kawa mew ge, areg seweg am buliko mumda ole darig? Kawa. ³⁵ Sol mumda ole kawa qe nug ker os diguwa wanwa meko ker ke morakri kawa, nug kekuak ole kawa. Qeri sol qe tourweg ate. Oun os doug né duakri ole dew pe, né ene doko koutorar,” eko Yesus anaran.

15

Sipsip Lariakri Né Tonak

¹ Deř os takis wak danah am hipunin danahas ole qe ag Yesus né mariew dolagri uriyeksi qagleg. ² Gam Farisi am Mosesri Ro duak danah ole né né marieksi aneg, “Danah ene hipunin danah

ole liam pateksi arié ke lési.” ³ Géri Yesus né tonak ene anaran. ⁴ “Ag olagwa danah os nug sipsip 100 qere ole darig am sipsip usih os lariew ge, nug areg sérig? Nug 99 qe minarew awen gisgar olewa deppeg am nug atko sipsip usih larie qe pi te mariko pew? ⁵ Am sén nug peko ge, o gamag asew sipsip qe sumko guqawa meko mouko louw ate. ⁶ Atko ge, nug leigur am nusigwari qe ole urwarew uriyeksi qagulweg anare. ‘Ig onig gamag asar. Kerdi da sipsip dasil usih larian qe peko buliko wém.’ ⁷ Da anarina. Kowol qewa ih, hipunin danah os o buliew ge, saw kappa ole olag gamag asak nafinah nie am danah mangu 99 olag buliakri olele kawa qe dilag olag gamag ase qe érdak.”

Qarég Lariakri Né Tonak

⁸ “Qe sillah, as os qarég silwa* ¹⁰ qere ole am usih os lariew pe, nug areg sérig? Nug lam kamutko louw kinkak ekrelle yamorko mariko mariko peko urig. ⁹ Am sén nug peko oko ge, leigur am nusigwari qe ole urwarew uriweg anare. ‘Ag da ole onig gamag asar, kerdi qarég silwa dasil larian qe peko buliko wém.’ ¹⁰ Da anarina. Kowol qewa ih, hipunin danah os o buliew ge, Tiwurdi doup qe ag ole olag gamag ase,” eko anan.

* 15:8 15:8 Silwa qarég ene drakma. Qe deř usihri kekuak noh.

*Nir Geir Memeg Munurko
Atanri Né Tonak*

¹¹ Yesus né ene buliko anaran, “Danah os békuur aarit ole daré. ¹² Géri nag dimbari ge memegri anan, ‘Mem, na keke wasarka dasil sillah qe mir.’ Géri memeg keke kunum nakuur dilas wasarko matan. ¹³ Wagam ole kawa, nag dimbari qe keke nusig kunum qaglew daren meg. Meweg qarég oko orwelle atu os una qewa atan. Atko qewa delle ge, nug o mourakwa ih nouwa qarég sew kawa man. ¹⁴ Kawa mew dimba ge, atu qewa laké nañi nian. Niew ge, nug digumeko qagrakwa dian. ¹⁵ Géri nug atu qewari danah os dow kekurigri atew ge, danah qe sew atko awen qewa fo nusig ke marelle gumardé. ¹⁶ Nug laké qew fo tounam gone mardé ole qe lérigri o nañi daré, gam ounté kité ospi mordé. ¹⁷ Sén dahmak kena nugrowa uriyew ge, nug nugégé anan, ‘Da memri kekuak nir ge ag ke olele, gam da ge ewa lakéri mousdil sein. ¹⁸ Da mem dow buliko atko andil, “Mem, da Tiwur nohwa am na nomba ole hipunin sein. ¹⁹ Da na nam eka anirdipri olele kawa, gam sewe da kekuak nir nasip de,” ’ eko andil, eko anan. ²⁰ Géri nug asko buliko memeg dow atan. Gam nug ih una uriyewew memeg peko nusig o dow guko atko qagru orako gamnurko kis moran. ²¹ Géri nag

memegri anan, ‘Mem, da Tiwur nohwa am na nomba ole hipunin sein. Da na nam diakri olele kawa.’ ²² Gam memeg kekuak nir nusgur dilag anan, ‘Ag oferé féru bala kenanah qe uksi méksi mores. Eweg dorohwa ring oraweg now am fég gaña méksi mores. ²³ Am makau yu titraknah qe qéksi ke nañi seweg lettu onig gamag asar. ²⁴ Keñdi ig da nal ene mousko malwan qere dahmet, gam buliko uriyé. Nug larian, gam buliko peko wém.’ Géri ag olag gamag asakwa ke nañi qe leg. ²⁵ Sén qe, nag digam nug dara dian. Nug uriko lo mourko dolle ge, kasi sepeg uttulag duan. ²⁶ Géri nug kekuak nir os urwurew wanew ge, koormoran, ‘Uni keñ sessi sési?’ ²⁷ Kekuak nir qe anan, ‘Na kamap ge buliko uriyé. Am na memen makau yu titraknah qe qew ke nañi sam. Keñdi nug nag larian qe gurak ospi wan kena ih buliko uriyew o gamag asew sé,’ eko anan. ²⁸ Gam awag ge uhribew lo owa nuak minan. Géri memeg dimdim wanko lo owa nurigri sinanah koormoran. ²⁹ Gam nug memegri anan, ‘Na pe! Da makañ kuñum nasip kekuak sam sein am né nasip ospi tappi nan. Gam qeri na meme yu usih ospi mirwe da leilar ole ke nag ospi séktu let. ³⁰ Sén na nam ene qarég nasip nañi oko atko o mourakwa ih nouwa am ihwari as

feřlagwa sew kawa mew, am buliko louw uřiyew ge, na makau yu titřaknah qeka mořam,' eko anan. ³¹ Géri memeg anan, 'Da nal, na sansan da ole dařu. Am keke dasil kunum qe nasip. ³² Gam ig ke lettu onig gamag asé, keřdi na kamap ene mousan gam fouman. Nug larian gam buliko kappa uřiyew ge, ig buliektu piam,' eko anan," Yesus qere anaran.

16

Kekuak Gumak Danah Duak Kena Ole

¹ Yesus bégur anaran, "Sén os danah kéhu oleri kuak nir dilag anqak danah keke nusig kunum gumardé ole qe daré. Deř os danah os atko danah kéhu ole qe amegwa kekuak nir nusgur dilag anqak danah qe qarég nusig sew kawa meré qeri anoran. ² Géri nug urwurew now kořmoran, 'Danah nasip marisi qe meře te? Keřdi na kuak qe-wari malwirdil, na qarég areg gumen qe kunum ole yaka miř,' eko anan. ³ Géri kekuak gumak danah qe nugégé anan, 'Danah naři da gumře ge kuakwari gérildig, géri da aregnah séril? Da dar kekuakri gagragsak ole kawa am da nuqak uřal ne. ⁴ Sén da kekuak ewari malwiřew ge, aregnah séwi danahas wiřweg loulagwa danigri ge da duina,' eko anan. ⁵ Géri nug né mew danah naři nusig qeri qarég

noh makri danah qe usih usih uřiyeg. Anuqko uřiyen qe kořmoran, 'Na keke gane bulika noh meka danah nafi dasil murdip?' ⁶ Danah qe né noh meko anan, 'Oliw gořen siné 100 qere.' Kuak gumak danah anoran, 'Na pepa bulika noh makri ene oka ofer qere daka siné 50 ih qere ya,' eko anoran. ⁷ Qe dimba am danah os dow kořmoran, 'Am na ge keke gane noh mérip?' Danah qe kořmak noh meko anan, 'Reis bek 100 qere.' Kuak gumak danah anoran, 'Pepa bulika noh makri nasip enan da oka 80 bek ih qere ya.' ⁸ Qeri danah naři qe kekuak gumak danah kena kawa qeri 'Kena sam. Na duak kena ole,' eko anoran. Keřdi danah wan ewari ag keke gumarakri duak qe ag dosi koutursi, danah kamsahlak owari dilag duak qe eřarak. ⁹ Da amlagwa anina. Keke wan ewariwa ag leilgar kehnares, geisah keke qe ole diakri sén olele morew, Tiwur ag sumarew saw kappa awen ole dalag. ¹⁰ Oun os nug keke nagur pesorko gumdig ge, nug keke naři ole pesorko gumdig. Am oun os nug keke nagur nouni gumdig ge, nug keke naři qe ole nouni gumdig. ¹¹ Géri wan kéhu nouni gumarlag ge, oun nug saw kaw kéhu meřenah qe gumlagri mardig? ¹² Am ag danah osri keke nouni gumarlag ge, oun nug keke asilagnah qe mardig? Kawa. ¹³ Kekuak

nir os danah nañi añit dilas sén usihwa kekuakri olele kawa. Nug os ge dimorelle am osri ih o niring. Nug os ge dimlandelle am os ge mindig. Qe sillah ag Tiwur mériwanessi am keke wan ewari ole mériwanakri olele kawa,” eko anan. ¹⁴ Qere anew ge, Farisi qarégri olag niré ole qe dueksi Yesusri né siwkolessi aneg. ¹⁵ Né siwkolessi anweg ge, nug anaran. “Ag ansi, ‘Danah amlagwa ig mangunah,’ gam Tiwur ge ag olag pe am due. Danah ag keñ kekeri olag nañi nie ole ge, Tiwur amegwa keke qe nouninah.”

Yesus Né Ene Ole Marian

¹⁶ “Mosesri Ró am profet dilag né kusweppege uñiyew Yonwa patan. Qe dimba ge, Tiwurdi Kingdomri né kena qeri kusweppege uñiye. Am danahas kunum qewa nola-gri kekuak nañi sési. ¹⁷ Wan saw ole ge kawa mérigri kug kawa, gam Tiwurdi Ró Yak ge nagurnah ospi kawa mew. ¹⁸ Danah oun os waw munurko am as la urig ge, nug doñ dilag kowol qe sérig. Am danah os as gému mundak urig qe ole nug doñ dilag kowol qe sérig,” eko anan.

Danah Kéhu Ole Am Lasarus Ole

¹⁹ Yesus né marielle am né ene ole anaran. “Danah os kéhu ole am nug féru bala kena kenanah meré. Nug deñ dorog keke kunum olele daré. ²⁰ Nusig kañ ihñamba ge o duak danah os wénih

Lasarus qe niré. Lasarus nug féru kunum isi olele morak. ²¹ Am nug danah kéhu ole qe lougwari ke le minak biña os lelemba daré. Am o duak danah ge qé isi merweppege daré. ²² Sén dow o duak danah Lasarus mousew, Tiwurdi doup maweksi ateksi awen kena Abraham dianwa Abraham wañutqorweg des. Danah kéhu ole qe ole mousew suhmeg. ²³ Nug kew pi qouse olewa gurak nañinah olle delle amnew tew ge, Abraham unanah uwa pian. Lasarus ole wañutqorak dewew pian. ²⁴ Géri nug Abraham urwuran, ‘Mem Abraham, da nuqrina. Na dasil ot dow Lasarus anwe eweg guñ noh lewa meko lémrul oug mérigri mar. Keñdi da kew ewa gurak nañinah wina,’ eko anan. ²⁵ Gam Abraham noh meko anan, ‘Nir dasil, na dahmor. Na wanwa keke kena ot nian ole qe kunum on, gam Lasarus ge keke nou qe diaran. Gam gei ge nug gamag asewew ewa de am na ge gurakwa dana. ²⁶ Am ole, ig gamnigwa kuhañ nañinah nie, géri oun ewari agrowa wanakri olele kawa am qewari ole igrowa ewa matañko duakri olele kawa.’ ²⁷ Danah kéhu ole ge Abrahamri anan. ‘Da nuqrina, mem! Lasarus anwe da memel lougwa atar. ²⁸ Keñdi da awlar kamlar tanig ole ena dasi. Nug gagrag anarew da gurak duina awen enewa

ag aw ufiweg,' eko anan.
²⁹ Abraham noh meko anan,
 'Mosesri Ro am profet dilag
 né yak nie, géri minwe ag
 qe dues.' ³⁰ Géri nug anan,
 'Kawa, mem Abraham. Qe
 olele kawa. Danah os
 mousko am buliko asko
 atko amlagwa andig qe ih
 ge, ag dueksi olag bulirig.'
³¹ Abraham nug anoran, 'Ag
 Moses am profet ole dilag
 né dueksi pi dimlamurlag
 ge, danah mousko am sirko
 anarew qe ole ospi dueksi
 dimlamurweg,' " eko Yesus
 anan.

17

Yesus Hipuninri Anan

¹ Yesus bégur anaran,
 "Sak o kowol seweg danahas
 hipuninwa tolalagri qe
 urilag, gam danah qe
 sérig ole ge nug kug os
 perig. ² Danah qe sew nir
 nagur ene os hipunin sew
 pe, nug fagwa qar nañi
 eiseksi tourweg iwba nurig
 olelenah. ³ Qeri dahméksi
 koutores. Na liap nagrowa
 hipunin sew pe, gaña morwe
 buliko aw sew. Am nug
 o buliew kowol qe minko
 dimorew ge, hipunin noh
 nusig kusuqka dowe dout
 katiar. ⁴ Am nug der usihwa
 nagrowa hipunin seko ⁷
 qere patko am buliko sén
⁷ qere patak uriko 'Kowol
 qe nouni séme,' elle o buliew
 pe, hipunin nusig kusuqka
 dowe dout katiar," eko
 anaran.

O Meře Mak

⁵ Aposel* Nañinah anoreg,
 "Na sewe ig nasip onig meře
 mak nañi mar." ⁶ Nug noh
 meko anaran, "Ag olag meře
 mak nagurnah kapis ég sil-
 lah darig ge, ag ker nañi
 giram eneri anlag, 'Na sirka
 atka iwba dirin noka be,'
 éksi anweg nug dimlamurko
 qere sérig."

Kuak Nirdi Kowol

⁷ "Né os anwi dolag. Ag
 olagwa usih os nug kuak
 nir nusig wan kopattig am
 sipsip gumardig. Sén nug
 kuak awenwari uriyew ge,
 danah nañi nusig 'Na ere
 daka ke le,' eko anurdig te?
⁸ Kawa. Nug ere andig, 'Na
 le loka bawarka ke dasil se.
 Na amel meka deppe da ke
 lewi tatam, am na ke le.'
⁹ Kuak nir nusig né dimla-
 murko keke kunum sérig,
 qeri danah nañi nusig 'Kena
 sam,' eko ospi anew. ¹⁰ Géri
 ag ole Tiwur ker sakri ane qe
 kunum séksi malweksi ge,
 ag anes, 'Ig kuak nir nasip
 sam. Ig kekuak migak qe
 sam,' éksi anes," eko anaran.

Yesus Lepra Danah 10 Qere Sew Pasaoreg

¹¹ Sén Yesus Yerusalem
 attigri atelle Samaria atu
 uriko patak qe dimlamurko
 atan. ¹² Nug atko kaw
 oswa nowew, danah 10 qere
 leprasi ole peksi unaka pi
 waneg lawar deg. ¹³ Dessi
 ge, ag urweksi anoreg. "O
 danah nañi, Yesus! Na isanig

* **17:5** 17:5 Danah os Yesus nugégé toqarko meř arew kekuak nusig séksi ateg
 ole qe. Aposel ge Yesusri meř danah.

ot duar!" 14 Sén nug piarko ge anaran, "Ag ateksi feřlag pris† ismares." Ag atessi ge, ihwa feřlag pasaorew peg. 15 Danah 10 qe kunum feřlagwa leprasi pasaorew peg. Gam danah usih os sén féru pasaorew peko ge, fag naříwa qalko Tiwur binag sumelle buliko uříyan. 16 Nug atko Yesus nohwa ole fégwa gatewa yako duk noko "Kenanah sam," eko anoran. Am nug ge Samaria danah. 17 Yesus kořman, "Danah 10 qere séwi feřlag pasaoré. Am danah 9 qere ge arewa dasi? 18 Aregri uřiyak danah usih ene ih Tiwur binag mérigri buliko uřiyé?" 19 Qere anelle Samariarer qeri anan, "Aska eit, na ot mére mak qewa Tiwur férun sew pasaoré," eko anoran.

Danah Bega Buliko Uřiyewew Sén Areg Darig

20 Deř os Farisi danah Yesus kořmoreg. "Ganeh Tiwur king beko danahas nusgur gumardig?" Yesus noh meko anaran, "Tiwurdi Kingdom digumeko bérig ge ag amlagwa peppeg pi bew. 21 Danahas 'Enan de,' am 'Unan de,' éksi ospi anweg. Keřdi Tiwurdi Kingdom iril uříyan danahas gamlagwa de," eko anan. 22 Yesus bégur dilag anan, "Sén qe uřirig qewa ag da Danah Bega deř usih os peiřlagri selag, gam ag ospi peiřweg.

23 Danah anarlag, 'Mesaia† nug unan de,' am 'Nug enan de,' éksi anlag. Gam ag aw gueksi dimlamareksi atweg. 24 Keřdi Danah Bega da uřirildi deřwa saw karan ampir oko atu kunum olele more qe sillah peksi ge dolag. 25 Gam tatam ge, da gurak naří uril am geiri danahas dimiřlag. 26 Nuari sénwa danahas kowol nou seréw qe sillah Danah Begari uřiyak sénwa ole qere ih selag. 27 Danahas ke leg, le leg, danahas nug oppeg atew atew ole Nua kuh nařinah qe owa nuan. Sén qewa gu naří neko le kue naří bew paral meg. 28 Qe sillah Lotri sénwa ole qere seréw. Danahas ke lessi, le lessi, keke darendi maressi, keke fou daren maressi, ke keharessi am lo fuaressi daréw. 29 Gam Lot Sodom minko atewew sén qewa ge, Tiwur sew kew am qar ařelle saw karandi gu sillah neko ařarew kunum ole paral meg. 30 Qe sillah danahas pi bawrak deppeg deř qewa Danah Bega kamsahlak gun olewa uřirig. 31 Deř qewa danah os loug dimdim darig ge, lo owa keke nusgur diardigri pi now. Qe sillah danah os dara darig ge, lougwa keke diardigri buliko ospi atew. 32 Keř ihwa Lot waw paral man qe dahmores. 33 Oun os nug nugégé kowol kunum nusig dimlamurko ge, foumak sansan

† 17:14 17:14 Tiwur am danahas ole gamlagwa Tiwurdi ofa mak danah

† 17:23 17:23 Tiwur danahas nusgur buliko diardigri danah toqoran.

diakri ospi ow. Gam oun os kowol kunum nusig dimorko da dimlamrèlle mousdig ge foumak sansan diakri urig.³⁴ Da anarina. Danah Bega uririg sén qewa danah arit os tuqan arié nieppes ge, os ge olle am os ge munurdig.³⁵ As arit os arié ke sagréssa dalas ge, os ge olle am os ge munurdig.”³⁶ (Danah arit os arié dar usihwa dalas ge, os ge olle am os ge munurdig.)³⁷ Yesus né mariko malwew, ag kořmored. “Nařinah, qe arewanah bérig?” Nug kořmak noh meko anaran. “Awen arewa doř mousak os niewew ge, tum qewa qagulsi. Qe sillah, da lugmak ospi uríwin ag duepppeg uriril,” eko anaran.

18

As Qehras Am Né Keprak Danah Ole Dilas Né Tonak

¹ Am Yesus nug Béğur 12 unuqorak pi minweg sansan unuqorlagri né tonak ene amlagwa anan. ² Nug anan, “Né keprak danah os taun oswa daré. Nug Tiwur pi fařurdé am danah dilag ole pi dahmeré. ³ Am as qehras os taun qewa daré. Nug bulibuli né keprak danah qe dowa atko nuqurko andé. ‘Keger dasil nouni siřan. Qeri na da dimulwa daka né dasil kepař,’ eko anan. ⁴ Sén welah né keprak danah qe kité ospi san, gam dimba nug nugégé anan. ‘Da Tiwur pi fařdina am danah dilag ole pi dahmeina. ⁵ Gam as ene bulibuli dagnéwa

uríyew sériag iwře, géri né nusig kepařko mangu murdil. Keřdi nug sew da kéwsil kawa ospi mew!’ eko anan.” ⁶ Am Yesus anan, “Né keprak danah mangu kawa nug keř eko anan qe dues. ⁷ Am Tiwur nug danahas nusgur kepraran qe dilag kug tuqan kémun ole unuqorakwa mursi ge, asilag seko pi te mangu morko mare? Nug qere duelle te darig? Kawa. ⁸ Da anarina. Nug ofeřdi mangu morko mardig. Gam sén Danah Bega da wan ewa buliko uriko ge, o meře mak danah os piardil te?” eko kořmaran.

Farisi Danah Am Takis Wak Danah Ole Dilas Né Tonak

⁹ Danah os ag dueg ge ag mangu essi am la kunum ge sam sillah duardéw qeri Yesus né tonak ene anaran. ¹⁰ “Danah arit os unuqorlasri Tiwur Lougwa ates. Os ge Farisi danah am os ge takis wak danah. ¹¹ Farisi danah qe asko lawař delle nug unuqoran. ‘Tiwur, da na kena sam eko anirina, keřdi da danah la kunum sillah kawa. Da yawssen danah kawa, sak nou sak danah kawa, danah la walgar diko weiyak danah kawa, am takis wak danah ene sillah kawa. ¹² Da kuha usihwa kurdako arit patina am keke kunum wina ge watiwi ameg ¹⁰ qere new ameg usih qe na mirina,’ elle unuqoran. ¹³ Gam takis wak danah ge lawař asko delle saw karan

os ole pi amnan, gam eweg damkowa meko delle unuqoran, 'Tiwur, da hipunin danah. Na dasil ot dow hipunin dasil kusuqka mir,' eko anan. ¹⁴ Da anarina. Takis wak danah qe Tiwur hipunin nusig noh kusqew Tiwur nohwa danah mangu delle lougwa atan. Gam Farisi danah ge qere kawa. Ke'rdi oun due nug wénih ole ge, Tiwur sew nug wénih kawa darig. Am oun nug due nug wénih kawa ge, Tiwur sew nug wénih ole darig," eko anan.

Yesus Nir Nounu Wittak Kena Maran

¹⁵ Danahas Yesus nir yu feflagwa eweg meko wittak kena mardigri dieksi dog. Sén Yesus bégur ag piareksi ge, ga'ra mareg. ¹⁶ Gam Yesus nir nounu urwarew nugrowa doweg ge anan. "Nir nounu parwarweg dagrowa dos. Ag aw dagarweg. Ke'rdi danahas nir nounu ene sillah qe Tiwurdi Kingdom ge asilag. ¹⁷ Da me'renah anarina. Danahas are nir nounu ene sillah ag Tiwur kallowa pi dalag ge, ag Tiwurdi Kingdom owa ospi noweg," eko anan.

Yuda Dilag Kuri Danah Kéhu Ole

¹⁸ Yuda dilag kuri danah os Yesus ko'moran, "Duak marak danah kena, da aregnah seko foumak sansan diakri uril?" ¹⁹ Yesus ko'rewa oko anan, "Na ke'rdi dasil kena eka anam? Ounté kena os kawa. Tiwur nug nugé ih kena. ²⁰ Na Tiwurdi Ro

10 dona: 'Na watnah dewew as la ole aw weiwes, danah aw dug kowen, yawsen aw sewen, né dar aw mewen, am anin memen ole kallolaswa denna ko'flas dimlamur,' " eko anoran. ²¹ Anew kuri danah qe anan, "Ro qe kunum ole da nir nagurwa delle dimlamurwi uríyan," eko anan. ²² Sén Yesus né qe doko ge anoran, "Na ih usih os tuqren. Na kéhun kunum anwe daren meweg am qarég oka o duak danah marka ge, na saw kappari wittak kena qe urip. Qere seka ge, doka da dimlamir," eko anan. ²³ Gam nug danah kéhu na'ri ole géri, sén Yesus qere anew doko ge neko qan. ²⁴ Géri Yesus danah qe neko qew peko anan, "Danah kéhu ole os keke nusig kunum minko Tiwurdi kingdomwa nurigri ge kug ole. ²⁵ Me'renah, do' na'ri wénih kamel ge keke titiyakri nil o'rewa nurigri ge kug ole, gam danah kéhu ole ge Tiwurdi kingdomwa nurigri ge kug qe érdak." ²⁶ Danahas né qe dueksi Yesus ko'moreg, "Am oun ge foumak sansan diakri urig olele?" ²⁷ Yesus ko'mak noh meko anaran, "Ke' os danah sakri olele kawa ge, Tiwur ge sérig olele," eko anan. ²⁸ Anew Pita anoran, "Ig na dimlamir nigri keke isangar kunum minaret," eko anan. ²⁹ Anew Yesus anaran, "Da me'renah anarina. Danah os nug Tiwurdi kingdomri seko loug minko,

waw minko awgur kamgur minarko, anig memeg ole am nir nusgur minarko asdig ge, ³⁰ nug sén wan ewa dewew saw kappari wittak kena kuřum tatam moran qe erđak murdig am keřew né founak sansan diakri ole murdig,” eko anaran.

Yesus Mousko Am Asdigri Buliko Anan

³¹ Yesus Béгур 12 qe urwarew wanweg agé dessi anaran, “Ig Yerusalem tehut ge, Danah Begari né profet yeg qe kunum mou bérig. ³² Danah ag Danah Bega uksi Yuda danahas kawa la qe ewlagwa melag. Meweg ag geisah nug siwegkolesi uksiuksi qoressi sunu qessi qisleksi am qeweg mousdig. ³³ Gam deř kiamba ge nug buliko asdig,” eko anan. ³⁴ Nug Béгур ag né qe kunum dueg, gam olag ospinah mouran. Né digu lugman, géri ag nug keř eko marian ge sam sillah dueg.

Yesus Danah Ameg Gařwak Ole Sew Kena Man

³⁵ Yesus Yeriko wandigri wanewew, danah os ameg gařu ole ih dougwa ninapirko delle nuqran. ³⁶ Sén nug danahas ameg naři duksi erđeksi ateppeg uttulag doko kořman, “Areg sé?” ³⁷ Danah os anoreg, “Yesus Nasaretrer qe doko wane,” éksi anoreg. ³⁸ Anweg ge, nug uruko anan, “Yesus, Dewit fuřuh, na dasil ot dow pe kéhniř!” eko anan. ³⁹ Danah anqeksi

waneg qe gařa moreksi, “Na torka da,” éksi anoreg. Gam nug qalko urwan, “Dewit fuřuh, na dasil ot duar!” eko anan. ⁴⁰ Yesus fég yako delle nuqak danah qe omalko nugrowa duakri anan. Unaka dow Yesus kořmoran. ⁴¹ “Na da keř sérildi ot nie?” eko anan. Anew danah ameg gařu ge anan, “Nařinah, da amindil ol nie,” eko anan. ⁴² Anew Yesus anoran, “Na amin. Na ot meře mak qewa Tiwur sew kena mam.” ⁴³ Usihri nug ameg koptew ole Tiwur binag melle Yesus dimlamdan. Sén danah kunum qe peksi ge, ag ole Tiwur binag meg.

19

Sakias Takis Wak Danah

¹ Yesus Yeriko taun owa noko ih dimlamurko atan. ² Danah os wénih Sakias nug qewa dian. Nug takis wak danah qe dilag kuri am nug kéhu ole. ³ Nug Yesus ge oun qe perigrinah san gam olele kawa. Keřdi nug danah kutuk am danah kuřum am qataorak. ⁴ Géri nug anuqko guko atko guřaw ker naři os teko Yesus qere wanew perigri qewa ameg meko dian. ⁵ Sén Yesus awen qewa wanko amnew tew peko ge anoran, “Sakias, na ofer ne. Keřdi da gei ole na loutwa daril.” ⁶ Géri Sakias usihri neko gamag asakwa Yesus gamnurelle omlew lougwa ates. ⁷ Danahas kunum qere peksi Yesusri né né marieg, “Nug aregri hipunin

danah enenah lougwa ró até,” éksi aneg. ⁸ Louw ge Sakias asko Nafinahri anan, “Nařinah, na né ene doka. Da keke dasil kunum gam-agwa watiko leis ge o duak danah mardil. Am da oun os darmakwa qarég karđin ge wařos patak noh meko murdil,” eko anan. ⁹ Yesus anoran, “Gei ole Tiwur na fénarwa ole dilag hipunin noh kusqé. Am danah ene ole Abraham fuřuh. ¹⁰ Qeri Danah Bega nug oun os gattu owa de qe mariko peko buliko ow Tiwurdi uřibak éřurdigri uřiyán,” eko anan.

Kekuak Nir 10 Dilag Né Tonak

¹¹ Yesus né qe mariew dueppég, nug Yerusalem mourak nuan am danahas ag Tiwurdi Kingdom usihri wanwa bérig éksi dahmeg. Géri Yesus né tonak ene anaran. ¹² “Danah binlag ole qe fuřuh os atu una oswa atew king darigri wittak morew uřirigri atan. ¹³ Géri nug kekuak nir nusgur 10 qere anew nowég usih usih qarég gol mina* awen awen qere maran. Marko ge anan, ‘Qarég ene uksi kekuak moreppég da buliko uřiril,’ eko anaran. ¹⁴ Gam danah nusgur os danah naři qeri olag pi nian ole qe danah la os nug dimugri meřarweg danah naři qe atanwa ateksi, ‘Ig danah ene king isanig diakri onig pi nie,’ ellagri ateg. ¹⁵ Gam nug king beko buliko kawagwa

uřiyán. Uřiko ge, kekuak nir nusgur 10 qere qarég maran ole qe dilag né man. ‘Ag qarégwa kekuak areg seg?’ qe dorigri kořmaran. ¹⁶ Kekuak nir anuqko duan qe anan. ‘Danah naři, qarég na miřen qe kekuak murwi qarég gol mina 10 la ole qařewa ban,’ eko anoran. ¹⁷ Anew king nusig doko ge anan, ‘Kena sen. Na kekuak nir dasil kena. Na qarég nagurwa kekuak kena sen, géri gei na taun ten qere gumardipri anina.’ ¹⁸ Am ařit patak qe doko anan, ‘King dasil, qarég nasip kekuak murwi qarég gol mina tanig ole la qařewa ban,’ eko anan. ¹⁹ Anew ge king nusig anoran, ‘Na taun tanig ole gumardip.’ ²⁰ Am kekuak nir kiam patak qe doko anan, ‘King dasil, qarég gol mina usih nasip na miřen ge enan. Da lamén qariwa saputko pesorko méwi dian. ²¹ Na danah gagřan ole. Keř os na pi kehna qe na funa, am danah la os keke mési qe ole na ona. Qeri da na fařirko qere sein.’ ²² King nusig qe kořewa oko anoran, ‘Na kekuak nir nou am né nasip dimlamdak ge séwi noh urip. Na duen ge da danah gagřal ole am danah la os keke mési qe da wina am danah la kéhsi qe ole da fuina. ²³ Na keřdi qarég dasil buliko uřiko qařewa noh la ole olem, gam na qarég lougwa pi

* 19:13 19:13 Mina usih ge kalam kiam kekuakri noh olele.

men?' eko anan. ²⁴ Anko ge, danah aseksi deg qe dilag anan, 'Qarég nusig kardeksi danah qarég gol mina 10 la qaréwa sew ban ole qe mores.' ²⁵ 'King na'ri, nug qarég gol mina 10 ge ifil wé,' éksi aneg. ²⁶ Anweg anaran, 'Da anarina, oun os ke' os pesorko gumdig ge, fou la ole urig. Gam oun os ke' nagur ole am nouni gumdig ge, da nug qe ka'urdil. ²⁷ Gam keger' dasil da king asilag diakri mineg ole qe diareksi duksi da nolwa aqares,' eko Yesus anaran.

Yesus Yerusalem Nuan

²⁸ Yesus qere anko ge, Yerusalem attigri anuqko atan. ²⁹ Yesus kaw a'rit Betfage am Betani ole Oliw qouku éksi ansi qe sékuwa dasa qe mouratak wanan. Wanko ge, béku' a'rit me' atew anqeksa atepes anatan. ³⁰ "A kaw uniwa ateksa waneksa ge, donki os fou kena mak ounté os pi teko weiyen ole qe qagak dewew pelas. Peksa ge, kusqeksa oksa u'riyes. ³¹ Oun os a ke'rdi donki kusuqsa eko ko'mew ge anores. 'Na'rinah kekuak murdigri kusuqru,' eksa anores," eko anan. ³² Béku' a'rit qe ateksa ge nug anan qe sillah ole pes. ³³ A donki fou kena mak qe kusqepes donki memeg ko'mateg. "A ke'rdi donki kusuqsa?" éksi aneg. ³⁴ A ko'mak noh meksa anes. "Na'rinah kekuak murdigri," eksa anares. ³⁵ Géri donki

oksa Yesus dowa u'riyeksa ge, siot asilas qaréwari qe u'reksa donki qaréwa duqessa, Yesus eweg o'rawes teko donki karan dian. ³⁶ Yesus donkiwa atewew, danahas siot asilag qaréwari u'reksi ihwa duqareppeg nug qaréwa atan. ³⁷ Sén nug Oliw qouku minko nuakri ih qewa dowew ge, nug bégur dimlamdeg qe kunum ole olag gamag asakwa diguméksi qaleksi Tiwur binag sumeg. Ke'rdi ag Yesus mirakel sew piareg. ³⁸ "King Tiwur Na'rinah wénihwa u'riye ge nug wittak more. Saw kappa Tiwur ole maror nirig am Tiwur karannah nug binag karan sumnig." ³⁹ Am Farisi la os danah ameg na'ri qe owa deg qe Yesusri aneg, "Duak marak danah, na begpar ga'ra marwe mines," éksi aneg. ⁴⁰ Yesus noh meko anaran, "Da anarina. Danah ene torweg ge, qar ko'rlag koptew urwessi binag sumlag," eko anan.

Yesus Yerusalemri Kuanan

⁴¹ Sén Yesus atko unaka wanko Yerusalem taun na'ri qe peko ge, o dow kuanelle anan. ⁴² "Yerusalem danahas, ag olag duaknah! Ag Tiwurdi maror owa kena diakri qe dollewri kenanah. Gam ag amlag ga'rwé dasi. ⁴³ Sén qe u'riyew ge, keger' asilag fanlag u'riyeksi ka' asilag taliloreksi wan qagulweg tew, o mareksi dalag. ⁴⁴ Am taun asilag log'reksi

ag aqeksi keke kunum ole seweg nou mérig. Am qar usih os minweg lia qařewa ospi dew. Keřdi ag sén Tiwur agrowa urıyan ge, peksi olag pi mouran,” elle kuanan.

Yesus Tiwur Lougwa Duak Maran

⁴⁵ Yesus Yerusalem noko Tiwur Lougri kař owa atko qewa danah keke irardi méksi deppeg nug piarko ge digumeko lamaran. ⁴⁶ Nug ere anelle lamaran, “Tiwurdi Né yak ere ane, ‘Da loul ge unuqorakri lo.’ Gam ag seweg yawsen danah dilag lariak awen sillah beko se,” eko anan. ⁴⁷ Nug sansan Tiwur Lougri kař owa danahas doulag patté. Gam pris dilag anqak danah, Mosesri Řo duak danah am Yuda dilag kuri danah ole ag Yesus qeweg mousdigri ih mariréw. ⁴⁸ Gam ag ih ospi peg, keřdi danahas kunum né nusig dolagri seréw.

20

Kuri Danah Yesus Kuakri Wittak Sew Pelagri Kořmoreg

¹ Deř os Yesus Tiwur Lougri kař owa danahas duak marelle am Né Kena kuswewew, pris dilag anqak danah, Mosesri Řo duak danah am Yuda dilag kuri danah ole duksi anoreg. ² “Na anwe ig duet. Na kuakri wittak arwari oka Tiwur Lougwa kuak ene sena? Na oun kuakri wittak qe mirew sena?” ³ Nug

kořlagwa oko anan, “Da ole ag kořmardil. ⁴ Ag anweg due, Yon le luaran ge kuakri wittak Tiwur dowari te, kawa danah dowari te oko san?” ⁵ Ag agégé marieksi aneg, “Saw kappari ektu annig ge nug kořmigdig. ‘Ag keřdi nusig kuak qeri olag mére pi man?’ ⁶ Am ig Yonri kuakri wittak danah agopri éktu annig ge danahas uni kunum qar uksi kuiglag, keřdi ag olag mére me ge Yon ge Tiwurdi profet.” ⁷ Géri ag Yesusri aneg, “Arewari té ge ig pi dotu.” ⁸ Qeri Yesus anan, “Da ole oun kuakri wittak miréw kekuina ge ospi anwi doweg,” eko anan.

Wain Dar Gumak Danah Nou Dilag Né Tonak

⁹ Am Yesus né tonak ene danahas amlagwa anan. “Sén danah os wain dar naři kehko am nug danah os wain dar nusig gumeksi morlagri mine marelle ge, nug atu una oswa atko wagam darigri atan. ¹⁰ Wain mou wegak sénwa nug sew kekuak nir nusig os wain dar gumak danah qe agop wain mou os morlagri atan. Gam wain dar gumak danah qe mouřweksi anweg eweg sam buliko atan. ¹¹ Nug kekuak nir la anew atan, gam qe ole mouřweksi nouni sorweg eweg sam am buliko atan. ¹² Wain dar memeg kiam patak kekuak nir os mew atew ge, mouřweksi karag moreksi keigorweg dar dindim atan.

13 Géri wain dar memeg anan. ‘Da aregnah séril? Da nir dasil ol mouse ole qe attig ge, né nusig dueksi dimlamurlag té,’ elle anew wain dar gumak danah qe agop atan. ¹⁴ Gam sén wain dar gumak danah dar memeg nag qe peksi ge, ag agégé né qageksi aneg. ‘Danah ene wain dar memeg mérig. Doweg qéhut mousew dar qe isanig darig,’ éksi aneg. ¹⁵ Géri keigoreksi berweksi dar dimdim ateksi qeweg mousan. Qeri wain dar memeg ge aregnah sardig? ¹⁶ Nug uriko wain dar gumak danah qe sew aqarweg mousweg am dar oko danah la gumlagri mardig,” eko anan. Sén danahas né tonak qe dueksi ge aneg, “Qere aw bew.” ¹⁷ Yesus kittarko delle kořman, “Qere ge Né yak ene digu areg? ‘Lo fuak danah wandor mineksi gerdeg ole qe lo memeg wandor qe oko gamagwa lagew delle lo mawe.’ ¹⁸ Danah wandor qe qaréwa tolalag ole ge, kunum ole kadurlag. Am wandor qe oun os qaréwa tolarig ge, madufew nounu nérig. Qe sillah, oun os nug da dimirdig ge nug paral mérig,” eko anan. ¹⁹ Mosesri Ro duak danah am pris dilag anqak danah ole ag dueg ge, né tonak qe asilag nou qe urameko marian. Géri sén qewa ih ag ih os peksi oralagri seg, gam ag danahas dilag fareg.

Yuda Danahas Sisari Takis Melag Te?

²⁰ Mosesri Ro duak danah am pris dilag anqak danah ole ag Yesus karéordéw. Géri ag danah os darmak danah anweg danah mangu sillah ateksi yawsen amneksi Yesus pelag ateg. Ag nug keř os nouni anew qewa orweksi wan atu dilag kuri danah kuakri wittak morak am gagragsak ole qe ewegwa melagri ateg. ²¹ Géri yawsen amnak danah qe Yesus kořmoreg. “Duak marak danah, ig dotu ge na né mangu ih marina, ismigna am na danah kunum nouni ospi sarna. Am na né meře Tiwur danahas areg dalagri o nie qe ismarna. ²² Na an, ig sétu sillah Sisari takis tourgnig kena te, kawa te?” ²³ Yesus darmak dahmak asilag qe doko anaran. ²⁴ “Qarég silwa os seweg pewi. Oun dorogrog am wénih ole qewa de?” eko kořmaran. ²⁵ Ag kořewa uksi aneg. “Sisa dorogrog am wénih ole.” Nug anaran, “Aria! Sisari ge Sisa mores, am Tiwurdi ge Tiwur mores,” eko anan. ²⁶ Ag Yesus né nouni os anew dolagri dahmeg, gam sén nug danahas ole dessi nug né nouni usih ospi anew dueg. Ag nug né noh man, qeri dorlag new ole toreksi deg.

Mousko Am Dimba Diakri Kořmak

27 Sadusi* os danah mouseksi am bulieksi pi asweg éksi andéw ole qe uriyeksi Yesus kořmoreg. 28 “Duak marak danah, Moses Ŕo isanig yan ge danah os mousko as nir kawa mundew ge, kamag as qe oko awagri nir os memandig. 29 Sén os awag kamag 7 qere daréw, géri awlag digam as os wan, gam as qe nir kawa dewew gému qe mousan. 30 Mousew am dimugwari qe wan, am qe ole as nir kawa dewew mousan. 31 Qe sillah kiam patak am atko 7 patak qe kunum ole as qe og, gam nir kawa dewew mouseg. 32 Qe dimba as qe ole mousan. 33 Am buliko sirak sénwa as qe awag kamag 7 qe kunum og, géri as qe oun waw darig?” éksi kořmoreg. 34 Yesus né qe noh meko anan, “Danahas wan ewa dasi ag nug usi. 35 Gam Tiwur sew danahas mousak sireksi foumak olag ole qe nug wak ospi niew. 36 Ag saw doup sillah dalag, géri ag ospi mousweg. Ag Tiwurdi nir dalag, keřdi ag Tiwur sew sireksi foumak olag. 37 Am Moses ole ker nagur os ařakri né yakwa ismige ge, mousak bulieksi sirlag. Qeri nug Nařinah Tiwurdi ere anan, ‘Abrahamri Tiwur, Aisakri Tiwur am Yakopri Tiwur ole,’ eko anan. 38 Géri ig

Mosesri né qewa dotu ge Abraham, Aisak am Yakop ge Tiwur ole fou dasi. Keřdi mousak danah Tiwur binag pi mési, gam danah fou dasi qe Tiwur binag mési. Keřdi nug nohwa danahas nusgur ge kunum fou dasi,” eko anan. 39 Mosesri Ŕo duak danah os Yesusri aneg, “Duak marak danah, na né noh mangu anam.” 40 Qeri ounté kořmak fou la ole ospi san.

Yesus Dewit Fuřuhri Kořman

41 Am Yesus kuri danah qe kořmaran, “Aregri ere ansi Kristus† ge Dewit fuřuh? 42 King Dewitri Kasi Yakwa ere ane, ‘Nařinah Tiwur, Nařinah dasil Kristusri anan: Na ewel kenariwa deppe, 43 da keger nasip taparko séwi nuksi na kallonwa dalag,’ eko ane. 44 Dewit nug ‘Nařinah,’ eko anore, gam areg nug Dewit fuřuh darig?” eko kořmaran.

Yuda Kuri Danah Dilag Kowol Nou

45 Danahas kunum dueppeg Yesus bégur dilag anan. 46 “Ag Mosesri Ŕo duak danah dilag dahmes. Ag feřlag bala welah kena méksi maket awenwa weiyeppeg danahas piareksi felqarlagri sési. Am Yuda dilag binag mak lowa danah wenlag ole dasiwa dalagri sési. Am mallen

* 20:27 20:27 Sadusi pris ameg os danah mouseksi pi bulieksi assi qeri olag meře me. † 20:41 20:41 Kristus ge Mesaia. Tiwur danahas nusgur buliko diardigri danah toqoran.

sénwa danah wenlag ole dilag diak awenwa dalagri sési. ⁴⁷ Ag as qehrás dilag keke kunum darmak ihwa memeg mési am qe tonlagri dessi unuqorak welah welah sési. Danah qere ge sak nou noh asilag qe nouninah mardig,” eko anan.

21

As Qehrás Ofa Man

¹ Yesus Tiwur Lougwa delle danah kehlag ole Tiwurdi ofa mak awenwa qarég meppeg piaran. ² Am nug as qehrás os o duak ole qarég 10 toia arit ih ole mewew pian. ³ Peko ge nug anan. “Da meřenah anarina. As qehrás uni o duak, gam nug qarég ofa mé ge, danahas uni kunum érarak naři mé. ⁴ Danahas la kunum ge qarég asilag naři dewew am qarég sirin ge méw, gam as uni ge o duak as gam nug keř os oko lellori sillah ge qarég qe kunum ole mé,” eko anaran.

Tiwur Loug Qiko Nérig

⁵ Sén qewa nug bégur os aneg. “Tiwur Loug ene qar kena kenawa fueg am Tiwurdi ofa meg qewa bala moreksi koutoreg,” éksi aneg. Gam Yesus anan. ⁶ “Sén os uriyew ge, keke kunum pesi qe qiko neko kaddurđig am qar usih os lia qařewa ospi dewew peweg,” eko anan.

Yesus Kug Uřirig Qeri Anan

⁷ Ag kořmoreg, “Duak marak danah, na anam keke qe ganehnah bérig? Ig kėrnah pektu am donig ge qe bérigri sén unaka de?” ⁸ Yesus anan, “Geisah ag darmarwegra, dahméksi koutores. Geisah danah kuřum da wėnilwa béksi ‘Da Kristus,’ am ‘Geiri kuagrak sén uriko malwé,’ éksi anlag. Gam danah qe aw dimlamarweg. ⁹ Sén ag wan atu oswa fan neihwah am karak neihwah dueksi ge, ag aw farweg. Keke qe tatam belag, gam malwakri sén qe ofer ospi bew.” ¹⁰ Yesus buliko anaran, “Wan atu os asweg wan atu la ole fan selag am king os asew king la ole fan selas. ¹¹ Mim naři atu kuřumba nérig am atu kuřum laké naři niewew kousarlag am waře nouni ole belag. Am saw karan fařakri keke am kowol wagé wagé ole béksi atlag. ¹² Gam keke qe kunum pi bak dewew, ag da dimlamiřlag qeri orwareksi berwareksi Yuda dilag binag mak lo owa nolag am gurak maressi nouni saressi kalabuswa yanarlag. Am ag dieksi king am wan atu dilag kuri danah agop ole wanlag. ¹³ Sén qewa ag dasil olag meře me qe ag anarlagri sén darig. ¹⁴ Qeri ag olag meře mak gagrag diar. Ag keř éksi anarlagri tatam aw dahmeweg. ¹⁵ Da ag kegeř asilgar dilag né noh melagri né am dahmak kena ole mardil. Qeri ag kegeř asilgar né asilag ospi qeweg new

am ospi kotarweg. ¹⁶ Sén qewa ag da dimlamiflag, qeri ag memelgar anilgar am awalgar kamalgar am leilgar ole keger marlag. Am geisah ag la os ge aqarweg mouslag. ¹⁷ Ag da dimlamiflag, qeri danahas ku'rum asilag olag nou mew keger marlag. ¹⁸ Gam ag kurlag urug usihnah ospi larium, qeri ag aw farweg. ¹⁹ Ag da dahuhul dalag ge, ag founmak sansan diakri olag."

Yerusalem Taun Logardig

²⁰ "Sén ag fan danah uriyeksi Yerusalem o morweg peksi ge, ag dolag ge wagam kawa nug logarlag. ²¹ Sén qewa danahas Yuda dalag ge, kum oleksi qoukuwa ates. Am danahas taun qewa dalag ge, taun qe mineksi kum ates. Am areg os taun dimdim dalag ge, aw bulieksi owa noweg. ²² Kerdi sén qe Tiwur Yerusalem danahas kug asilag qe noh mardig am Tiwurdi Né yakwa nie qe kunum ole mou bérig. ²³ Sén qewa ge, as olag ole am nir yu ole ge kug narinah pelag, kerdi ag kum atakri olele kawa. Kerdi kug narinah atu qewa bérig am Tiwurdi uhribak danahas qewari dilag qe noh meko mardig. ²⁴ Danahas os ge fan barinwa kotfarlag. Am os ge orwareksi diareksi wan atu la kunumba kalabuswa atlag. Am Yerusalem taun ge Yuda danah kawa danah

la qe tutuweg atew Tiwur sén moran qewa pattig," eko anan.

Danah Bega Buliko U'ririg

²⁵ Yesus buliko anaran. "Sén qewa kowol os kamba kalamba am sorwewa ole beweg piarlag. Wanwa danahas kunum iw korkor nari qelle urwag nérig qe dueksi olag farweg am dahmak karwarew kite ospi seweg. ²⁶ Danahas ku'rum wan ewa ker bérig qe peksi olag farweg amlag taririg. Kerdi saw karan keke gagragsak nari ole qe kunum saharlag. ²⁷ Sén qe ge Danah Bega da lombigwa gagragsak nari ole am kamsahlak nari gun olewa uriyepi kunum peirlag. ²⁸ Sén keke qe kunum digumeko bewew ge, ag gagrag méksi aminweg karan tew des, kerdi Tiwur ag gattu owari buliko diarko kusqak mardigri sén unaka durig," eko anan.

Gu'raw Kerdi Né Tonak

²⁹ Yesus né tonak ene bégur anaran. "Gu'raw ker am ker la ole piores. ³⁰ Sén ker qere lounweg ge, ag agégé dolag qe kem sén durig malwe. ³¹ Qe sillah, da aném qere bew peksi ge ag dues. Wagam kawa ge Tiwurdi Kingdom bérig*. ³² Da mefenah anarina. Geiri danahas pi mousak deppeg keke aném qe kunum bérig. ³³ Wan saw ole ge qero'rdig, gam né

* 21:31 21:31 Tiwur danahas nusgur dilag king delle gumardig.

dasil ge nagurnah ospi kawa mew.”

Yesus Buliko Uririgri Dahmessi Des

³⁴ “Dahmessi des! Ag ke lelle am le leko gar qakri aw dahmeweg. Ag wan ewa kena diakri nañi aw dahmeweg. Ag kowol qere séssi dalag ge, da agrowa pi dueppeg uriril. Keñdi dasil uriyak deñ qe pelem sillah darig. ³⁵ Geisah wanwari danahas kunum kug qewa dessi pelag. ³⁶ Dahméksi koutoressi am bulibuli Tiwurdi unuqorweg gagrag qarar. Qewa ge, kug belag qe erdessi deppeg Danah Bega da uríwi nolwa sirlag,” eko anaran. ³⁷ Yesus kemunwa deñ dorog Tiwur Lougwa duak mardé. Am tuqan ge nug atko Oliw qoukuwa daré. ³⁸ Danahas kunum furwanah Tiwur Lougwa Yesus duak mardigri qag-uldéw.

22

Yudas Yesus Keger Ewlagwa Mérigri Ih Marian

¹ Yuda dilag mallen beret yis kawa oleri wénih Nanúrak Deñ* qe unaka duan. ² Am pris dilag anqak danah am Mosesri Ró duak danah ole ag danahas fañareksi larieksi Yesus orweksi qeweg mousdigri ih marieg. ³ Sén qewa ge, nou memeg Satan, Yesus Béгур 12 qe olagwa usih os

wénih Yudas Iskariotrer qe owa nuan. ⁴ Now ge Yudas atew pris dilag anqak danah am Tiwur Loug gumakri felag tutu dilag kuri danah ole Yesus areg ag ewlagwa mérigri né marieg. ⁵ Qeri ag olag gamag asew Yudas qarégwa daren morlagri né fag qeg. ⁶ Yudas ag aneg qeri o niew digumeko ih are os peko, danahas pi dueppeg Yesus ag ewlagwa mérigri ih marian.

Yesus Békuñ Nanúrak Deñdi Ke Bawres

⁷ Yuda dilag mallen beret yis kawa oleri qe duan. Deñ qewa ge Yuda danahas Nanúrak Deñdi sipsip yu aqeksi mallen qewa lelagri sén. ⁸ Yesus Pita Yon ole meñatko anatan. “A ateksa Nanúrak Deñdi ke lakri isanig bawres,” eko anan. ⁹ Gam a koñmores, “Nañinah, i ke arewa bawarnit?” ¹⁰ Yesus anatan, “A Yerusalem taunwa noksa ge danah os le witko mouko wanew pelas. Peksa ge, dimlamurwes lo nug nurig ole qewa nos. ¹¹ Sén a lo qewa noksa ge, lo memeg ere koñmores. ‘Duak marak danah nasip ere ané: Da Beglar 12 qe ole kurug arewa Nanúrak Deñdi ke lenig?’ eksi anes. ¹² Lo memeg ge lo karan awen nañi os tewol ole keke kunum bawrak ismattig. Qewa ge, ig Nanúrak Deñdi ke lenigri bawres,” eko

* **22:1** 22:1 Nanúrak Deñ ge Yuda dilag mallen os. Sén Yuda danahas Isip darew qe, mousak nir danah anqakri nanñaran qe dahmorakri sén.

anatan. ¹³ A ateksa ge, Yesus anan qe sillah keke kunum pes. Peksa ge, Nanʼurak Deʼdi ke qewa bawres.

Narinahri Ke

¹⁴ Sén Nanʼurak Deʼdi ke qe lakri dow ge, Yesus aposel† nusgur 12 qe ole lo qe karan ke bawres awen qewa tewol o moreksi ninaqireksi deg. ¹⁵ Dessi ge, nug anan. “Da ol naʼi nie ge ag ole Nanʼurak Deʼdi ke ene léktu tatam am da gurak oko mousdil. ¹⁶ Da anarina. Da Nanʼurak Deʼdi ke fou la ospi léwin atew ole mallen ene digu ambo meko Tiwurdi Kingdomwa bérig,” eko anan. ¹⁷ Anko malako ge, Yesus wain kapwa qériak oko, Tiwurdi kena sam elle unuqorko Béгур dilag anan. “Ene uksi aʼrié les. ¹⁸ Da anarina. Gei digumak da buliko wain ospi léwin atew sén uʼriyew Tiwur wan eneri King bérig,” eko anan. ¹⁹ Am Yesus beret os oko, Tiwurdi kena sam elle unuqorko temew nounu new marko anan. “Ene ge da féʼul. Da asilag seko mardil. Ag ere sesissi da dahmires,” eko anan. ²⁰ Ke léksi malweksi ge, Yesus kap wain ole os oko ge anaran. “Wain kap owa ene da karal. Qewa Tiwur titwanak fou danahas dilag sérig. Da karal qe asilag seko gogoʼrdig. ²¹ Gam ag peksi! Danah da keger ewlagwa meiridig ole qe da ole tewol usihwa aʼrié ke

leʼru. ²² Danah Bega ge Tiwur ih man qewa mousdig. Gam danah oun nug keger ewlagwa mérig ole qe ge nug kug os perig,” eko anan. ²³ Sén Béгур ag né qe dueksi ge, ag agégé ounnah qere sérig essi koʼmeweg wane meweg duan.

Ag Olagwa Oun Naʼi Darig

²⁴ Yesus Béгур ag agégé oun asilag naʼi qeri néwa ih kareg. ²⁵ Karweg ge, Yesus anaran. “King wan eneri ge gagragsak asilagwa danahas gumaressi bilagwa qesi. Am wan ewa danah gagragsak ole qe ag danahas kehnaʼrak danah éksi anarlagri féʼlag mési. ²⁶ Gam ag ge qere aw seweg. Oun os asilag naʼi de ge, nug danah sam sillah ag kallolagwa diar. Am danah oun ag gumardig ole ge nug asilag kekuak nir sillah diar. ²⁷ Qeri da koʼmarina. Oun ge danah naʼi? Danah tewolwa sam dewew ke bawreksi morweg le ole qe te? Kawa, danah ke bawre ole qe te? Ag dosi ge danah tewolwa de qe ge danah naʼi. Gam da ge enan. Ag olagwa danah ke bawarko mare ole qe sillah deina. ²⁸ Ag da ole kug dasil kunumba datu. ²⁹ Géri Mem da king delle danahas gumardilri kekuakri gagragsak miʼran. Qe sillah ag ole danahas gumarlagri kekuakri gagragsak marina.

† 22:14 22:14 Danah os Yesus nugégé toqarko anew kekuak nusig séksi ateg ole qe. Aposel ge Yesusri meʼ danah.

³⁰ Qeri Kingdom dasil owa ag ole tewol dasilwa arié dettu ke am le ole léksi am kingria awen awenwa dessi Israel ater 12 qe gumarlag,” eko anan.

Yesus Pita Nug Dimurdig Qeri Anan

³¹ Yesus Saimonri anan. “Saimon, Saimon, na doka. Reis ulaswa gogreppeg kéwsi am kar ole yalew ate qe sillah Satan o mére mak asilag qeperigri koórman.

³² Gam Saimon, da na ot mére mak pi tolwewri unuqurin. Géri sén na ot buliew dagnewa bulika doka ge, kuak usih leipar olag mére mak gagrag qor,” eko anan. ³³ Anew, Pita anoran. “Nařinah, da na dimlamirwi ole arié kalabuswa atnit am mousnitri ole bawrém deina.” ³⁴ Yesus kořewa oko anan, “Pita, da anirina. Na keřew furwa maru pi gelak, na kiam patak da pi duiřna eka andip,” eko anoran.

Yesus Béгур Gagrag Dalag Anan

³⁵ Qe dimba Yesus Béгур dilag anan. “Sén tatam da kuak marwi ateg ge, ag qarég yanakri sogot, baram, am félag gařa aw oweg eko anin. Sén qewa ag kitéri os qagreg te?” “Kawa,” éksi aneg. ³⁶ Yesus anaran, “Gam gei ge oun os sogotwa qarég ole ge war am baram ole os. Am oun os fan barin kawa ole ge siot qařewari qe qarégri mew oweg am fan barin os daren mar. ³⁷ Tiwurdi Né

yakwa ane, ‘Danahas nug řo tapewnak danah sillah peg.’ Am Né yakwa dasil ane qe olele murdig am dasil Né yakwa ane qe sén mou bérigri qe unaka do,” eko anan. ³⁸ Anew nug Béгур aneg, “Nařinah, fan barin ařit enan,” éksi anweg am Yesus anan. “Malwew, qe olele,” eko anan.

Yesus Oliw Qoukuwa Unuqoran

³⁹ Yesus sansan seré sillah Oliw qoukuwa atewew Béгур ole dimlamurweg arié ateg. ⁴⁰ Ateksi ge, Béгур anaran. “Ag qepiakwa pi tolaweg qeri Tiwurdi unuqores,” eko anan. ⁴¹ Nug Béгур minarko nagur lawař qar touřweg atko qe, qe sillah wanko ge gatewa yako delle unuqoran. ⁴² Unuqorko anan, “Mem, na ot niew pe, na kug nařinah wiřdig ene moutina miř. Gam da ol mourak aw dimlamurwen, na ot mourak qe dimlamur,” eko anan. ⁴³ Anew ge, saw kappari Tiwurdi doup os gumurko doko nug gagrag qoran. ⁴⁴ Yesus kug nařinah doko gagrag unuqoran. Unuqorewew ge séfi qeko karag sillah katré katré wanwa nan. ⁴⁵ Nug unuqorak malako asko ge, buliko Béгур agop wanan. Wanko ge, ag olag kug qew usnieppeg piaran. ⁴⁶ Piarko ge anan, “Ag keřdi usnisi? Aseksi qepiak uřiyew tolawegra unuqores,” eko anan.

Yesus Orweg

⁴⁷ Yesus né mariewew, danah ameg nañi teg. Yesus Béгур qe olagwa usih os wénih Yudas qe omlarew teg. Nug Yuda koulagwa Yesus kiss murdigri unaka wanan. ⁴⁸ Wanew Yesus anoran, “Yudas, na Danah Bega da keger ewlagwa méirdipri te kiss mir̄dip sena?” ⁴⁹ Sén Yesus Béгур ag kug bérig sew peksi ge, kořmored. “Nañinah, ig fan barinwa fan sénig te?” ⁵⁰ Béгур qe usih os fan barinwa pris dilag kuri danahri kekuak nir doug kenari qe seiyan. ⁵¹ Yesus qere peko ge anan, “Aw! Malwam genan,” elle doug oko meko lamsiew buliko duřduan. ⁵² Yesus pris dilag anqak danah, Tiwur Lougri felag tutu am Yuda dilag kuri danah ole nug ořalagri uřiyeg qe dilag anan. “Ag tapewnak danah te ořalagri fan barin am ker qetak ole kahweksi uřiyew?” ⁵³ Da ag ole deř dorog Tiwur Lougwa daram, gam ag da ospi uřwileg. Am gei ge asilag sén gatturi gagragsak ag gumare,” eko anaran.

Pita Yesus Pi Duina Eko Anan

⁵⁴ Anko malwew ge, Yesus ořweksi omleksi pris dilag kuri danah qe lougwa ateg. Ateppeg ge, Pita nug dimqeko nagur lawař qere dimlamaran. ⁵⁵ Danah os kař owa lo ihřamba kew yaleksi uřgessi deppeg, Pita ole wanew qere kew

o moreksi deg. ⁵⁶ Lo qe-wari kekuak as os Pita kew uřgelle dewew peko kit-turko de de ge anan. “Danah ene ole Yesus dimlamdak weiréw,” eko anan. ⁵⁷ Gam Pita anan, “Kawa, da danah qe pi duina,” eko anan. ⁵⁸ Am wagam kawa danah os peko anan, “Na os ole enan,” eko anan. Anew Pita anan, “Kawa, da ole kawa.” ⁵⁹ Kem ameg usih keke qere atew ge, danah os gagrag anan. “Meřenah! Danah ene Galilirer, qeri nug Yesus ole weiréw,” eko anan. ⁶⁰ Anew Pita noh meko anan, “Na kitéri té marina ge da pi duina,” eko anewew ole maru gelan. ⁶¹ Sén qewa ole Nañinah buliko mangu ole Pita amegwa amnan. Pew ge Pita Nañinah ere anoran qe dahmoran. “Na keřew furwa maru pi gelak, na kiam patak na da pi duiřna eka andip,” eko anan qe dahmoran. ⁶² Pita dimdim wanko delle ge, owa qetko atew qalko kuanan.

Yesus Siwegkolessi Uksiuksi Qoressi Am Koreg

⁶³ Tiwur Lougri felag tutu Yesus gumessi deg qe nug diguméksi siwegkolessi am koreg. ⁶⁴ Ag Yesus lamenwa ameg qageksi koreksi am kořmored. “Na profet daka pe, anwe duet. Oun na kuiré?” ⁶⁵ Ag né nouni kowol kowol Yesusri aneg.

Yudari Kuri Danah Dilag Qaglakwa Yesus Kořmored

⁶⁶ Kuagrëw ge Yuda dilag kuri danah, pris dilag anqak danah am Mosesri Ró duak danah ole qagulweg ge, Yesus omleksi qaglak qewa waneg. ⁶⁷ Kuri danah wagé wagé qe Yesus kořmoreg. “Na anwe duet. Na Kristus† qenan te?” éksi aneg. Yesus kořlagwa oko anan, “Da anwi ge, ag dasil olag meře ospi mew. ⁶⁸ Am da os ag kořmardil ge, ag né qe noh ospi meweg. ⁶⁹ Gam gei digumeko atak Danah Bega Da Tiwur gagragsak ole eweg kenariwa daril,” eko anan. ⁷⁰ Anew danah wagé wagé qe kunum bulieksi kořmoreg. “Qenan géri na Tiwur Bega te?” éksi anweg, nug anan. “Ag anéw ge da qenan.” ⁷¹ Qewa danah wagé wagé aneg, “Ig né gagrag qorakri né la ospi marihut. Ig igégé nou nusig qe nug kořewa duam qe olele,” éksi aneg.

23

Yesus Uksi Pailot Dowa Ateg

¹ Yudari kuri danah wagé wagé qe kunum qaglakwari aseksi Yesus omleksi Pailot* dowa ateg. ² Qewa ge nug diguméksi yagoř moreksi aneg. “Ig danah ene danahas isangar nouni omlardig sew pet. Am Sisari takis pi tourwegri doulagwa nolle am ole nug ane, ‘Da Kristus am da king,’ eko anew

orwektu uktu uriyam,” éksi aneg. ³ Géri Pailot Yesus kořmoran, “Meře te na Yuda danah dilag king?” Yesus né noh meko anan, “Na anam qenan.” ⁴ Pailot pris dilag anqak danah am danah ameg naři ole dilag anan. “Da danah ene piém ge nug kité nouni ospi san.” ⁵ Gam ag duessi bulibuli gagrag aneg. “Nug Yudia atu kunumba weiyelle né mariyelle danahas olag ye. Nug Galili tatam diguman am gei ge ewa uriyam se,” éksi aneg.

Yesus Uksi Herod Dowa Ateg

⁶ Sén Pailot qere doko ge nug kořmaran. “Danah ene Galilirer te?” ⁷ Ag kořewa uksi aneg, “Yo, nug Galilirer.” Pailot qe doko ge, ag Yesus uksi king Herod dowa ates eko anaran. Keřdi Herod nug Galili gumdé am sén qewa Herod nug ole Yerusalem dian. ⁸ Sén nug Yesus peko ge, o gamag naři asan. Keřdi nug Yesus neihwah mařiweg doko sén welah perigri o nian. Am nug Yesus mirakel os sew piardigrinah dahmeré. ⁹ Qeri Herod Yesus kořkoř moran, gam Yesus kořewa ospi wan. ¹⁰ Pris dilag anqak danah am Mosesri Ró duak danah ole qewa dessi ge, Yesus gagragnah yagoř moreg. ¹¹ Qe dimba Herod fan danah nusgur

† 22:67 22:67 Kristus ge Mesaia. Tiwur danahas nusgur buliko diardigri danah toqoran. * 23:1 23:1 Pailot nug Rom danah am Yudia wan atu qe gumdé.

ole Yesus uksiuksi qoressi siwegkolesi kingri bala kena urwurweg now uksi Pailot dowa bulieksi ateg. ¹² Tatam ge Herod am Pailot ole a olas usih pi daré, gam deŕ qewa ih ole a liam pates.

Pailot Yesus Ker Mawanakwa Katullag Anan

¹³ Pailot anew pris dilag anqak danah, danahas gumarak danah am danahas ole qagleg. ¹⁴ Qagulweg nug anaran, “Ag danah ene uksi dagnéwa uŕiyeksi anéw, ‘Nug danahas isangar nouni omlardigri olagwa ye,’ éksi anéw. Gam da ag nolagwa koŕmorko piém ge, ag yagoŕ moreksi aneg sillah nug kité nouni ospi san. ¹⁵ Qeri Herod ole qere peko mew buliko ignéwa uŕiyé. Danah ene anwi qeweg mousdigri sillah kité nouni ospi san piém. ¹⁶ Qeri da anwi siwirwa qisleksi am paŕoweg attig.” ¹⁷ (Pailot qere anan, keŕdi sansan Nanŕurak Deŕwa kalabus danah usih os danahas ag nusig olag nie ole qe paŕoweg doko dimdim ate.) ¹⁸ Gam danahas kunum urweksi aneg. “Danah qe qewe mousar! Barabas matulwe do migar!” ¹⁹ Barabas nug sew Yerusalem taun gumak danah Yuda dilag danahas ole karak naŕi seg am nug danah os ole qew mousan. Qeri nug kalabuswa yaneg. ²⁰ Pailot nug Yesus mundew attigri o dian, qeri buliko danahas koŕmaran. ²¹ Gam danahas

bulibuli urweksi aneg, “Ker mawanakwa katul! Ker mawanakwa katul!” ²² Pailot kiam patak danahas anaran, “Kitéri? Nug keŕ kugnah san, qeri anwi qeweg mousdig? Danah ene qeweg mousdigri sillah kité nouni ospi san piém. Géri qisleksi am paŕoweg attig,” eko anan. ²³ Gam gagragnah urweksi Yesus ker mawanakwa katlakri aneksi Pailotri né qeweg nan. ²⁴ Géri Pailot minko ag aneg qe dimlamurko Yesus qeweg mousdigri anan. ²⁵ Yuda aneg sillah, Pailot anew tapewnak danah Barabas nug sew Yerusalem taun gumak danah Yuda dilag danahas ole karak naŕi seg am nug danah os ole qew mousan, qeri kalabus dian qe matlew duan. Am Yuda olag nian sillah, Yesus ge qelagri Rom fan danah ewlagwa man.

Yesus Ker Mawanakwa Katleg

²⁶ Qewari ge ag Yesus uksi taun dimdim ateppeg danah os wénih Saimon Sairinirer qe uriko taun owa nurig sewew orweg. Orweksi keigoreksi ker mawanak sumeksi guqawa meweg mouko Yesus dimlamdan. ²⁷ Danahas ameg naŕi Yesus dimlamdeg. Qe olagwa as os Yesusri kunnessi dimlamareg. ²⁸ Yesus piarko anaran. “Yerusalem as, ag dasil aw kuanweg. Ag agégé asilag am nir nounou asilgar ole dilag kuanes.

²⁹ Keŕdi geisah sén os uŕiyew danahas anlag, ‘As olagwa nir kawa, as nir pi memnak am as ouma asilag nir ospi lak ole qe ge kena.’ ³⁰ Sén qewa danahas qouku wagé wagé am nounu dilag ole anlag, ‘Ag néksi tonigweg mouset,’ éksi anlag. ³¹ Keŕdi ag da kité nouni ospi séwi am qere sírlag ge, ag ge nouninah sarlag,” eko anan. ³² Sén qewa Rom fan danah tapewnak danah aŕit os Yesus ole aŕié ker mawanakwa katlarlagri diareksi ateg. ³³ Ateksi awen os wénih mousak danah kuri kéwsi éksi ansi qewa ge Yesus ker mawanakwa katleg. Am tapewnak danah aŕit qe os ge kenariwa katleksi am la os ge nanettiwa katleg. ³⁴ Yesus unuqorko anan, “O Mem, hipunin asilag kusuq. Keŕdi danah ene duessi pi sési,” eko unuqoran. Danah ameg naŕi amneksi deppeg fan danah ag oun Yesus féru bala qe urigri ker masawa namba yeksi touressi sagoŕweg. ³⁵ Am Yuda dilag kuri danah Yesusri né siwkolessi aneg. “Nug danahas la ge kehnarko kusqaran. Géri gei ge nug meŕenah Kristus Tiwur toqoran dako pe, nug nugégé kusqak urig,” éksi aneg. ³⁶ Fan danah ole Yesusri né siwkolessi unaka waneksi wain qew morlagri seg. ³⁷ Qere séssi aneg, “Na

Yuda dilag king daka pe, na nagégé kusqak o,” éksi aneg. ³⁸ Karan kuriwa ker mawanakwa ker masa oswa né os ere yak qe dian. “Ene Yuda Dilag King.” ³⁹ Danah nou os aŕié ker mawanakwa katlareg ole qe Yesus okoko qorko anan. “Na Kristus meŕe Tiwur toqiran dew pe, na nagégé kusqak oka am i ole sewe kusqak oŕ.” ⁴⁰ Gam tapewnak danah os ge lia gaŕa morko anoran, “Na nug mousdig sillah ih usih qewa mousdip, qeri na Tiwur pi te faŕurna? ⁴¹ I ge isanit sak nou qe ih noh mawekŕu mousnit, gam nug ge kité nouni ospi san,” eko anan. ⁴² Anko ge Yesusri anan, “Yesus na king beka ge, da dahmir.” ⁴³ Yesus koŕewa oko anan, “Da meŕenah anirina. Na gei da ole paradaiswa† danit,” eko anan.

Yesus Mousan

⁴⁴ Kémun kem ameg 12wa keke qere usihri atu qe kunumba gattu tonko niewew atko tueh kem ameg 3wa keke qere malwan. ⁴⁵ Kem ameg oŕwew gattu tonko niewew, Tiwur Lougwa gun awen owa lamén naŕi eisak nian ge gamagwa karilko neko aŕit patan. ⁴⁶ Géri Yesus gagrag uŕuko anan, “O Mem, da koullil na ewenwa meina,” elle ole mousan. ⁴⁷ Sén Rom fan danah dilag kuri qe kunum peko ge Tiwur binag

† 23:43 23:43 Saw kappa awen kenannah. O meŕe mak danah mouseksi ge qewa Yesus ole dasi.

meko anan, “Meřenah, danah ene mangunah,” eko anan. ⁴⁸ Am danahas kunum qe pelagri uriyeg ge peksi olagwa qetko atew bulieksi loulgarwa ateg. ⁴⁹ Gam danahas Yesus doréw qe kunum ole am as Galiliri dimlamdeksi uriyeg qe ole lawar asemi dessi ker ker beko atan qe kunum ole peg.

Yesus Uksi Ateksi Matmatwa Meg

⁵⁰ Danah os wénih Yosep nug Yudia atu owa taun Arimatearer am nug ole Yuda dilag kuri danah qaglak qewa delle kug keparde. Nug danah kena am danah mangu am nug Tiwur king delle danahas nusgur gumardigri sén qe ameg meré. ⁵¹ Nug ole Yuda dilag kuri danah qagleksi kug peréw qewa daré. Gam nug kuri danah la aneg am seg qeri o olele ospi dian. ⁵² Nug Pailot dowá atko Yesus gaía oko suhumdigri koímorew, Pailot mundew wan. ⁵³ Géri nug Yesus gaía ker mawanakwari oko neko lamén kena sagahwa sapatko am oko atko matmat os qar óre kutlak qewa man. Matmat qe fou am danah gaía la ospi mak ole. ⁵⁴ Deí qe Sabatri keke bawrak sén, am Sabat digumerigri sén unaka duan. ⁵⁵ As Yesus dimlamurweg Galiliri uriyeg qe Yosep dimlamurweg matmatwa ateg. Ag Yesus gaía areg matmatwa meg qe pelagri ateg. ⁵⁶ Peksi ag bulieksi

loulagwa ateksi ge, gořen murdig kena ole qe Yesus gaía warwurlagri bawreg. Malaweg ge Sabat diguman. Géri Mosesri Ro dimlamdak ag sik og.

24

Yesus Mousko Am Buliko Asan

¹ Kuhawa furwanah as os gořen murdig kena ole bawreg qe uksi matmatwa ateg. ² Ateksi qewa ge, matmat koře megleg qar naíri qe bitlew dougwa wanak dewew peg. ³ Peksi ole ag owa nog, gam Naínah Yesus gaía qewa ospi peg. ⁴ Qeri ag katat aqarew aseksi deppeg ge, usihri danah arít bala ampir sonre sillah mak ole qerlagwa aseksa des. ⁵ As qe fařeksi nou méksi duk nuksi gatlagwa yeksi wan kittureksi deppeg ge, danah arít qe anes. “Ag danah gei fou de ge kérdi mousak danah dilag awenwa marisi? ⁶ Nug ewa os kawa. Nug mousan gam buliko asan. Nug Galili dessi ker eko anaran qe dahmores. ⁷ Nug anan, ‘Danah Bega hipunin danah ewlagwa meweg ker mawanakwa katulweg mousdig, gam deí kiamba buliko asdig,’ eko anan.” ⁸ Qewa ge, ag Yesus anan ge bulieksi dahmoreg. ⁹⁻¹⁰ As qe Maria Makdalarer, Yoana am Maria Yems anig am as la os ole arié matmatwa ateg. Ag bulieksi matmatwari louw ateksi ge, Béгур ¹¹ qe am danahas la Yesus

dimlamurdéw ole qe kunum keŕ keŕ ban qe anweg dueg. ¹¹ Gam ag as né aneg qe ulas né essi olag meŕe ospi man. ¹² Gam sén Pita asko guko atko duk noko amnew matmat oŕe owa now ge, lamen sapteksi meg ole qe ih qewa niewew pian. Peko ge, keŕ keŕ ban qeri dahmew te mew newew buliko louw atan.

Danah Aŕit Emeus Atakri Ihwa Yesus Pes

¹³ Deŕ qewa ih Yesus dimlamdak danah aŕit os Emeus kappa atlasri ates. Yerusalemri Emeus atak ge 11 kilomita sillah. ¹⁴ A até até keŕ keŕ Yerusalem ban qe kunum mariessa ates. ¹⁵ A qeri mariessa suŕiessa atepes ge, Yesus nugégé dow ole aŕié ateg. ¹⁶ A pes, gam nug oun qe a olas ospi mouran. ¹⁷ Nug koŕmatan, “A kitérinah né mariessa atsa?” A olasnah dow kilas nou mew aseksa des. ¹⁸ Danah os ge wénih Kliopas qe asko koŕmoran. “Na Yerusalemri uŕina, gam na nagé té deŕ gane atan qewa keŕ keŕ ban qe ospi duen?” eko anan. ¹⁹ Anew ge, nug koŕmatan. “Keŕnah ban?” eko anew, a koŕewa oksa anes. “Nasaretter Yesusri né marifu. Nug gagragsak naŕi ole né marian am keŕ keŕ san. Qewa ge, Tiwur amegwa am danahas amlagwa ole nug profet gagragsak ole. ²⁰ Gam pris dilag anqak danah am gumarak danah isanig ole oŕweksi ewlagwa meweg

ker mawanakwa qeweg mousan. ²¹ Ig Israel nug ig kug owari buliko wigrigri onigwa niewew dahmoretu weiram. Gam qenan ih kawa, qeweg mousan am gei ole deŕ kiam ate, gam kité ospi be. ²² Am as isangar os gei furwanah matmat nusigwa ateksi am bulieksi uŕiyeksi seweg durnig new katat iqé. ²³ Ag Yesus gaŕa qewa ospi niewew piéw, gam Tiwurdi doup piatweg Yesus buliko asé eksa anap. ²⁴ Danah isanig os matmatwa ateksa ge, as anéw qe sillah ole Yesus gaŕa qewa ospi piap,” eksa anap. ²⁵ Géri Yesus anan, “A dahmak kutuk ole. Profet dilag né yak algurer nie, gam ag nagur olag meŕe ospi me. ²⁶ Ag pite dosi ge Kristus kug naŕi ene oko mousko tatam am buliko asko ge kamsahlak gun olewa darig?” eko anan. ²⁷ Am nug digumeko Mosesri am profet la kunum dilag Né yakwa nugégé nusig yeg qe kunum a dolasri nug digu kusuko ismatan. ²⁸ Ag kaw ateg ole qe mourak waneksi ge, Yesus nug kaw qe éŕurko attigri san. ²⁹ Gam danah aŕit qe gagrag meksa anes, “Na i ole ninig, keŕdi ene gattu mane am kem noko malwé,” eksa anes. Géri nug a ole nilagri louw ateg. ³⁰ Ag ke lelagri aŕié dessi ge, Yesus beret os oko Tiwurdi kena sam elle unuqorko temko matan. ³¹ Qere sew ge, usihri a amlas fur kougwew pekxa

olas mouran ge nug Yesus. Gam a sén qewa nug ospi peppes ole qeroʻan. ³² A atété né mariiksa anes. “Ig ihwa uʻriyettu nug Tiwurdi Né yak digu kusuko marié ge kuʻunit koré,” eksa anes. ³³ Géri a usihri aseksa ole Yerusalem bulieksa ates. Ateksa qewa ge Yesus Béгур 11 qe am leilgar la ole qagulweg piares. ³⁴ Qewa ge aneg, “Meʻre! Naʻrinah buliko asan am ole Pita gumurko wanew nug pian,” éksi aneg. ³⁵ Am danah arit Emeusri qe a attowa keʻ keʻ ihwa san qe mariiksa am beret temko matew ge peksa olas mouran qeri anes.

Yesus Peg

³⁶ Sén ag né qeri marieppeg, Yesus nugégé gumarko doko olagwa qere asko delle anan. “Tiwur o maror ag ole dalag.” ³⁷ Ag peksi ole dore piam essi olag faʻrko nou man. ³⁸ Gam Yesus anan, “Ag keʻdi faʻressi am olag aʻrit ole de? ³⁹ Da ewel fél ole duʻfal ene pes. Da enan! Uʻrwileksi pes, da dore os kawa. Keʻdi dore ge téhu am kéwsi ole kawa.” ⁴⁰ Nug qere anko ge eweg am fég ole ismaran. ⁴¹ Ag olag gamag asewew dahmak kuʻrum og, qewa ag olag meʻre ospi man. Qeri Yesus koʻrmaran, “Ag kité lakri ewa os de te?” eko anan. ⁴² Anew ge ag kaké aʻrak os uksi moreg.

⁴³ Morweg ge, nug oko ag peppeg ole lan. ⁴⁴ Nug anaran, “Da ag ole dettu anarin. Mosesri Ro yakwa, profet dilag Né yakwa am Dewitri Kasi Yakwa dasil ane qe kunum meʻrenah mou bérig,” eko anan. ⁴⁵ Anko ge, nug Tiwurdi Né yak olag mourdigri sew dahmak asilag matlan. ⁴⁶ Nug anaran, “Tiwurdi Né yakwa ane, ‘Kristus qe nug kug naʻri oko mousko am deʻ kiamba ge buliko asdig. ⁴⁷ Danahas olag buliew Tiwur dowwa doweg am hipunin asilag kusuqrigri né qe nug wénihwa danahas kunum agop ag Né Kena qe kusulag. Am qe Yerusalem digumelag,’ eko ane. ⁴⁸ Ag qe ih keʻ keʻ ban peg qe kunum ole mariweg dues. ⁴⁹ Da Mem né fagqan qe dimlamurko Koulli Gun méwi uʻrig. Am ag taun ewa ih daweg atew Tiwur gagragsak mardig,” eko anan.

Yesus Saw Kappa Atan

⁵⁰ Qe dimba Yesus béгур omlarew taun paʻrweksi Betani mourak ateksi eweg sumko wittak maran. ⁵¹ Nug wittak marewew Tiwur sumko oko tew minarko saw kappa atan. ⁵² Géri ag Yesus binag méksi am olag gamag asak naʻriwa bulieksi Yerusalem ateg. ⁵³ Am ag Tiwur Lougwa dessi Tiwur binag sumdéw.